

DES ESPRITS

VAINS QVI SAMV-

SENT A CHERCHER DANS

l'art, ce qui n'est que dans la

nature : & dans la nature

ce qu'elle n'a pas. *mus-C.**Où on voit les merueilles de la Sapience Divine,**à causer les flux de l'Ocean, les vents**& autres choses que le feuillet**suivant indiquera. Tab-12^o*Par Maistre LOUIS PASCAL Prestre *vetus*
& Bachelier en Theologie.*n^o 40^o*

A TOLOSE

Par la Vefue de I. Colomiez, & Raym.

Colomiez, Imprimeurs ordinaires

du Roy, & de l'Vniuersité 1626.

Aucc approbation & privilege du Roy.






TABLE DES CHAPITRES QUI sont contenus en ce liure.

- 1 **Q**UE de temps en tēps Dieu reuelles quelques choses, des tresors de sa Sapiēce.
- 2 Des causes du flux & reflux de l'Océan, & pour quoy les Escritures sacrées ne les declairent en termes clairs.
- 3 Comme la mer à deux flux & reflux dans vn jour naturel, quoy que la Lune qui les cause ne face qu'un cours.
- 4 Pourquoi les petites mers n'ont pas de flux.
- 5 De la cause des vents.
- 6 Que la fermeté de la terre de laquelle les Escritures parlent, s'entend qu'elle ne tourne pas circulairement.
- 7 De la stabilité de la terre hors de son centre.
- 8 Que nous voyons les choses différentes selon les corps, par où nostre veüë passe, & selon la forme de ses corps : qui est cause que nostre veüë se trompe à regarder les astres.
- 9 Que les Fontaines ne viennent de la mer par les entrailles de la terre, & qu'elles sont aussi chaudes en Esté qu'en Hyuer.

- 10 Comme il faut entendre la Genese disant que les eaux couuroient la terre.
- 11 Que les Astrologues nous trompent & abusent en beaucoup de choses.
- 12 Que la pierre Philosophale des Alchymistes est vn Phantôme, ne se faisant l'or que par le commun ordre de la nature.
- 13 Qu'on manque au commun vsage du bois au chauffer, du pain au manger, & du vin au boire.
- 14 Qu'il n'y a point de quadrature de cercle par les mesures.
- 15 Qu'il n'y a point de mouuement perpetuel lateral.
- 16 Que le niveau trompe ceux qui veulent esgoutter des marets ou estangs à faute de cognoistre la globosité de la superficie de l'eau & de la terre; à faute de laquelle cognoissance les Mathelots ne scauent de combien loing vn Nauire peut estre veu, ny de combien loing on peut voir vn Phanal.
- 17 Que c'est vne absurdité de dire qu'on puisse arrester ou detenir des voix ou paroles pour estre produictes au temps qu'on veut, & comme on se trompe à faire les Echos artificiels.
- 18 Que l'Herésie est folie & Ignorance.



A MONSEIGNEVR

MONSEIGNEVR LE
Masuyer Vicomte d'Ambrie-
res, Cheuallier, Conseiller du
Roy en ses conseils d'Estat &
Priué, & premier President au
Parlement de Tolose.

MONSEIGNEVR,

*Les mesures & les
poids, sont des moyens si pro-
pres à cognoistre & mettre en
pratique la Iustice, que sans
iceux on ne sçauroit rendre à
chacun ce qui luy appartient.
Mais comme durant tant de*

siècles qui ont coulé, les plus doctes & plus subtils Esprits n'ont peu ny sçeu, avec les mesures, trouver la quadrature du cercle, ou au contraire les moins sçavans & les plus rudes la treuvent au premier essay, avec les poids : ainsi les mesures du passé n'avoient esté que la disposition de la justice, à laquelle la balance a donné la perfection. La France avoit par le passé, réglé toutes ses actions au niveau à la ligne & à l'aune ; mais la balance luy deffailloit pour verifier non seulement la quantité, mais aussi la qualité des cha-

ses. Elle avoit eu des Roys
pieux, des Roys saints, des
Roys debonnaires, sages, &
magnanimes ; mais tout cela
n'estoient que des lignes pour
mesurer les surfaces, non pas
des balāces, qui faisant preuve
des matieres cogneussēt l'or au
poids. Il luy falloit un Louis
le Juste qui pesast à la balance
ce que les autres mesuroient
à l'aune. Les autres Roys
avoient tousiours proueu à
leurs Parlemens des chefs di-
gnes de cette charge ; mais de
donner à chacun de personnes
conuenables, cela estoit réservé
à Louis le Juste. Il cogneust

que Tolose estant la seconde
ville de son Royaume, le Par-
lement y seant, estoit aussi le
second Parlement : Que le
Languedoc estoit la plus gran-
de Prouince de celles qui sont
sous son obeissance ; Et par
ainsi que faisant sa Maiesté
son séjour ordinaire dans Pa-
ris, elle estoit obligée de donner
la seconde lumiere de son Ro-
yaume à Tolose. Ce Roy le-
quel auant l'âge surpassoit les
actions Martiales de ses de-
uanciers, portant semblable-
ment la balance de la Iustice
Et de la prudence auant l'A-
uail de ses ans: ne se contenta

pas seulement de donner à la
Gaule meridionale eloignée de
son soleil une claire lumiere,
mais pesant toutes choses à sa
Iuste balance, choisit pour la
ville plus Chrestienne de la
France, l'homme le plus Reli-
gieux de ses États: Et pour le
Parlement, estimé le plus in-
tegre, une personne qui peut,
sinon rafiner, au moins con-
server cette integrité. Il éleut
pour la plus grande Prouince
l'œil de plus longue venue Et
pour le coing le plus impor-
tant la pierre plus solide; à
laquelle ie desirerois, MON-
SEIGNEVR, sous vostre aduen

appuyer un foible edifice que
i'ay commencé de dresser sur le
commandement d'ont il vous
pleust m'honorer, passé trois
ans dans Paris: lors que vous
présentât le Tableau des Gau-
les, que i'auois dédié au Roy,
il vous pleust me dire ces pa-
roles (vtere genio tuo) les-
quelles j'eusse désiré pouuoir
interpréter en faueur du silen-
ce; mais la signification des
mots & la circonstance de l'a-
ction m'ont porté à leur don-
ner une autre interpretation,
& ce faisant à entreprendre
cest ouurage, sinon digne de
vostre grandeur du moins ca-

*pable de manifester mon zele
à l'aconplissement de voz in-
tentions & volontés; qui n'ont
peu estre que des oracles im-
fallibles; ausquels i'ay obey
comme estant.*

MONSEIGNEVR,

**Vostre tres-humble
& tres-obcissant
seruiteur.**

L. PASCAL.

Handwritten text, likely a list or index, with several lines of cursive script.

MONSIEUR

Handwritten text, possibly a signature or a short note.

Handwritten text, possibly a date or a reference.

P R E F A C E



P R E F A C E

A V L E C T E V R.

COMME il y a de
maladies corporel-
les communes & or-
dinaires, & d'autres
qui sont tellement rares & peu
souuant veües, qu'on neglige
d'en apprendre & sçauoir les
remedes: Ainsi il y a de mala-
dies spirituelles, ou de vices de
l'ame, pour la guerison desquels
on a faict diuers eferits, par ce
qu'ils sont ordinaires & com-
muns à presque toutes person-
nes; & il y en à d'autres si rares

P R E F A C E

qu'on estimeroit perdre le tēps
 escriuant , ou enseignant quel-
 que chose pour leur remede. Et
 toutesfois les moins ordinaires
 tant au corps qu'en l'Esprit , ne
 sont pas si rares , que le dom-
 mage n'en soit notablement
 grand & grandement à fuir & à
 craindre. Le haut mal est vne
 maladie rare , ny en ayant en
 vne ville dans dix ans vn qui
 l'aye; & ainsi les Medecins ne se
 trouuaient pas beaucoup pour
 en sçauoir le remede; mais ceux
 qui ont le mal supleent avec la
 foy, à la faute du remede tem-
 porel, demandant d'estre gueris
 par l'intercession de saint-Iean
 de qui ils vont visiter les Eglises.
 Ceux qui sont malades de phre-

P R E F A C E.

nesie ou rage font le mesme,
 visitant les Eglises de saint
 Auertin ou de S. Hubert. Ceux
 qui ont les escrouelles ont re-
 cours au seul & vnique saint,
 par heritage & office, Le Roy
 tres-Chrestien; aussi appelle on
 ces maux, le mal de saint Iean,
 le mal de saint Hubert, & le
 mal du Roy ; mais ceux qui
 n'ont moyen d'aller à ses lieux
 où Dieu, pour sa gloire & de
 ses saints, donne des remedes
 supernaturels, se perdent le
 plus souuant à faute de remede.
 Ainsi il y a des malades en l'es-
 prit, qui pour ne trouuer des
 Medecins spirituels pour les
 gucir, vont chercher leur re-
 mede l'un à Rome, l'autre à S.

P R E F A C E.

Iaquès, l'autre à Laurette, l'autre à Montserrat & autres ou semblables lieux, où il y a des Confesseurs d'experience extraordinaire, de prudence non commune, & de sçauoir qui passe l'ordinaire, & le commun des autres. Et de ceux qui n'ont le moyen de faire ces voyages en meurent beaucoup en leurs erreurs. L'un entretient toute sa vie le haut-mal de la speculation des cieux, faisant des jugemens de ce à quoy il ne voit goutte. L'autre porte à la sepulture la phrenesie qui luy a faict mettre tous ses biens en fumée; voulant treuuer la Pierre Philosophale, qu'auec sa permission j'appelleray pour cette fois, la Pierre des fols.

P R E F A C E.

fols. L'autre garde tant qu'il vift non pas les efcroüelles du corps, mais de cruelles maladies de fantafie, avec lesquelles il fe diftille l'efprit à chercher les chofes qui ne feurent jamais. Et les autres veulent faire, les vns la quadrature du cercle, les autres le mouuement perpetuel, les autres la prifon & custode des paroles d'as l'air enprisonné. J'ay eu la cognoiffance de ces outrecuidances à vn des lieux où j'ay dit qu'on en va chercher le remede: & ay creu eftre bon de donner au public, ce que j'employois feulement aux particuliers que ie voyois; affin que les maux lesquels, quoy que rares de foy, fe multiplient

P R E F A C E.

par la contagion & communication, arrestent leur accroissement, & leur multiplication. Ces erreurs d'esprit sont rares de leur nature, ny ayant que peu d'esprits qui les reçoivent; mais la faute de remede a fait que la contagion les a rendus de maux rares, maladies communes. Le monde est desia si plain d'Astrologues Iudiciaires, & leur Astrologie tellement Canonisée pour sainte, que qu'ils veult reprendre faut qui se resolve à s'offrir les iniures de ignorant, & peu leger pour monter aux cieux. Les faiseurs d'or sont tellement multipliés, & leur art tellement authorisé, que non seulement ceux auxquels l'igno-

P R E F A C E.

rance est tolerable, consomment leur bien en fumée pensant qu'il en sorte de l'or ; mais ceux qui deuroient desabuser les autres & enseigner les ignorans , employent non seulement leurs biens à paistre leurs fantasies , mais dissipent les biens desquels ils sont depositaires , à vne desesperée esperance de faire de l'or, à l'ombre de laquelle ils s'amusent à regarder ce que la nature sçait faire dans le feu. Les quadratures de cercle cogneus aussi vains à la recherche de cette vaine & inutile quadrature, comme tesmoignés ignorans en la mesconnoissance de l'impossibilité d'icelle : sont en si grand nombre & tellement

P R E F A C E.

tenus pour la fleur des esprits, qu'on tient les paroles de quadrature de cercles pour les signes d'un esprit eminent. Et puis que ces sciences nō sceuës, sont plus estimées que les sciences veritables & cogneües, & qu'ō donne plus d'honneur à la vanité masquée qu'à la verité nue: i'ay pensé de la demasquer pour desabuser, tant ceux qui l'aimēt sans la cognoistre, que ceux qui la loüent sans l'auoir. Je mets au rang des esprits vains & abusés les Heretiques, croyant qu'ils ne pechent pas moins par ignorance que par malice: & quoy que mon principal but soit de corriger ceux qui veulent trop sçauoir, ie dis quelque chose

P R E F A C E.

de ceux qui ſçauent peu , ſça-
chant qu'il n'eſt pas moins
mauuais d'ignorer ce qui doit
eſtre neceſſairement ſçeu , que
de ſçauoir ou vouloir ſçauoir
ce qui eſt inutilemēt recherché.
Et ainſi ie diſ quelque choſe
des fautes qu'on faiēt à l'vſage
des choſes plus communes &
plus iournalieres; cōme le man-
ger, le boire, & le chauffer; cho-
ſes importantes à toutes fortes
de perſonnes. Ie diſ le tout fort
briefuemēt, tant pour ne rendre
la lecture ennuyeuſe, que pour
ne fortir des limites de ma vo-
cation , qui ne me permet de
tant eſplucher la nature , que
i'y perde le temps qui doit eſtre
employé en autres choſes. Ie me

P R E F A C E

Suis contenté de dire ce qui est non seulement permis à vn Prestre, mais ce à quoy le deuoit l'oblige; & n'employe que les paroles necessaires à l'intelligence de ce que je dis, en laissant la plus claire elucidation à ceux qui en ont plus de loysir: T'aduissant, Amy Lecteur, que comme toutes les paroles sont autant necessaires, comme suffisantes à l'intelligence de mes conceptions, il faut vn peu d'attention pour n'en perdre aucune, & pour en tirer avec peu de temps bien employé, ce que vn long discours de paroles te feroit entendre avec ennuy dans vn lasché loysir.




DES ABVSEMENT DES ESPRITS

VAINS.

*Que de temps en temps Dieu monstre
quelque chose des tresors de
sa Sapience.*

CHAP. I.

 **P**ARCE que ie ne ^{Psal. 70.}
suis pas homme de
lettres, j'entreray
aux puissances du
Seigneur (disoit le
Prophete Daud;) cōme s'il eut
voulu dire: puis que les lettres
rendent ordinairement superbe,
ie n'oserois parler des puissances
de Dieu si i'estois hōme lettré,
craignant que la superbe des
lettres ne s'augmentast avec la
haute speculatiō des œuures du
Seigneur: mais ayant commencé

à chanter ses merueilles par la rectitude de cœur, qui dispose à la cognoissance d'icelles, & les faict voir avec simplicité: j'oseray passer plus auant à la consideration de ses puissances, sans crainte de m'enorgueillir. Et après ces paroles il adioust ces autres dirigées à Dieu: tu m'as enseigné dès mon enfance, & jusques à maintenant ie prononce tes merueilles; Monstrant par là ce Prophete, que ceux qui escriuent, ou parlent des choses hautes doiuent plustost attédre de Dieu avec simplicité & netteté de cœur, ce qu'ils doiuent dire, que le rechercher avec la force de l'esprit, & doiuent escrire avec tant d'ardiesse ce qui redonde à la gloire de Dieu, leur estant reuelé sans en faire trop de recherche: comme les plus lettrés doiuent avec crainte mettre en

euidence

evidence les subtilités plus curieusement recherchées, aussi ce Prophete disoit en vn autre lieu; l'ouyray ce que le Seigneur parlera en moy.

Il y à long temps que j'eusse volontiers repris quelques opinions d'Athées, quelques temerités de curieux, & quelques maximes de Philosophes, qui me sembloient peu à la gloire de Dieu, & à la directiō des esprits, si j'eusse sceu exprimer mes intentiōs, & n'eusse eu crainte que ceux qui ont appris diuerses sciences & diuers langages n'eussent mesprisé mon petit sçauoir, & ferré l'oreille au langage que j'auois appris estât enfant; mais ne sçachant les termes avec lesquels les Philosophes s'expriment, ny la methode avec laquelle ils font cognoistre les actes & l'ordre de la nature, ny qui plus est les langues hors des-

quelles la doctrine est comme perdris en plats de terre , & chappons en plats de bois : j'ay mieux aymé cognoistre sans rien dire , les fautes d'autruy , que mettre les miennes au jour, pour les faire voir à ceux qui de petites en eussent inferées de plus grandes. Toutesfois voyant que le Prophete argumente au contraire du monde, prenant la faute de lettres pour pretexte de dire confidément les puissances de Dieu; j'ay prins le mesme pretexte pour oser monstrier l'erreur & la malice de ceux, qui cognoissant quelque chose en la nature , luy attribuent ce qui appartient à son Auteur.

Nostre siecle a de telles gens, ayant non seulemēt des curieux qui veulent voir dans les mouuemens des Astres les euenemens futurs, que la seule Sapience divine cognoist, des outreuidés

qui veulent treuuer dās l'art l'or qui n'est que dans la nature, & des audacieux qui veulent preu-
ner la parole de Dieu avec la pierre de touche de leur juge-
ment; mais aussi des scelerats & impies; puisque l'enfer en a osé
produire, ou instruire, nō seule-
ment des ignorans qui disent en
leur cœur qu'il n'y a point de
Dieu, cōme ceux desquels parle
le mesme Prophete, mais des
sçauans aueugles & malicieux,
qui de langue mesme ont voulu
dire qu'il n'y a point de Dieu, at-
tribuant tout à la nature, rendue
commune par la longue coustu-
me; & au lieu de cognoistre que
la nature n'est qu'un instrument
en la main du grand ouurier, la
tiennent pour vne main qui ope-
re d'elle mesme. Esaie se plai- Esa 48.
gnant avec telle sorte de gens,
leur demādoit: Qui est celuy qui
a mesuré le ciel avec le poing,

Qui a poisé les cieux avec la main? qui est celuy qui tient la terre pendüe avec trois doigts, & poisé à la balance les montaignes & les valées? qui a oüy l'esprit de ces choses là, & qui luy a donné conseil à les faire? ce ne sont pas, adiousté il, les Scrutateurs des choses secrettes qui luy ont donné conseil: car il les rend cōme s'ils n'estoient point, & les juges de la terre sont faits par luy vn neant & vn vuide en sa presence. C'est luy qui faict toutes choses sans conseil, & comme dict Iob, reueille des tenebres les choses cachées; ayant dict auparauant que c'est Dieu qui à la Sapience & la force, le conseil & l'Intelligence, supplantant les principaux, & laisât sans gloire les plus sages. Et en vn autre lieu le mesme Prophete dict, que Dieu produict à la lumiere les choses ca-

chées, & que la crainte de Dieu est Sapience, & la fuitte du mal Intelligence. En quoy il mōstre que si Dieu cache ses œuures aux outrecuidés qui les cherchēt pour leur honneur particulier, il les descouure quelquesfois à ceux qui le craignent; affin qu'ils les manifestent pour sa gloire.

Dauid dit que Dieu produict les vents de ses tresors. Iob que Dieu a meu & bougé la terre de son lieu. Baruc que Dieu enuoye la lumiere & la rappelle; & beaucoup d'autres ont dict de semblables merueilles, sans toutes-fois les declarer que confuse-ment; pour ne dire des choses qui restoient de la cognoissance de ceux parmy lesquels ces Prophetes viuoient. Ce que le Prophete Baruc dict de la lumiere est vne des causes qui concourēt à la production du flux & reflux de l'Ocean. Ce que Dauid dict

des vents est vn effect de ce flux & reflux : & ces Prophetes n'en ont pas parlé n'estant le flux veu ny cogneu aux lieux ou ils escriuoient, comme fort esloignés de l'Ocean, ains ce sont contentés de dire ces merueilleux ouurages de la main de Dieu, sous de paroles voilées, pour ne scandaliser ceux qui n'auoiēt notice que des mers stables. Aussi quād Iob dict que Dieu produict à la lumiere les choses cachées, ne dict pas que Dieu les a produites, mais que Dieu les produict pour monstrier que la Diuine Majesté en descouure en tout tēps, selon le besoin & les occasiōs, & quoy qu'il semble que Dieu aye descouuert par les Prophetes tous les secrets des choses qui porroient estre descouuertes aux hommes : neantmoins ne reste pas d'en tirer quelques vnes du grand magasin de sa Sapience.

Quand Dauid disoit que le ^{Psal.} jour parle au jour, & que la nuit monstre la science à la nuit : on ne scauoit ce qu'il vouloit dire, jusques à ce qu'on a sceu qu'il y a diuers jours, & diuerses nuits; selon la diuersité des climats. Et peut estre que le mesme Dauid ne l'entendoit pas avec tous les sens auxquels on les doit entendre; car si Dieu donne à ceux qui escriuent, l'esprit qu'il faut pour renger les parolles, qui sont comme les vases de l'esprit de Dieu : il romp les vases, & espanche l'esprit ez cœurs de ceux qui lisent avec la disposition qu'il faut. En la Zone Torride & en la temperée le jour & la nuit ensemble ne durent que vingt-quatre heures, estant faicts par le mouuement violent du Soleil; mais aux Zones Frigides, qui sont sous les Poles, le iour & la nuit durent vn an,

venant non du cours violent que le Soleil faict dans vingt-quatre heures , mais du mouuement qu'il faict dans vn an au tour du Zodiac. Et si Dauid n'eust dict par auance avec esprit Prophe-
tique , que les nuiets petites en-
seignoient les grandes, & les pe-
tits jours les grands: les hommes
Suppolaires , voyant que l'escri-
ture dict que Dieu fist le monde
en six jours, eussent entendu ces
jours de ceux de leur terre , qui
durent entre jour & nuiet vn an
entier ; & ainsi ils eussent dict
que Dieu demeura six ans à faire
le monde , & que Iesus-Christ
demeura trois ans au sepulchre,
que Moyse ieusna quaranta ans
& Iesus-Christ autres quarante;
car par iour on entend en toutes
les escritures le temps que le
Soleil demeure sans se cacher.
Ces Suppolaires eussent aussi
creu que suiuant le precepte du
Deca

Decalogue il eust fallu trauailler fix ans & se reposer le septiesme; si les paroles dictes pour vne terre, n'eussent eu l'intelligence qu'il leur faloit donner en vne autre, aussi le mesme Prophete poursuit qu'il ny a paroles qui ne soient entendues par toute la terre, monstrant qu'avec l'esprit de Dieu il cognoissoit que ces paroles seruiroient lors que toutes les terres receuroient la parole de Dieu.

Le jardinier n'arrose l'arbre que jusques à ce qu'il a mis racine, mais cette regle n'est pas si generale que quelques fois il ne l'arrose à cause de la secheresse. Dieu ne fust prodigue en miracles enuers les Hebreux, que jusques à ce qu'ils feurent confirmés en la foy, & neantmoins celuy de la Piscine & quelques autres continuoient pour l'entretenir. Au commencement du

Christianisme on ne voyoit que resurrections de morts, guerisons de maladies incurables, & conuerfions miraculeuses; & quoy que la grande frequence des miracles ne durast que jusques à ce que la foy Chrestienne fust enracinée, neantmoins on en voit de temps en temps quelques vns pour la confirmer; voire vn continuel que nostre seule France garde, comme la seule Ierusalem gardoit celuy de la Piscine. Les Parlemens ne tiennent leurs seances que lors que le peuple n'est occupé aux moissons, ny aux vendanges: & toutesfois cette regle n'est pas si generale, qu'il ny aye vne chambre retenüe pour pouruoir aux accidens & cas fortuits; & pour juger les procez de ceux qui preferent le plaider au moissoner, &

*Gueris
des es
vroilles*

au vendanger. Quand Dieu eust créé le monde, il crea l'homme, & luy fit des yeux si penetrans, qu'ils alloient jusques au dessus des elemens & des cieux, contempler la beauté & bel ordre des Astres: & quoy qu'il n'y eust personne qui creust qu'on en peut voir plus que de ce que les yeux naturels en descouvroient: neantmoins en nostre siecle nous voyõs de nouveaux yeux, de nouvelles lunettes & nouvelles additions de veuë, qui nous font voir de tayas au Soleil qu'on n'auoit veuës, quoy que les Prophetes en eussent parlé obscurement, des montaignes a la Lune, qu'on auoit ignorées, quoy qu'il en eust esté dict quelque chose: & vne multitude d'Astres qu'on n'eust creüe sans voir; quoy que Dauid les eust dictes en grãd nombre, & que Ieremie les eut dictes innumerables,

les Prophetes nous auoient dict
cella avec des parolles obscures,
ayant dict vn Prophete, que le
Soleil & la Lune ne sont pas par-
faicts en la presence de Dieu. On
n'auoit eu l'intelligence de ces
parolles jusques à ce que les Pre-
somptrueux ayant voulu empri-
sonner la prouidence de Dieu
dans leur obseruations d'Astres:
Lune de lon- Dieu à permis que deux petits
gueuaise morceaux de verre les a con-
fondus comme à ceux de Babel,
leur monstrant de nouveaux
astres, ou des astres qu'ils n'a-
uoient encor veus.

Dieu prouuoit aux occasions,
donnant à chasque temps ce qui
luy est propre. Dieu estoit dict,
Dieu des armées par les He-
brieux, non seulement par ce
qu'il donne la force aux hommes,
mais par ce qu'il ruinoit ceux
que bon luy sembloit, avec des
foudres faicts dans l'air: aussi Iob

disoit aux superbes : ce n'est pas vous qui faictes & enuoyés les tonnerres & les foudres. Et lors que la malice des hommes n'estoit pas si grande que les foudres du ciel ne feussent suffisans pour les chastier, il n'y auoit que des tonnerres naturels, mais en ces siècles derniers, que la malice a tant augmenté, que l'air n'estoit pas suffisant à former des foudres pour les chastier, Dieu a permis de nouu^{er}~~er~~^{er} ~~deux~~ tonnerres, de foudres artificiels, & de feux emprisonnés, qu'en se met- *l'artillerie*
tant au large & en liberté, rui- *leries*
nent les villes, battent les chasteaux, & abbatent les tours les plus fortes.

Et non seulement Dieu decouure de temps en temps quelque vne des merueilles qu'il a cachées dans la nature, mais encor son esprit presidant aux congregations, desquelles il est

aussi bien le Congregateur comme le President : declarer en vn temps quelques vnes des choses qui ont esté taillées en vn autre. Les premiers Chrestiens ne dirent pas par de paroles expresses, que le Sauueur fust consubstantiel au Pere: & le Concile de Nice l'exprima avec le mot *Omefios*; parce qu'alors il y auoit des Impies qui nioient la cōsubstantialité. L'Eglise declara au Cōcile de ^{Ephe} ~~Latran~~ la Vierge estre mere de Dieu, avec ce mot *Theotocos*; parce qu'en ce temps là les Nestoriens blasphemioient contre cette maternité. Le Concile de Trente declare la residence des Pasteurs en leurs benefices estre de droict diuin, parce que ceux qui se plaisoiēt à manger, mettant d'autres à la besogne, disoient que la residence aux benefices n'est que de droict humain, estimant que la damna-

tion encouruë pour contreuenir à vn Precepte humain, n'est pas tant à craindre qu'il se faille tant incommoder que de trauailler à cest office tant important : voila comme l'ignorance & la malice vont ensemble ; aussi disoit il, le Prophete, cōme nous auons dict n'aguere, que l'ignorāt auoit dict en son cœur n'y a point de Dieu.

Et comme c'est ignorant ne faisant que le dire en son cœur, sans le manifester par paroles, ne faisoit guere de mal : cette peste n'estoit pas contagieuse ; aussi ce Prophete dict *Dixit*, au preterit cōme de chose ia dicte en celuy qui le dict : & non continuée en ceux qui ne voyent le cœur de l'ignorant , comme Dauid qui le voyoit avec son esprit Prophe tique ; aussi n'y auoit il pas tant de malice au monde pour y pouuoir semer cette parole pire que Tartarique, *non est Deus.*

Et ainsi il n'estoit pas besoin de precaution à cette doctrine, ny de publication des œuvres de Dieu en autre façon que comme les Prophètes les auoient publiées sous des paroles couuertes.

Psal.
134.

Dauid auoit dict que Dieu produiſt le vent de ses tresors : Iob auoit dict que les neiges & les foudres sont de tresors ; & cela suffisoit, ny ayant que des Athées de cœur ; mais maintenant que la superbe & outrecuidance des vns, & la stupidité & ignorance des autres est tellement la terre disposée pour la semence de l'athéisme, que ceux qui n'osoient estre que Athées de cœur sont Antithées de bouche : il faut adiouster aux yeux faicts de la main de Dieu avec tant de membranes, tant de nerfs, tant de matieres & tant de maistrise, les pauvres yeux d'un peu de verre, adioustant aux paroles des
Prophe

Prophetes , de paroles de plume molle, pour jetter plus auant la cognoissance des œuures de Dieu. Il faut confondre les impiés qui sur cette cognoissance veulent fonder l'honneur qu'ils desrobent à Dieu pour se l'attribuer à eux mesmes, faisant semblant de le donner à ses œuures. Il faut leur donner de nouveaux langages pour les faire choir de la tour , de laquelle ils veulent sortir Dieu de son trône:& pour les empescher de seduire les ames , qui se laissent trop facilement abuser.

Si cette plume molle doit ayder aux plumes dures, fortes & esclairées par l'esprit du ciel, & si les yeux de verre fragile doiuent adiouster quelque chose aux yeux clairs , ouurages de la main de Dieu : Je prie sa diuine Majesté qu'il luy plaise guider l'œil, conduire la plume, & tenir

la main avec la main: afin quelle n'escriue rien qui ne soit à son honneur & gloire, à l'edification des ames qui le craignent, & à la confusion de ceux qui regardent la nature naturée, pour mescognoistre la nature naturante, ceux qui veulent monter au ciel pour s'en rédre maistres, & ceux qui veulent mettre dans l'art ce que Dieu a estably dans les bornes de la nature. Et puis qu'entre tous ceux cy les Anthithées sont les plus malicieux, ie commenceray par la demonstration d'un eschantillon des merueilles de Dieu, & magnificence de ses œuvres, qui jettera son esclairant esclat sur les malicieux, qui se font plus aueugles qui ne sont, & manifestera leur impieté pour les rendre confus en leur malice. Apres ces merueilles je tacheray d'abattre la hardiesse des Astrologues, qui

veulent comprendre avec leur art ce qui n'est aucunement de leur cognoissance. Et apres essayeray de confondre ceux qui se jactent de sçauoir faire de l'or, descourant leurs fineses, pour desabuser ceux qui pour ne les cognoistre, consument leur esprit en recherches, & leurs biens en fumée; mettant leurs maisons à la faim, & leur honneur à la risée du peuple: l'aiousteray des aduertissemēs à quelques petits esprits qui s'amusent à rechercher, les vns la quadrature du cercle, les autres des mouuemens perpetuels, les autres d'autres choses desquelles la vraye science est la cognoissance de leur impossibilité; leur montrant que c'est folie de mettre le temps à chercher dans les mesures la quadrature du cercle, qui ne se treuve sans les

poix : & que c'est perdre le loisir de chercher dans le mouvement lateral, la perpetuité, qui ne se treuve que dans le mouvement de grauité, ou de legereté qui est de haut en bas, ou de bas en haut. Et sur la fin vn mot aux espritz qui remplissent leur memoire des choses passées, sans disposer l'entendement à l'intelligence des presentes, avec lesquelles on distingue des tēps, des lieux & des personnes, & à faute de cette distinction beaucoup d'arts & de scienees sōt mal employées, cōmençons donc au nom de Dieu; parlant,

*Des causes du flux & reflux
de l'Ocean.*

CHAP. II.

Que la Lune soit la cause du flux, & reflux de l'Ocean, cela n'est guiere en doubte, ny

en contreuerse ; puis que non seulement le flux se gouuerne par le cours violant que la Lune faict chasque jour, d'Orient en Occident:mais aussi par le cours que retrogradant elle faict chasque mois dans le Zodiac ; estant les marées plus grandes en son plain qu'en son croissant ; mais que le flux face deux allées & deux venües, dans vn jour naturel, & que la Lune n'en face qu'une : cella met en confusion ceux qui ne cherchent les choses qu'avec les forces de leur esprit. Car à quel propos dire que la Lune m'eust la mer avec son aspect, si la mer a vn mesme tour & retour lors que la Lune est à nostre orison, que lors qu'elle ny est pas ? Pour accorder ces raisons differentes, & monstrier que la Lune cause l'vn & l'autre de ces flux & reflux, faut presuposer & mettre pour fonde-

ment que les Astres, nottâment les Planettes errantes, ont vne vertu attractiue, tirant hors de terre les plantes & les exalations; & les vns ont cette vertu d'attirer plus grande, les autres plus petite, selon leur grandeur ou proximité. Et le Soleil cōme plus excellēt a vne double vertu, impulsive & attractiue. Aussi voit on entre les choses de nombre septenaire y en auoir vne qui excelle les autres, ayant double vertu. L'or entre les metaux, qui sont sept en nombre, a vne vertu impulsive avec sa grande grauité, & vne autre attractiue avec la force que le Soleil luy donne & communique deschauffer: entre sept petitions que le Sauueur nous a enseignées, il y en à vne, & c'est celle du milieu qui a double vertu, demandant le pain de l'ame & le pain du corps: Entre sept Sacremens,

celuy du milieu en ordre a
vne double vertu , donnant &
contenant la grace, & l'Aucteur
de la grace : Entre les sept voix
du Seigneur que Dauid dict en Psal. 124
vn Pseaume, celle du milieu ou
quatriesme à vn double effect,
ou vn effect deux fois repeté,
rompre les Cedres, & rompre
les Cedres du Liban : entre
sept jours de l'ouurage de la
creation du monde, & repos
du Createur, le quatriesme qui
est le mitoyen de sept, fust ce-
luy auquel fust faict le double
ouurage de deux grands lumi-
naires ; Et non seulement aux
Septenaires des choses bonnes
il y en a vne de double, mais
aux choses mauuaises. Entre les
sept vices capitaux les trois nais-
sēt en l'esprit, les trois en la chair,
& l'autre en tous les deux, la
superbe, l'enuie, & l'auarice,
en l'esprit: la luxure, la gloutonie,

& l'ire en la chair : & la paresse se tenant au milieu des autres , a vne racine en l'esprit, & vne autre au corps. Ainsi entre sept planettes celle du milieu qu'est le Soleil a vne vertu attractive par le moyen de la chaleur & vne impulsive sans laquelle cette chaleur tireroit grandement la terre & la mer de leur centre ; en quoy Dieu a monsté sa puissance & sa sagesse autant qu'en aucune autre de ses œuvres ; aussi le Prophete dict que Dieu a mis au Soleil son tabernacle, comme s'il disoit, Dieu a mis au Soleil vn de ses chefs d'œuvre, luy donnât vne vertu double & differente ; l'excellence de la double action du Soleil est encor monstree par son double nom Hebrieu *Semes*, qui se lit en deux sortes, sans varier la Prolation , à gauche & à droicte. Les Hebrieux ont donné au plus bel astre vn double nom.

nom. Les Latins en ont donné vn semblable au plus excellent precepte *Ama*, aussi est il precepte double, comprenant l'amour de Dieu & du prochain. Nos anciens Gaulois donnoient à Dieu vn semblable nom, l'appellant *Aga*, duquel nom les Parisiens & autres François se seruent encore aujourd'huy, aux grandes admirations, ausquelles ordinairement on inuoque Dieu. Les Mahometains luy dōnent vn de ces noms l'appellant *Alla*, & tiennent ce nom luy estre tellement conuenable, que non seulement entre les Grecs, & autres nations de l'Europe, & entre les Hebreux & autres nations de l'Asie : mais aussi en toute l'Affrique ils appellent Dieu *Alla*. À l'homme qu'on doit plus estimer, qui est le Pere, diuerses nations & diuerses langues, luy donnent vn de ces

noms l'appellant *Abba*, l'homme en général estant la plus noble creature visible : les Latins luy ont donné vn de ces noms, l'appellant *Omo*, la sœur de Moÿse, comme premiere prophetesse auoit vn de ces noms *Anna*, aussi bien comme celle d'où sortit la chair où deuoit estre incarné le Verbe diuin, qui a encore ce nom *Anna*; mais nous verrons mieux la double action & excellente vertu du Soleil, par le Prophete Baruc qui la declare, quand il dict que Dieu enuoye la lumiere & elle va, & la r'appellant elle luy obeist. Or la lumiere se peut rapporter à la vertu impulsue, & le reuenir à la attractiue.

Sans la vertu impulsue du Soleil, la attractiue disloqueroit la terre; n'ayant autre appuy que sa grauité. Aussi disoit Iob, que Dieu la pendue

Bar. 3.

E. b. 26.

sur le rien: car comme vn bateau, qui seroit sur la mer, estât au centre de sa grauité, entre l'eau plus pesāte que le bois, & l'air plus léger, seroit difficilemēt haussé en haut & poussé en bas, quoy que facilemēt tire aux costés: neantmoins si ce bateau estoit chargé de fer, vne pierre d'Aymant aussi grosse que le bateau le baisseroit, ou hausseroit; & le tireroit notablemēt de son centre, estât l'eau qui est au dessous, & l'air qui est au dessus du bateau, liquides, fluides, & flexibles. Ainsi la terre quoy qu'en son cētre de grauité n'estât neātmoins entourée que d'air, qui est tres-mol & flexible, seroit facilemēt tirée par la vertu du Soleil, avec laquelle il tire les nuées de la mer. Car cōme on ne sçauroit tirer avec du fer, de poudre d'Aymant, qui feroit dās des estoupes, sans attirer les mesmes estoupes, & comme on ne sçau-

roit tirer des plumes d'un oyseau, sans mouvoir l'oyseau, si avec une main on ne tient l'oyseau, & avec l'autre la plume : Ainsi la vertu du Soleil ne tireroit l'eau douce de parmy la salée, sans attirer la salée, n'y la vapeur de la terre, sans en quelque façon attirer la terre; si la sagesse de Dieu n'eust donné au Soleil une double main, ou deux mains, l'une pour attirer, & l'autre pour retenir. Et comme cette sagesse est une mer plus profonde, que la mer d'où ie parle, & si grande, que ie crains tant de m'y perdre ou bort, si elle ne m'est favorable, comme ie craindrois de faire naufrage en pleine mer n'ayant ny voile ny rame, cette profonde sagesse, dis-ie, laissa à la Lune, l'unique action d'attirer, sans l'autre de poulcer, estant la vertu de la Lune beaucoup plus petite que celle du Soleil, pour tirer la

terre de son lieu; & toutesfois cette vertu n'est pas si petite qu'elle ne meuue la terre, quoy que peu. Aussi Iob dict que Dieu m'eust la terre de son lieu; & si Dauid dict, que Dieu a fondé la terre sur l'estabilité, cela s'entend du mouuemēt circulaire, comme nous monstrerons en son lieu, & en quoy reluit tant la sagesse de Dieu; comme au mouuement local: ce mouuemēt de terre cause vn double mouuement à la mer, & ce double mouuement nous fera voir.

Comme la mer a deux flux & reflux dans vn iour, par la vertu de la Lune, quoy que la Lune ne fasse qu'vn cours, & n'en la voye qu'une fois.

CHAP. III.

Pour bien entendre cecy : Il faut sçauoir, que la mer & la

terre font vne superficie ronde & globeuse , & la Lune ne la voit à plomb qu'à vn endroit. Et ainsi ayant la Lune plus de force enuers la partie regardée à plomb, qu'enuers celle qui n'est veuë que de biais cette partie veuë à plomb est attirée & suivie par le reste , qui ne veut rien laisser de vuide selon le commun ordre de la nature. Or tout le globe de la terre & de la mer, n'obeyt pas à mesmes temps, n'y mesme ordre, n'y mesme vitesse; car la mer comme flexible suit plus facilement premiere, la terre suit la mer, comme luy estant conioincte; mais toutesfois avec moins d'obedience, pour estre plus à son centre que la mer, comme ie ferois voir si cela ce pouuoit dire avec peu de paroles, & la mer antipodiane ou contraire à la partie que la Lune voit (ny ayant guere de mer

qui n'aye de mer en ses antipodes) cette mer antipodiane résiste à cette attraction , pour ne sortir de son centre , & avec sa fluidité se laisse desrober à la terre , se tenant en son lieu naturel. Et ainsi à mesme temps , & par vne mesme cause la mer esloigne sa superficie de la terre en deux en droicts opposites ; à sçauoir la partie plus près de la Lune , & la plus esloignée. Ces enfleures de mer ont faict dire à quelques matelots, que la mer est mōteuse , ayant veu qu'elle est vn peu plus globeuse en l'édroict où ses attractions se font, qui est sous le Zodiac, qu'aux autres. Les Medecins qui habitēt près des bords de l'Ocean, ont prins garde que les maladies suiuent en certaine maniere le flux & reflux, & sçauēt dire au peu près le poinct du flux, auquel plus d'agonisans meurent. Mais ce qui les esmerueille,

(ne ſçachant. que les deux flux ſont differents, & que leurs pronostiques du flux, ſe treuuent ſouuent veritables, ſe treuuant neantmoins quelquesfois fau-ces; & c'eſt parce que le flux qui ſe faiſt, eſtant la Lune en noſtre orifon, eſt de different eſſect à celuy qui ſe faiſt en eſtant abſente. Car eſtant la Lune en noſtre orifon, l'air eſt preſſé par l'aproximation de la terre, ce qui n'eſt pas lors que la Lune eſt abſente; ains au contraire rare. Et outre la preſſe de l'air, les aſtres regardent la terre d'un autre aſpect, en l'abſence qu'en la preſence de la Lune, eſtant plus loing la terre ou plus près, ſelon qu'elle eſt meue par la Lune; quoy que cemoouement ſoit ſi petit, au reſpect de la grandeur de la terre, comme le mōtagnes ſont petites au reſpect de ſa rondeur. Les Monts-Pyrenées, n'y

les Alpes ne se cognoissent pas à la Lune, quand elle est esclipsée par la terre : ainsi le mouuement de la terre qui cause le flux & reflux n'est pas si grand, que pour cela on laisse de recognoistre tousiours la terre au centre du monde ; & toutesfois n'est pas si petit que l'air, cedant le lieu que la terre occupe s'approchant de la terre, & allant remplir celuy qui demeure vuide de l'autre costé, ne produise les Autans, les Aquilõs & autres vents, comme nous dirons ayant dict.

Pourquoy les petites mers n'ont pas de flux & reflux.

CHAP. IV.

PAR les raisons que nous venons de dire, il est facile à entendre que la mer vniuerselle, que nous appellons Oceane, d'autant qu'une partie d'icelle est

en nostre occisiõ ou couchât, de Soleil a son flux & reflux, à cause de sa forme spherique: Et ainsi puisque les petites mers n'õt la superficie tât spherique, que la Lune ne les voye entieres en mesme temps, voire presque toutes les parties de chascune d'icelles d'un mesme aspect, la Lune ne leur peut causer les mesmes effects qu'a l'Oceã, quoy que leur superficie soit vn peu voutée & spherique, estât ce peu vn quasi rien; aussi si on regardoit bien, ou si les ondes donnoiët lieu à la regarder on verroit que la mer Mediterranée a vn peu de flux: mais si petit qu'elle n'en sçauroit auoir tant de trauers de doigt comme l'Océan en a d'aunes, voire ce flux de la Mediterranée, n'est qu'aux bouts de sa longitude, à sçauoir à Giualtar & au bout qui voisine la Palestine; mais la petitesse fait qu'õ l'attribue aux ondes & aux

vêts mesmes à Giualtar où il est encores incognu par l'abouchement del'Océan, qui luy cōmunique sō flux en ce bout là. La cause pourquoy ce flux de la mediterrannée n'est en ses parties mitoyennes, aumoins pour estre cognu, est que cette mer est si estroicte, que sa petite largeur ne peut donner que fort peu de differēce d'aspect à la Lune. Et cōme nous assignōs deux causes du flux à l'Océan, l'une en vn endroit par attractiō que la Lune faict, & l'autre par retētion de la mer en son centre, toutes ces deux causes māquent aux petites mers; car quoy qu'une petite mer eust l'Océan pour Antipodes, & que par cette mer grande elle fust tirée de son centre, vne partie de cette petite mer ne peut estre plus desobeissante à la terre que l'autre, estant ces parties esgalemēt où quasi esgalemēt tirées de leur cētre. Il y a encore

vne autre raison par laquelle les petites mers n'ont pas de flux, c'est qu'elles ne sont pas veuës à plomb par la Lune, n'y en ayant aucune sous le Zodiac, ains le Zodiac à l'Ocean sous toutes ses parties, où i'entreuois vne autre merueille de Dieu, que i'ayme mieux admirer avec crainte, que regarder de plus près. Or que la Lune cause le flux à l'Ocean, outre les precedantes raisons, il semble que nous en ayons vn tesmoignage en l'Escripture, car à quel propos auroit dit Dauid, parlant de la paix que le Messie deuoit donner iusques à la fin du monde, ces paroles, *donec auferetur Luna*, iusques à ce que la Lune soit ostée, à quel propos auroit il parlé de la Lune seule, & non plustost du Soleil qui est le principal astre? il faut bien que la Lune aye quelque grande & parti-

culiere perfection : voyons la raison que ce Prophette a eüe de parler de la Lune plustost que du Soleil. Nous sçauons que l'enfant faict plus de compte de la nourrice qui luy donne la mamelle, que du pere qui nourrit & salarie la nourrice ; aussi nous faisons plus d'estat & auons plus de memoire de la Lune qui faict produire à la terre ce qui nous est necessaire à la vie, que du Soleil qui produict & conserue la vie : & leue de la mer l'eau qui remplist nos fontaines, qui faict fluër nos riuieres, & qui fertilise nos champs. Le Soleil tire l'eau de la mer, mais elle y retomberoit avec sa grauité, si la Lune ne la portoit sur la terre, avec vn mouuement lateral, par le moyen du flux, comme nous auons dict & changement d'air, comme nous dirons : Et ainsi Dauid a eu bonne raison, de se

souuenir de la Lune, comme de l'astre qui nous donne l'eau, le vent, & la fertilité de la terre, ainsi qu'il a dit à vn autre lieu, disant que la terre a esté meüe & les
Esa. 67. cieux ont distillé. Le mouuement de la terre par la Lune, est cause que les cieux donnent la pluye, mais nous verrons mieux eccy parlant,

De la cause des vents.

CHAP. V.

IE ne puis penser comment Aristote, & ceux qui le suivent ont osé dire que le vent fust autre chose que l'air, n'y qu'il fust vne exalation chaude & sèche: car s'il n'est air, faut qu'il soit feu, terre ou eau, s'il est eau pourquoy est il plus inuisible que

les nuées, & pourquoy a il vn mouuement lateral, contre la nature de l'eau: qui tend en bas, & contre la nature de l'exalation, qui tend en haut. Je sçay qu'ils respondront que l'exalation tend en haut: mais qu'estant rencontrée par la froideur de la moyenne region de l'air, est renuoyée contre terre & la terre la renuoye vne autresfois (voila bien de renuois). & ainsi renuoyée par la terre, elle court lateralement: mais ie ne sçay si la terre la produicte la premiere fois avec nature de monter en haut, & puis luy apprend à cheminer à costé, ou bien si l'exalation à vne raison & vne memoire de la repulsion du froid de l'air moyen, & que pour la fuyrelle coure à trauers. Je croy que Aristote, n'y ceux qui le suivent en l'opinion des vents, ne diront pas cela. Mais

difons leur encore que si cette exalation est eau, il faut qu'arriuant à la seconde region de l'air, elle se resolue en gouttes, comme l'exalation de l'alambic qui se rend fluide & graue dans le refrigeratoire. Si cette exalation est terre, il faut qu'elle soit plus visible que les nuées : d'autant que la terre est plus opaque & plus visible que l'eau, de laquelle les nuées se font. De dire qu'elle soit de feu, on ne la sentiroit pas froide comme on fait lors qu'elle soufflé : ains brusleroit poussant avec la force qu'on la voit pousser. De dire que cette exalation soit d'une quinte-essence, ie ne sçay quelle quinte-essence inuisible cela peut-estre. De dire qu'elle soit chaude & seche sans matiere, ie ne sçay comme cela se peut entendre. Et puis si elle estoit chaude, il ne faudroit en hyuer quand

il faiët bien froit, que se des-
pouiller & se mettre là où il fait
force vent: ie croy qu'Aristote
ne le fist iamais. Si ie luy deman-
dois comment cognoist-il que le
vent soit vne exalation seiche, ie
sçay bien qu'il penseroit me ter-
rifier pris, disant que le vent sei-
che les choses humides; mais
il faut des-abuser ceux qui le
croient, & qui pensent que le
vent soit autre chose qu'un air
qui chāge de lieu, l'air qui pressé
sort du soufflet, est aussi froid
& chaud que le vent. L'air agité
avec vn esuentoir a les mesmes
effets de refroidir & seicher que
le vent. C'est pourquoy les Da-
mes, qui en esté se treuuent à des
lieux où il ne fait poinët de vent,
meuent l'air avec des esuen-
toirs, pour se garder de suër. Et
pour tirer encor d'erreur ceux
qui pensant que le vent soit vne
exalation chaude & seche, se-

chant les choses humides, il faut monſtrer que l'air meſeche, & comment cela ſe faiſt. L'eau de ſa nature monte dans l'air, auſſi voyons nous que les oyſeaux créés de l'eau, non ſeulement ſe tiennent ſur la terre, *Gen. 1.* mais montent en l'air, & non les beſtes créées de la terre. Et les nuées qui ſortent de l'eau, nous font aſſés voir que l'eau monte facilement dans l'air, & l'air la reçoit volontiers: que cela ſoit, parce que l'eau veut aller au lieu que l'air occupe aux eaux qui ſont retenuës en haut par le firmamēt, ou que les eaux de ſur les cieux les attirent, comme le fer attire l'Aymant, ie m'en remets à ce que celui qui a tout créé avec ſa toute-puiſſance, & tout ordonné avec ſa profonde ſageſſe, en ſçait, ce que nous voyons, & que j'oſeray dire, eſtāt viſible, eſt, que quand il ne faiſt

point de vêt, les nuées ne croissent pas sur les marests: mais volettēt cōtre la superficie de l'eau sans monter haut, & c'est parce que l'air voisin de cette superficie estant soul, & ayāt toute l'eau de laquelle il est capable, n'en attire plus. Mais quand l'air imbu d'eau, faiēt place à vn autre air, estāt meu par le vêt, c'est air nouveau-venu à la superficie de l'eau cōtinue l'attractiō d'eau, d'où viēt que les marests se sechent par le vent, mais ce vent n'est pas vne exalation, ains vn changement d'air. Et quand bien le vent seroit vne exalatiō (chose qui ne peut estre) d'où pensent ils qui puisse sortir tāt d'exalatiōs qui produisent des Autans, de quinze iours. cōme on voit biē souuent. Toute l'eau que le Soleil, avec la grāde force de sa chaleur, tire de la mer se réduit dans de riuieres & fontaines, & le vêt qui a ses courses

cent fois plus larges que les rivières, qui les a cinquante fois plus hautes, que les rivières ne sont profondes, & qui fait sa course avec plus de vitesse, que les plus rapides rivières, d'où pourroient il sortir tant d'exhalaisons ? de la terre disent ils; mais il faudroit bien que la terre en eust pour en fournir tant. Les Philosophes veulent à quel pris que ce soit, donner quelque raison de toutes choses; & au lieu de voir les vents, avec crainte & respect, dans les trefors de Dieu, en veulent forger de causes dans leur ceruelle. Dieu produi& les vents de ses trefors (disoit David) sans toutesfois dire quels estoient ces trefors: cōme estant mieux de les cōtempler avec crainte, que les trop esplucher avec audace & temerité, vn autre Prophete nous aidera à voir les trefors de Dieu, qui produi-

sent les vents. Ce se ra Iob qui dans la grande humilité du fumier apprenoit les merueilles de Dieu, il dit que Dieu extendoit l'Acquilon sur le vuide. Iob. 26.
 Avec ses paroles nous verrons clairement ce que nous disons aux Chapitres precedens, que la Lune attire la terre : car si l'Acquilon s'estend sur quelque vuide, il faut que quelque mouuement dōne ce vuide, & que quelque changement de lieu donne l'extention & muance de lieu de l'Acquilon, & ce vuide ne peut-estre cause, que par le mouuement que la Lune faict de la terre : car quand la Lune est en l'autre orison, & attire vers soy la terre, elle dourroit ou laisseroit du vuide à nostre orison, si l'air que la terre presse de delà ne le venoit empecher, fuyant cette presse. Et ainsi ce Prophete a dict, que l'air d'Acquilon c'est

estendu pour empescher le vuide, que la nature ne peut s'offrir. A suite de ces paroles, il en dit d'autres qui declarent le mouuement de la terre, & le vuide que l'aquilon remplit, quoy que ce soit assés declaré,

Iob. 9. là où il est dit que Dieu meust la terre de son lieu. Ce Prophete dit donc que Dieu a penduë la terre sur le rien, comme n'ayant autre appuy que l'air qui l'environne, réputé pour rien à cause de son insolidité, impalpabilité & inuisibilité, en quoy il nous mōstre quoy que avec de paroles vn peu voilées, que la terre est subiecte au mouuement avec lequel elle cause le mouuement de l'air de l'aquilon au vuide du midy, ce mouuement d'air est appelé vent, sans laisser d'estre air : comme l'eau courante est appelée riuiere, sans laisser d'estre eau, de nom, & de nature.

Ce qu'on pourroit dire contre cecy, est que le mouuement de la terre est regulier & avec ordre, & les vents n'ont point de regle courant vne fois d'un costé & vne fois d'un autre, vne fois lentement & vne fois avec violence: mais il y a à cela vne responce, à sçauoir que quoy que le Soleil, qui cause l'hyuer & l'esté, s'aprochant ou esloignant du pole, aye son chemin dans le Zodiac avec regle, ordre & mesure: neantmoins l'aduenement de l'esté & de l'hiuer ne gardent pas c'est ordre, estant quelques-fois plus chaud le mois de Mars que celuy d'Auril, & ainsi il n'est pas hors de raison, que les vents ne suiuent l'ordre de leur cause: car si le Soleil ne fait les hyuers & estés de diuerses années esgaux, à cause de l'inegal cours des autres astres qui luy aydent concourant leurs influences

quelque peu à faire, les faisons chaudes ou froides. Ainsi le mouvement de la terre fait les courses de l'air inegales & irregulieres, parce que ce mouvement est inegal à cause du changement de la Lune, qui dans vn mois fait le tour du Zodiac, ioinct que l'inegalité de la superficie de la terre, donne encore vn autre desordre au cours du vent. Le vent cour d'vn train aux valées d'vn autre aux montagnes, & d'vn autre aux plaines, ainsi il n'est pas merueille si l'inegalité de cours de la Lune, & inegalité de la superficie de la terre, font que le vent n'a aucun ordre. Cecy suffira pour faire voir la cause des vents, & qu'ils ne sont autre chose qu'une course d'air, qui va d'vn costé en autre de la terre, pour empescher le vuide, il reste de voir.

Comme

*Comme la fermetté, que les saintes
Escriptures donnent à la terre, est
qu'elle ne tourne pas circulairement.*

CHAP. VI.

LE Philosophe Archimedes
auoit vne grande raison, de
dire que s'il eust peu appuyer vn
instrument hors de la terre, il
l'eust faicte tourner & piroüetter
à son plaisir. Il eust bonne raison,
dis-ie, estant Payen, n'y ayant
chose qu'on puisse descouvrir en
la nature, qui puisse empescher
le cours circulaire de la terre;
mais parlant en homme illumi-
né de la foy, il eust esté outre-
cuidé & temeraire de parler ain-
si, ayant Dieu mis en la stabilité
de la terre vn effect de son haute-
puissance. Les gonds de la terre
sont du Seigneur, dict la sœur Reg. 2.
de Moyse, comme si elle vouloit

dire; si les gonds de la terre n'estoient de Dieu, & tenus avec sa main, elle tourneroit à tous vents & à tous mouuements, n'y ayant rien de stable. Les choses qui sont hors de leur centre y vont ne treuuant d'empeschement, les legeres en montant & les graues en descendant, les cieux estant en leur lieu naturel tournent circulairement, quoy que leur rondeur soit differente; y en ayant des vns concentriques avec la terre, & les autres excentriques. Et la terre outre qu'elle est ronde, qu'elle est en son centre de grauité, & qu'elle est dans l'air liquide, qui n'a rien de solide pour luy empeschier le mouuement, a encor vne autre raison de mouuement, qu'est le mouuement des cieux, auxquels elle est attachée par les influences des astres. La chose contenuë

est meüë par le mouuement de la chose contenant. On ne ſçau-
roit tourner vne truſche pleine
d'eau, que l'eau ne tourne pen
ou prou, n'y tourner vn œuf de-
meurant le moyeu fixe. Et com-
ment demeureroit la terre fi-
xe, au milieu d'un rapide mou-
uement de cieux, où elle eſt
attachée par les influences, &
comme liée par les cheueux,
avec la chaleur du Soleil; ſi
Dieu ne l'arreſtoit avec ſa main
puiffante, & n'en tenoit les
gonds, auſſi les gonds ne ſont
mis qu'à choſe qui tourne cir-
culairement, comme les portes.
Le gond de Dieu eſt la ſtabilité Pf. 102.
dont parle Dauid, diſant; que
Dieu a fondé la terre ſur ſon
ſtabilité en telle ſorte, qu'elle
n'inclinera point au ſiecle des
ſiecles, incliner ſ'entend pour vn
mouuement circulaire: comme
pour incliner l'oreille, on entend

se tourner, & pour incliner l'œil on entend le tourner, & non pas l'ouvrir, aussi est il autant plus miraculeuse la stabilité quand au cours circulaire, qu'au mouvement local; qu'il est plus facile de faire courir vn navire chargé sur l'eau, que de le hausser en haut ou enfoncer en bas. Le navire chargé est si bien assuré entre l'eau & l'air (qui est le centre de sa gravité) que vn grand nombre d'hommes ne l'esleueroit pas en haut en l'air, n'y ne l'enfonceroit en bas dans l'eau; mais pour le faire courir à costé, vn enfant le feroit, ou vn petit soufflement de vent, parce que courant à costé, il ne sort pas de son centre de gravité. Ainsi la terre se tient d'elle même en son centre de gravité, par la gravité que la nature luy donne, ne pouuant estre meüe que par la puissance d'un astre qui a quelque propor-

tion avec elle; mais pour la mou-
uoir circulairement, il ne fau-
droit qu'un Autan contre les Pi-
ranées, ou vne Bize contre les
Alpes, pour la faire piroüetter
comme vne pellote. Et non seu-
lement l'engin d'Archimedes
hors d'icelle la feroit tourner:
mais avec des esuantoirs artifi-
ciels, faicts sur la terre mesme
elle tourneroit. Car comme le
nauire est mené, non seulement
par des cordes du dehors du na-
uire, mais aussi par vn mouue-
ment qu'on fait dans le nauire
mesme, avec des rames & des
esuantoirs, avec lesquels on
pousse l'eau & l'air, ainsi on
mouuoit la terre avec des mou-
uements faicts sur la terre mes-
me, si la puissance de Dieu ne la
tenoit. Car si les Philosophes
disent, non sans quelque raison,
que le marcher qu'on faict sur la
terre la faict mouuoir de son cen-

tre comme vn œuf ou autre petite chose mise dans vn nauire, le faiët baïſſer, avec qu'elle plus grande raiſon peut on dire que la force d'vn grand vent, qui bat vne grande & longue montaigne la feroit tourner dans le propre centre de ſa grauité, dans le rond de ſa circulaire ſuperficie, & d'as l'impalpable moleſſe de l'air, où rien ne la tient ſi la main de Dieu ne l'arreſtoit? C'eſt en cette ſtabilité & le miracle & l'eſclat de la puïſſance de Dieu, & non en la ſtabilité du lieu, laquelle comme naturelle eſt affés cogneuë aux hommes; & trop, puis qu'on ne cognoit les exceptions, que Dieu pour noſtre bien & pour ſa gloire, donne aux regles communes & generales de la nature; & qu'on s'atache tant à ces regles qu'on meſcognoiſt, voire quelquesfois on meſcroit, ce que ſon admirable

sagesse faiet hors d'icelle: voyons
cette sagesse à vn autre stabilité
non moins admirable qu'est,

*De la stabilité d'une partie de la terre
hors de son centre & plus haute
que la mer.*

C H A P. VII.

Dieu a fondé la terre sur les Ps. 135
eaux, dit Daud, & le sage
dit que cette fondation est eter-
nelle, comme s'il vouloit dire
qu'elle est depuis la premiere
creation: aussi vn autre Prophete Baruc. 3.
a dit, que Dieu a préparé la terre
au temps eternal. La Genese
nous fera voir cette fondation de
terre, & comme elle sert de bor-
nes à la mer, ne faut que consi-
derer dextrement les paroles de
Moyse: car comme Dieu a donné
la sapience aux anciens, il veut
que nous ayons la prudence
pour nous sçauoir seruir de leurs

Job, 12.

paroles: aussi vn Prophete disoit,
 que la sapience est aux anciens,
 & la prudence au temps, l'Es-
 criture disant, *in principio creauit*
Deus cælum & terram, ne dit pas
 Dieu a créé la mer, ny Dieu a
 créé l'air, ny Dieu a créé le feu;
 & quand elle dict que Dieu crea
 la lumiere, ne nomme que deux
 astres, le Soleil & la Lune; quand
 elle dit que Dieu crea les pois-
 sons, ne parle en special que des
 Balaines, se contentant de par-
 ler des choses plus principales,
 soubz lesquelles les moins prin-
 cipales s'entendent: aussi quand
 la mesme Escriture parle du fir-
 mament qui fust mis au milieu
 des eaux, pour les diuiser, en re-
 tenant vne partie hors de leur

Ps. 148.

Dan. 3.

centre, desquelles le psalmiste
 dit avec vn autre Prophete, &
 les eaux qui sont sur le ciel, elle
 ne dit rien du firmament, qui di-
 uise de feu à feu, en retenant

vne partie fous la terre, comme l'autre firmament tient vne partie d'eau sur les cieux: toutes-fois ce que l'Eſcriture ne dit clairement en vn lieu, elle le declare en d'autres. Ainſi diuers Prophe-tes diſent, que Dieu a créé la mer, l'air & le feu, & diuers autres ont dit, que Dieu enuoye en Enfer & en r'apelle, & quoy que ces paroles d'enuoyer en Enfer & r'appeller ſe puiſſent entendre de la Juſtice de Dieu, qui mena les ames des Peres aux Limbes, & de ſa miſericorde qui les entira, & quoy qu'on entende encor ces paroles, de l'entrée que l'ame faiſt en Enfer, par conſideration: ſi eſt-ce neantmoins qu'elles ſemblent plus preciſement dire, que Dieu enuoya aux Enfers les choſes peſantes par le moyen de leur grauité, & retracta ce mandement quoy qu'il ne ſe retracte non plus qu'il

serrepent, mais pour parler aux termes de l'Escripture, retracta par la nature de congelation, ce qui estoit ordonné par nature de gratuité ; & des autres lieux de l'Escripture declarent, qu'au lieu de la terre, plus graue qui est son centre, il y a du feu pour punir les damnés : mais pour mieux entendre cecy, disons, que Dieu crea la premiere & vniuerselle matiere du monde en vn instant, avec sa volonté qui est en luy, non seulement parole pour commander, mais main pour effectuer. Dans cette matiere fust crée à mesme instât la nature par l'entremise de laquelle Dieu perfectiona le monde avec extention de temps : car ce que Dieu faict avec temps, ce faict par le moyen de la nature crée qui agist avec temps, & ce que Dieu faict sans la nature crée le faict sans temps. Le

Verbe Diuin ne fust pas incarné par succession de temps, & le Verbe incarné, n'est pas produit à l'Eucharistie en temps: mais en la formation du monde l'Ecriture nous assure, qu'il y eust diuers iours & continuation de temps, dont s'ensuit que cette disposition se faisoit, par le moyen de la nature ja créée; aussi ne se parle il point de creation, que au commencement, où il est dit, que Dieu crea le ciel & la terre, mais l'Ecriture dit faire ou produire, voire l'Ecriture mesme monstre que le faire ou produire, n'est pas créer proprement: car parlant de la creation des poissons, elle dit que Dieu dit, que la mer les produise; & quoy qu'apres elle die, que Dieu les crea, on voit que cette creation ne s'entend que de la formation de la matiere de l'eau, non de sa

production ou creation ; car quoy que la nature soit le commun moyen & instrument, duquel Dieu se sert, ce n'est pas neantmoins le moyen seul, se reservant vne puissance extraordinaire pour les occasions. Ainsi sans ordre de nature, il fist arrester le Soleil en faueur de Iosué, ainsi le rendist il tenebreux sans entremise de la nature, pour pleurer la mort de son fils, aux eaux du deluge on n'y cognoit point de causes natureles. La nature peut creer & produire de petits animaux, puis que la terre engendre des vers, l'air de mouches, l'eau de Serpents, & le feu de pirabruches: mais elle ne produict pas des gros animaux: c'est pourquoy Dieu commanda à Noe d'en mettre dans l'arche, & c'est pourquoy la Genese dict, que Dieu crea les Balaines, comme ne pouuant la nature leur

donner le premier estre , quoy que l'eau en contint la matiere. De l'homme l'Escripture dit aussi, que Dieu le crea, comme estant ce vn ouurage qui ne dependoit pas de la nature, ne pouuant elle créer l'Image de son auteur. Et ainsi ayant la nature son pouuoir limité & diuers, donnant à des choses qu'il y a la matiere seule, & à d'autres là matiere & la forme, ainsi elle est limitée en la grauité & legereté qu'elle dōne aux Elements; la nature donne à l'eau vne grauité pour se rendre soubs l'air, & à la terre vn poix pour descendre soubs l'eau. La nature donna à l'air vne legereté pour monter sur l'eau, & au feu vne actiueté pour se guinder sur l'air: mais tout cela se faict en temps & avec des limitations. La terre a vne nature de grauité, mais elle en a vne autre de congelation, endarcisse-

ment , conglutination & connection , & Dieu se sert de ces diuerſes natures , pour instrument de sa sagesse , comme vn homme se sert de diuers instruments pour vn ou diuers offices. Le terme de la grauité & location de la terre, fust preuenue par le terme d'endurcissement, sans lequel elle se seroit toute cachée sous l'eau. C'est endurcissement & connection de parties de la terre empescha son entiere location , en retenant vne partie hors de son centre , en quoy paroist la tres-grande sagesse de Dieu, qui par sa toute bonté & puissance absoluë gouuerna si bien & si dextrement ces puissances de nature , qu'il demeura de terre hors de l'eau tant qu'il en faloit pour l'habitation & nourriture des hommes , laissant tant de feu sous la terre qu'il en faloit pour punir les meschans, &

purger les bons ; tant de vent en
 ses entrailles , qu'il en estoit be-
 soin, pour de temps en temps se
 faire craindre aux hommes ; tant
 de feu à la superficie de la terre
 qu'il en estoit besoin , pour
 la nécessité de la vie : & pe-
 sant la terre avec sa balance, cō-
 me dit Iob , & la mesurant avec Iob. 28.
 sa mesure, laissa à la terre la iuste
 concavité qu'il falloit, pour con-
 tenir les eaux que le firmament
 n'auoit retenuës sur les cieux, les-
 quelles furent données à la iuste
 mesure qu'il estoit besoin pour
 les nauigations , pour la nourri-
 ture du poisson necessaire à nour-
 rir l'homme , pour l'arrosement
 de la terre, avec les pluyes que le
 Soleil en tire, & avec les riuieres
 que la pluye faict moyennant les
 fontaines. Cette profondeur de
 valées sous l'eau & esleuations
 de montaignes sur la mer, est vne
 des merueilles que Dieu fait en la

terre, la tenant avec trois doigts comme dit Esaye, l'un de ces trois doigts fust en cette merueille, que le psalmiste disoit, que

Pf. 135. Dieu a firmé la terre sur les eaux; vne autre de ces merueilles est, qu'elle ne tourne point,

Pf. 100. comme dit le mesme psalmiste, disant qu'elle ne s'inclinera pas au siecle des siecles; & l'autre de ces merueilles est, le mouue-

Iob. 9. ment admirable, duquel Iob dit, que Dieu le m'eust de son lieu: ces trois merueilles, sont les effects des trois doigts de Dieu.

Et cela a donné tant d'admiration à vn autre Prophete, que pour chacune de ces merueilles

Ier. 22. donna vn cry. C'est Hieremie qui crie trois fois, terre, terre, terre, escoute la parole de Dieu, comme s'il eust dit: hommes de la terre, par la merueille que Dieu a faicte à la terre, le mouvement pour la fertiliser, ne mesprisez pas sa pa-

role. Par le miracle avec lequel il tient la terre avec des gonds forts, ne mesprifez pas ses commandemens ; par les prodigieux effects de sa main, avec laquelle il donne place aux montagnes dans la Sphere de l'air, escontés-le, obeyffez-le, & ayez le tout ensemble. Il falloit que la terre eust vne marque trine de la main puissante de Dieu, aussi bien comme les choses d'icy-bas ont quelque marque de trois. Les vegetaux ont trois principes, que le feu ne peut dissiper, ny l'homme entendre, sel, soulfre, & mercure : les mineraux ont metal, chaux, & verre, les animaux ont cette marque en l'ame & au corps, ayant au corps les trois principes des plantes, & en l'ame vegetation, sentiment & mouuement. L'homme, creature plus noble, outre les deux marques trines de l'animal en a deux,

en l'ame raisonnable, ayant la trine faculté d'entendre, vouloir & se souuenir, & la trine grace des vertus diuines, foy, esperance & charité. La terre recognust les trois miracles, desquels Dieu la decorée, quand pour action de graces de ce qu'il la tient avec trois doigts luy deputa vne triade de Rois, pour donner vn trine present à son fils humanisé.

Si ie n'auois peur de desplaire à ceux qui donnent trop de credit aux Astrologues, qui avec leurs mesures veulent mesurer la puissance de Dieu; & si ie n'auois peur d'offencer, ceux qui croyēt plus à ce qu'ils voyent avec les yeux corporels, à trauers de corps, qui peuuent tromper la veuë, qu'au tesmoignage de l'Apotre, qui dit qu'estant rauy iusques au troisieme ciel, il fust porté, en Paradis, ie montrerois cette trine marque de Dieu, au

nombre des cieux : mais puis que ces mesureurs d'astres, qui faisant semblant de magnifier la puissance de Dieu par l'establisement d'une grande multitude de cieux, ont eux mesmes estably leur gloire, & tellementz authorisé leur art, que peu s'en faut que nous ne captiuions nos volontés sous leur sçauoir, ie me contenteray de faire voir en peu de paroles,

Que nos yeux voyent différentes les choses selon la matiere par ou la veüe passe, & selon la forme de cette matiere se pouuant tromper à la veüe des astres.

CHAP. VIII.

QVoy que l'eau soit transparente, & autāt diaphane que l'air, lors qu'elle est pure, estant chose asseurée que si n'estoit le sel

& les ondes on verroit le fonds de la mer, si est-ce que ce qu'on voit à trauers l'eau, se voit d'une grandeur differente à ce qu'on voit à trauers l'air. Si on plonge la moitié d'un baston esgalemēt droit dans l'eau, cette moitié qui est dans l'eau semble plus courte & plus grosse, voire sa rectitude ne s'accorde pas avec la moitié sèche, faisant un angle en l'entre-deux, & ainsi mesurant de loing, ce qui est dans l'eau sans le toucher, comme on mesure les astres on se tromperoit à la mesure. Si on met une boule dans l'eau, & une autre de mesme grosseur hors de l'eau, à mesme distance de nostre oeil, l'une semblera grosse & prochaine, & l'autre petite & esloignée, tellement que l'une occupera une grande partie de la circonference de nostre veüe, & l'autre n'en occupera que fort peu, qui est deccevoir

la veuë & les instrumens, avec lesquels nous voudrions mesurer ces globes de loing : car si l'un sembloit estre plus gros, pour sembler estre plus loing, en la mode qu'une chandelle de suif semble une grosse tour, si estant sur une fenestre on se figure qu'elle soit à une lieuë loing, il pourroit estre qu'il n'y eust pas de la deception, & que tant occupast l'une comme l'autre de la circonference de la veuë : mais en la mode qu'on voit cette difference, il n'y peut auoir que beaucoup de deception. Et non seulement l'eau deçoit la veuë, mais aussi la crassitude de l'air : car nous voyons d'une grandeur la Lune, lors qu'elle commence à monter sur nostre orison, la voyant à trauers l'air nubileux qui voisine la terre, & lors qu'elle est montée haut, la voyons d'une autre grandeur, & le Soleil

de mesme, occupant beaucoup moins de la circonference de nostre veuë, lors qu'ils sont haut que lors qu'ils viennent d'estre leués. Et pour le dire plus intelligiblement, voicy vn exemple; Quand la Lune se leue, esloignant la main de nostre œil, & mettant vn doigt droit la Lune, il sera besoin toute la largeur du doigt, pour en empescher la veuë & la regardent à midy, mettant la main à mesme proportion, ne faut pas pour empescher de voir la Lune, la moitié de la largeur du doigt, en quoy nous voyons que la crassitude de l'air faict paroistre les choses d'autre grandeur. Et non seulement nostre veuë est trompée par la differēce des matieres, par lesquelles elle passe: mais aussi par la difference des formes ou superficies. Car quoy que le cristal ou le verre ayant leur superficie plaine ou

esgale, estant esgalement espés, facent voir les choses en la grandeur qu'elles ont, neantmoins quand cette superficie est globeuse ou concaue, la veuë est deceuë. Les Lunettes concaues font paroistre les choses plus petites qu'elles ne sont, & les Lunettes globeuses, les monstrent plus grandes; voire il y a des Lunettes, que regardées par vn costé monstrent les choses grandes, & regardées par vn autre, les monstrent petites. Avec la Lunette que les Mariniers appellent de longue veuë inuentée depuis peu de temps, regardant des hommes esloignez par vn bout, ils sembleroit de Geants, qui sont tout contre nous, & si nous le regardons par l'autre bout sembleront de pigmées tres-esloignez.

Les Lunetes globeuses, qui sont les plus ordinaires, mises prés

de nostre œil, monstrent les choses plus grosses qu'elles ne sont; & mises deux ou trois pans loing, monstrent les choses renuersées de haut en bas, & de bas en haut, & les Lunettes concaues ou de courte veuë monstrent les choses à vn autre lieu qu'elles ne sont, les voyant d'vn mesme œil à trauers la Lunette, & hors la Lunette.

Or pour regarder les astres, nostre veuë passe par des matieres, lesquelles nous ne sçauons comment elles monstrent ce qu'on voit à leur trauers, ne sçachant ce que nous auons dit de l'eau, que par experience. Nostre veuë passe encor par de corps concaues & globeux, & nous ne sçauons à qu'elle proportion cette concauité & globosité nous faict voir les choses : car nous ne sçaurions qu'elle concauité il faut à la Lunete, que
par

par vne grande experience, n'y ayant que les maistres qui les font qui le sçachent, voire on n'a sceu la vertu de la Lunette, de longue veuë iusques à nostre siecle. Et si les orbes du feu & de l'air sont globeuses d'un costé, & concaues de l'autre, comme le ciel de la Lune & les autres encor, si nous ne sçauons qu'elle est la grandeur de ces superficies globeuses & concaues, ne sçachant combien est haute le Sphe-
re du feu, de qu'elle grandeur la matiere du feu nous monstre les choses, encor qu'elle fust de superficie pleine, si les choses qu'on voit peuuent auoir de qualités qui deçoient nostre veuë, aussi bien comme les choses à trauers desquelles elle void, n'y a il pas du danger que nous nous trômpions en la quantité des astres, & par consequant en la proximité, n'y a il pas du

2. Cor.
12.

doubte qu'on se trompe, au nombre des cieux, inferant ce nombre avec de comptes & des mesures fondées sur vne veuë si incertaine? & sur de reueries d'un faiseur d'Idées phantastiques? & ne vaut il pas mieux croire l'Apostre qui parle des cieux, y ayant esté rauy par l'esprit de Dieu, que à ceux qui veulent mesurer les cieux avec des mesures incertaines, & sans ordre ny mesure? Quand ils n'ont treuvé aucune voix pour deceuoir nos oreilles, & nous faire croire leur musique du mouuement des cieux, ils ont trompé nos yeux, pour nous en faire croire la multiplicité. Je n'en diray pas autre chose, me contentant d'en auoir dit ces raisons, & me remettant à ce que les doctes croient, & enseignent du nombre des cieux; aussi ce n'est pas avec la quantité & proximité,

que les astronomes donnent aux astres, qu'ils font plus de mal: mais avec la qualité qu'ils leur attribuent, & qu'ils se disent cognoistre. C'est avec cette qualité & vertu attribuée aux astres qu'ils deçoient plusieurs esprits, & ainsi ie m'arresteroy vn peu d'auantage, à faire voir les erreurs, avec lesquelles ils font errer les autres, que ie ne me suis detenu à l'erreur des mesures, apres auoir fait vn autre tour par les eaux monstrant,

Que les fontaines ne peuuent venir de la mer que par les playes, & qu'elles sont aussi chaudes en Esté qu'en Hyuer.

CHAP. IX.

IL n'y a point de doubte que la superficie de la mer ne soit également distante du centre, & que chaque partie d'icelle

n'aye vne rondeur proportionée à la rondeur vniuerselle de toute la mer, hors de laquelle rondeur, sont non seulement les montagnes, mais aussi toute la superficie de la terre descouuerte, iusques aux plus basses vallées, puis qu'il n'y a lieu en la terre, dont les eaux ne descendent en la mer. Or si la nature de l'eau est de descendre, comme toutes les raisons Physiques & Mathematiques nous font voir, & qu'elle ne monte iamais plus haut que sa source, quoy qu'on le face monter dans vn canal pressé, autant comme elle est descenduë, à quel propos pourroit on dire, que dans les entrailles de la terre elle puisse prendre vne montée, tant contre sa nature? Que le Soleil le face, il n'attire que par vapeur, immédiatement là où il n'y a rien qui empesche: mais que le Soleil fist

venir l'eau de la mer à des fontaines, qui en sont cent lieues loin, qui croiroit cela? mesmes que la montée de c'est eau seroit plus grande que la descente des riuieres, lesquelles ne descendent qu'à la superficie de la mer, & ces fontaines faudroit qui vinssent du fonds d'icelle, venant par les veines de la terre, comme on veut dire, & quand bien il y auroit quelque cause naturelle, qui ainsi attirast l'eau des fontaines de la mer à la superficie de la terre, chose qui ne peut estre; il y auroit vn autre empeschement, qui est l'endurcissement de la terre, qui ne permet la sortie du vent enclos que rarement, lors que la terre tremble, n'y du feu qui fait les eaux chaudes, si ce n'est en quelque lieu comme au mont Ethna. C'est endurcissement de terre retient l'eau de pluye, que la terre superficielle

& non endurcie a beuë comme esponge, la faisant sortir avec la mesure des sources qu'elle treuve, chose tres-bien cogneuë, & autant facile à entendre: comme il sera aisé & facile de faire voir que les fontaines sont aussi chaudes en Esté qu'en Hyuer.

Les Philosophes qui mettent de fondemens sur de superficies, & font des argumens sur de premieres apparences, pensent auoir bien preuë que l'eau des fontaines est plus chaude en Hyuer qu'en Esté, en disant qu'elle fume en Hyuer, & qu'en Esté on prend plaisir à la boire, comme plus froide que celle des riuieres; & pensant auoir bien preuëe & établie leur proposition, disant; que le froid que la terre reçoit en Hyuer la penetre durant le Printemps, & se treuve en ses entrailles en Esté, pour refroidir

l'eau des fontaines , & que le chaud faiſt le ſemblable en Eſté, pour les chauffer en Hyuer; mais ie ne ſçay comment ils oſent donner ces raiſons : car ſ'il y a de fontaines qui viennent d'un haue de profond , il y en a qui viennent de plus de ſix, & toutesfois auſſi froides ſont les vnes comme les autres ; ce qui ne ſeroit pas, ſi leur froideur venoit du froid de l'Hyuer, & leur chaleur du chaud de l'Eſté : car ſi les fontaines qui ont leur ſource trois haues ſous terre , reçoient dans ſix mois le froid de l'Hyuer, pour les refroidir en Eſté, & dans autres ſix mois , le chaud de l'Eſté, pour chauffer leur eau en Hyuer ; celles qui ont leur ſource ſix canes ſous terre, ne receuoient la chaleur que dans un an, & ainſi au lieu d'eſtre chaudes en Hyuer le ſeroient en Eſté, & au lieu d'eſtre froides en Eſté,

le feroient en Hyuer , & chaque saison auroit des fontaines chaudes & froides, selon leur profondeur, chose qu'on ne voit pas: mais si on voit fumer les fontaines en Hyuer & non en Esté; c'est que l'exalaison des fontaines ne se meslant facilement avec l'air froid, on la voit de mesme qu'on voit l'alcine des hommes, pour la mesme raison : & si on veut dire, que l'experience montre que l'eau des fontaines est chaude en Hyuer, & froide en Esté, c'est qu'elle est froide en Esté, en comparaison de l'air, qui en telle saison est chaud, & en comparaison de l'eau des rivières qui sont chaudes en Esté, à cause du Soleil : & est chaude en Hyuer, en comparaison de l'air froid & rivières gelées. Aussi ferme se tiendra vne masse de burre dans vne fontaine, en Esté qu'en Hyuer; estant esgalement

froide & chaude, en vne saison qu'en autre, quoy que l'air froid ou chaud de différentes saisons, les face sembler différentes. Si en Esté on se met de matin près d'une riuere, apres auoir demeuré à l'air froid des-habillé, on treuve l'eau chaude, & si on se met tout chaud partant des habits on la treuve froide, qu'est affés pour voir que les fontaines ne sont pas chaudes en Hyuer, & froides en Esté; & puis que nous sommes en propos d'eaux disons encor,

Comme il faut entendre la Genèse, quand elle dit que l'eau courgie sur la terre, & fust assemblée en vn lieu.

CHAP. X.

Toutes les fois que Dieu fait quelque chose, hors de la nature; c'est pour quelque grâd

bien, ou pour chastier quelque grand mal. Or que l'eau eut esté hors de son lieu naturel, puis que maintenant elle est au lieu sphérique, que la nature luy donne, & dire qu'il y eust de l'eau qui surmontast toute la terre, cela ne se peut croire d'eau pure; puis que desia les eaux qui deuoient demeurer sous les cieux auoient esté limitées, & mesurées par le firmament: & pesées
Cap. 28. comme dit Iob; mais pour voir la verité de l'Eseriture qui dit, que l'eau couuroit la terre, & pour la faire accorder avec la violence, que Dieu fait à la nature pour vn bien, & montrer à quel bien la nature s'opposoit: Il faut sçauoir que l'eau & l'air sont de leur nature fort socia-
bles, ainsi voyons nous que le Soleil tire l'eau en vapeur parmy l'air; voire elley monte sans Soleil & si detient, iusques à ce

qu'un air froid l'aye reduicte en gouttes, & disposée à la cheute. Or apres la creation, s'il n'y eust eu que la nature qui eust placé chaque Element en son lieu, l'eau & l'air eussent debattu long temps, leur separation, à cause de leur commune humidité & fluidité, & ainsi s'entretenant en meslange, tenoient la terre couuerte de cette espeece & vaporeuse confusion, la couurant & luy empeschant autant son fruct; comme eust faict l'eau pure; & l'Ecriture dit fort conuenablement, que l'eau couuroit la terre; parce que s'estoit l'eau qui luy donnoit empeschement, & non l'air qui estoit en son propre lieu, & luy estoit favorable. Et ainsi pour donner à la terre la fertilité, Dieu accelera l'ordre Psal. 30. de nature, pour vn bien, & assemble les eaux dans la mer: comme dans vn oultre, ainsi que

dit Daud, de mesme que pour vne autre merueille de Dieu, il dit; que Dieu mit de bornes à la terre. Quelques vns ont entendu, que les bornes desquelles ce Prophete parle, soyent de bornes avec lesquelles la mer se tienne contre sa nature hors de son centre naturel, se tenant plus haute que la terre, & plus haute en vn lieu qu'en autre, y ayant des môtagnes, comme en la ter-

re. Mais Iob declare les premieres de ces paroles de Daud, disant, que Dieu lia les eaux dans les nuées : & le mesme Daud declare les secondes, disant en vn autre lieu; que Dieu confirma la terre sous les eaux, chose qui ne se peut entendre, que de certe premiere confirmation de terre, voire quand au lieu susdit, il dict; que Dieu congrega les eaux, comme dans vn ouldre; il le dict, sortant de parler de la

Iob. 26.

Ps. 135.

creation; ayant dict, au verset precedent; que les eaux sont firmes avec la parole de Dieu. Iob Iob. 38. declare mieux cecy en vn autre lieu, où il dict, que Dieu ferma la mer avec de portes, lorsqu'avec vitesse & force, elle venoit comme sortant de la matrice, lors qu'il la vestit d'vne nuée, l'enveloppant d'vne obscurité, comme avec des drapeaux d'enfance: car puis que par la sortie de la matrice, on entend la naissance, & que la naissance de la mer se peust entendre, la sortie qu'elle fist d'avec les eaux, qui demeurent sur les cieux, par le moyen du firmament, que Dieu fist le secoud iour de la creation, aussi le naistre est comme vn second iour de creation, estant la generation comme le premier iour, & la naissance comme le second. Or le vestement de nuée que la mer auoit, venant de cette

naissance, estoit ce meflange d'air & d'eau, qui couuroit la terre: comme les dernieres de ces paroles du Prophete déclarent, disant ; que cette nuée estoit obscure & blanche, comme de drappeaux d'enfant. Blanc & obscur, est le propre de l'eau meflée avec de l'air, l'eau pure est transparente, & par consequant non obscure ; & ainsi ce qui couuroit la terre, hors des limites de la mer, n'estoit pas eau pure : mais vn meflange d'eau dans l'air, qui fust mis dans les limites de la mer & là inclus avec de portes, par la main de Dieu, pour n'en sortir qu'avec mesure, & à proportion qu'elle y entre ; ie dis avec mesure, parce que l'eau qui sort de la mer, par l'attraction du Soleil, passe par vn tamis de sel, que la puissance diuine a estendu sur la mer, & tissu d'une espaisseur si mesurée, qu'il n'épasse

pas plus d'eau qu'il en faut, pour remplir les fosses sans submerger les villes, pour réplir les riuieres sans submerger les chāps, & pour donner des nuées sans donner des tenebres. Le maistre de la patience cognoissoit cecy dans sa misere, quand il disoit; que celui qui tire les gouttes de la pluy^{Iob. 3.} ye les, espend à la mesure des gouphres. Vn autre Prophete disoit encor, que celui qui appelle les eaux de la mer, & les espend sur la face de la terre, doit estre appellé Seigneur & maistre^{Amos. 5.} pour cette oeuvre, quand ce ne seroit que pour ces merueilles qui sont aussi grandes à l'esprit humain, pour ce qu'il en cognoist comme petites au respect de ce qu'il en ignore. Le Soleil n'attire qu'en haut la nuée, & le vent ne la fait courir qu'à costé: mais ces deux puissances iointes conduisent la nuée par de carrieres

braisantes, dans lesquelles elles vont se treuuer à mesme temps dans la regiõ froide de l'air, pour estre conuerties en gouttes grosses, & sur la terre pour y tomber à plomb avec sa grauité. L'eau de la nature se veut mesler avec l'air, & pour c'est effect se conuertit en tres-petites parties, qui montent dans l'air, tant qu'elles le treuuent chaud, & le rencontrant froid s'arrestent, & emprefsent tellement que se ioignant & grossissant perdent la legereté, & tombant attirent & ioignent à soy les particules qu'elles rencontrent, se rendant gouttes de pluye. L'arrest de l'exalation par le froid se voit non seulement en la copelle de l'alambic, qui doit estre froide pour conuertir l'exalation en eau: mais nous emportons vn exēple en nous mesmes, qu'est; que si le cerueau est froid, l'exalation qui monte de l'esto-

mach est cōuertie en eau qui flue par le nés. Tout ceey est plain de merueilles de la bonté & sagesse de Dieu, opperées avec sa main, quelques fois avec la nature libre, & laissée en son cours ordinaire, quelquesfois avec la nature enfrenée, arrestée, auancée, ou gauchie, quelquesfois sans la nature, & quelques autresfois contre la nature mesme. Si la grauité de la terre n'eust esté arrestée, elle se fust cachée toute entiere sous la mer, si la congelation qui l'arresta n'eust esté gouvernée avec la main de Dieu; sa nature l'eust faite congeller tout à vn coup, & en esgale distance du centre, & ainsi n'y eust pas eu de lieu particulier pour la terre descouuerte, si Dieu n'eust prins la mesure & la balance pour diuiser ces lieux. La nature n'eust si bien accordé ses diuers actes. qu'elle n'eust laissez ces

lieux sans l'esgalité nécessaire, à ce que la terre & la mer fussent le soubstient & la vie de l'hōme.

La nature est vne belle creature, vne docte ouuriere & vne excellente maistresse. Ses actes sont suffisans pour nous raurir en admiration; mais Dieu ne s'attache pourtant pas à ses regles. Auec la nature libre, il nous donne les saisons & les fruiçts, auec la nature gauchie il fendist la mer, & le Iordain aux Hebrieux. Sans la nature, il leur donna du pain; & contre la nature il arresta le Soleil, pour leur donner vne victoire, aussi bien comme contre la nature, il fendist la terre pour englouttir d'Atā & Abirō. Si Dieu n'opperoit qu'auec la nature libre, & en son cours ordinaire, il ne recompenseroit les bons actes, n'y puniroit les mauuais de nostre volonté libre au bien & au mal, pour la d'spropor-

sion qu'il y a entre l'ouurage de Dieu, tres-bien ordonné, & la volonté de l'homme desordonnée & variable ; mais ceux qui ne cherchent n'y recognoissent la sagesse de Dieu que dans la nature, & qui veulent emprisonner sa puissance dans les bornes d'icelle, ne cognoissent pas cela, ils ne recognoissent l'art de peinture que dans le pinceau, ny le sçauoir du Medecin que dans le rasoir. Le pinceau delicat faict de beaux Images : mais dans la main d'un ignorât, ne fait qu'un confus charbonnemêt, & la plus subtile poincte du plus delicat pinceau n'a aucune comparaïson avec la subtilité & beauté de l'esprit, de celuy qui la faict & le fait traualier, & en sçauroit faire plusieurs, qu'il peut employer à diuers Images.

L'outis de Dieu est tres-beau, les generations & corruptions,

n'y a rien de plus admirable. L'artificieux organe de l'animal, en-
ferré dans la petitesse d'une for-
my, d'un mouscherō, & d'un ci-
rō, rien de plus merueilleux. La
grandeur de l'arbre abregée &
enclose, dans le petit germe de
son fruiet, riē de plus digne d'ad-
miration. L'ordre d'une si grande
multitude d'astres, & grandeur
des cieux, la diuersité d'animaux,
de vegeteaux, & de mineraux,
celà est si merueilleux, qu'une
partie de ces merueilles, captiue
les plus grands esprits; mais tout
cela n'est que l'outis, entre les
mains de celuy qui l'a faict, &
qui en peut faire d'autres, & qui
l'employant pour nostre com-
modité, le pourroit employer à
d'autres vsages. Et neantmoins
ily a des personnes que non seu-
lement veulent enclore la puis-
sance de Dieu dans la nature,
mais la nature dans l'art, comme

nous verrons cy apres ; mais il faut plustost satisfaire à la promesse cy-deuant faicte de faire voir,

Que les Astrologues, ne cognoissent le poinct des constellations si precisement cōme ils disent, n'y les effects d'icelles, en la sorte qu'ils nous veulent faire croire, & que la plus grande partie des promesses qu'ils font, sont vaines ou effectüées par le Diable.

CHAP. XI.

S'Il y a rien qui puisse induire au mal, c'est l'oppinion que nous auons, qu'il y a quelques particulieres causes qui nous y inclinent, & s'il y a rien qui nous y puisse porter si c'est l'oppinion que nous auōs d'y estre en quelque sorte, necessités; c'est pourquoy l'Enfer s'est tousiours seruy de ces moyēs, pour nous faire

offencer Dieu, nous confondant la preuoyance avec la predestinatiō, la science des choses avec leur cause, le vouloir primitif avec le vouloir consequant, & autres choses qui sont semblables en apparence & differentes en effect, deceuant les esprits simples. Et voyant qu'on luy abbat ses finesse, & qu'on se preuand contre ses cautelles, il a recours à d'autres astuces, qu'il enuelope dans les differences des cours des cieux, & difficultés à les cognoistre. Et comme il ne manque pas de supposts pour mettre en pratique les vnes de ces malices, il n'a pas faute de ceux qui mettent en jeu les autres; Sous pretexte que la cognoissāce des cours des Astres est bōne pour induire à la loüange de celuy qui les a mis en ordre, & pour cognoistre les tēps de semer & cueillir, on employe

cette cognoissance à s'acquérir de gloire pour soy, & pour soumettre nos volontés & nos fortunes & infortunes aux Astres. Et cela est tellement receu en pratique qu'on appelle les maux des desastres, & les mal-heureux desastrés. Si on dit à vn simple qui mene mauuaise vie, qu'il la doit chāger; il dira qu'il ne peut aller contre sa planette, il y a des autres qui mettent leurs filles Religieuses par force, par ce qu'un Astrologue leur a dict qu'elles sont nées sous la planette de Venus. Les plus doctes mesmes font tirer des Oroscoptes de leurs natiuitéz, & de celles de leurs enfans; & ceux qui deuroient fuyr cette peste d'esprits, plus que la peste mesme, authorisent leur mauuaise doctrine, les receuant en leurs maisons, les escoutant, les consultāt & les mettant en credit, & apel-

lent ignorans ceux qui mespri-
sent leurs opinions astrologi-
ques, & au lieu de cognoistre,
que Dieu permet bien souuent,
pour punition de leur mauuaise
croyance, que les maux qu'on
leur a predicts se verifient, pre-
nent cette verification pour as-
seurance de leur erreur. Sçachant
que la cognoissance du cours des
Astres est difficile, & que peu
de gens y montent, pour enre-
prendre les fautes, s'enflent tel-
lement avec leur Art, qu'ils se
font appeller deuins, & on passe
plus outre les appellans Diuins.
Ie leur veux monstrier par les pa-
roles Sacrées, qu'ils meritent
plustost le nom que S. Augustin
leur donnoit, & que le temps
avec sa sagesse a donné aux fols,
S. Augustin appeloit les Astro-
logues fatidiques: comme hom-
mes qui se iactent, de dire les
choses fortuittes, & les confon-
doit.

doit, avec des raisons si fortes, ayant cognu leur erreur en la secte de Manichée, qu'il les rendit tellement odieux au monde; que quand on voyoit vn fol, on l'appelloit fatidique, & la folie *fatuositas*, ou fatuité, d'où est venu qu'on appelle les Ineptes fats, comme semblans aux Astrologues ou fatidiques; nous verrons si ce nom leur appartient, par des passages de l'Ecriture, & par des raisons. Le Prophete dict, que Dieu compte les Estoiles, & les appelle par son nom, tous les noms estant bien imposés, denotent quelque qualité ou quelque vertu: ainsi Adam donna noms conuenables à toutes choses, puis que nous voyons encore, qu'au langage Hebrieu, les noms signifient les qualités des choses nommées, si Dieu donna nom à toutes les Estoiles, elles ont quelque qualité, si

Dieu seul les appelle par leur nom; Dieu seul sçait leur vertu, & est tellement jaloux de ce sçauoir; que Moyse ne declara pas seulement les noms du Soleil n'y de la Lune, ne les appellant que luminaire majeur & luminaire mineur. Or si la vertu des Astres, est de gouverner ce monde inferieur, & si Dieu regle ce gouvernement, avec vn grand nombre de millions d'Astres; de chacun desquels ils sçait les noms, ceux qui avec l'incogneuë cognoissance de sept Astres, desquels ils ne sçauent le nom, leur ayant imposé de noms d'hommes & femmes, veulent sçauoir & pensent enseigner la conduicte du monde, quel nom meritent ils? sera ce le nom de Deuin ou de Diuin ou l'autre? Deuin est nom de Prophete, qui dit les choses futures sans mentir, les disant avec l'esprit de Dieu, & non par art

d'Astres desquels ils ne sçauent les noms ; les nombres n'y les qualités ; de s'appeller Diuins cōme hommes de Dieu , si Dieu les commettoit à cet art de deuiner , il leur diroit le nom des Astres , auxquels ils donnent des noms de putains , & de meurtriers , tels qu'estoient Venus & Mars. Le troisieme nom que ie leur ay assigné , leur pourra competer non seulement du costé des Astres , par lesquels ils veulent deuiner : mais aussi du costé des hommes auxquels ils veulēt predire. Si les hommes sont en nombre de milliers de millions , & entre tous ces grands nombres , encore qu'on les multipliast par vn autre nombre si grand , comme il a passé de siecles : dans c'est incomprehensible nombre , ne s'en treuueroit pas deux qui ne feussent dissemblables en quelque chose , tant la varieté des Astres

est grande, n'est il pas fol, celuy qui dans vne si grande varieté de milions de milliers, & de millions de constellations, & de naissances, veut cognoistre la constellatiō de la naissance d'un particulier? S'il n'y auoit de differences d'hommes au monde, qu'en nombre de sept, ou de sept, multiplié par douze, que sont les nombres des planettes, qu'ils nomment comme il leur plaist, & des douze signes du Zodiac, qu'ils diuisent & nomment comme bon leur semble, leur erreur auroit quelque couleur: mais ils nous veulent mettre la difference de tout le monde, vne fois dans sept classes differentes, vne fois en douze, & vne autre fois en huiſtante quatre, quoy que tous les hommes soyent differents, & que iamais ils n'en aient veu deux semblables en vne de leurs classes. Saint Gregoire

cognoissoit leur erreur, quand pour la leur corriger, leur alléguoit la natiuité des Jumeaux, Iacob, & Esau, nés à mesme heure, & de differente condition.

Sainct Hierosme, dit, que les Astrologues sont ceux qui s'esleuent contre la science de Dieu; & en vn autre endroit, dict, que se sont eux qu'ignorant leur supplice, promettent le salut aux autres. Sainct Ambroise se moque d'eux, & Sainct Augustin, dict, qu'ils ont societé avec les Demons.

Hom. de
Epiph.
de astr.
In se-
phoniā.
super
Epiph.
27.
Libro 4.
Exame-
ron 4.
De doct.
Christ.
24.

Mais afin qu'ils cognoissent leur erreur, la leur faut monstrier en detail. Leur premiere faute, est d'auoir logé au ciel des animaux, avec leur propre nature, ne se contentant pas de ce les auoir imaginez, au lieu de quelques autres plus honestes figures, pour mesurer & distinguer les parties du Zodiac, & du reste

du ciel : mais ont donné à ces lieux imaginez, les qualitez des animaux, que leur imagination a enfantez dans le ciel, qu'est le mesme que dire, qu'un bataillon composé en forme de Lyon, auroit les qualitez de Lyon, & celuy qui seroit composé en forme de lieure, ne seroit bon qu'à fuir.

De cette erreur ils ont passé à vn autre, qu'est de faire difference de climats ; d'Orient en Occident, n'y ayant lieux en toute la terre, où les Astres s'arrestent plus qu'aux autres de la Zone de ce lieu, puis que le Zodiac est ambulatorioire, & va au branle du cours violant, d'Orient en Occident ; & ce cours n'a plus de commencement qu'un cercle. De donner aux figures du Zodiac, ce qui appartient au mouvement que le Soleil fait par le Zodiac,

s'escartant de la ligne *Æquinoxiale*, vne fois d'un costé vne fois d'un autre: Et dire que chaque signe donne difference de climats, du midy au Septentrion, encore s'abusent ils, & abusent ceux qui les croient: car si le signe de *Cancer*, passe par autre lieu que celui de *Capricorne*; toujours celui d'*Aries* & de la *Vierge*, passent par mesme chemin, & ainsi sont veus des planettes avec mesme proportion, & voyent la terre d'un mesme aspect, & ainsi des autres qui passent deux en mesme chemin; qu'elle plus grande erreur donc, que de donner un climat à *Cancer*, & un autre aux *Iumeaux*? & quel plus foible fondement peuuent ils donner à cette doctrine, que de l'establir sur l'experience si mal considerée?

Ils disent, que par vne longue experience, ils sçauent que vn

tel climat produict de gens de telle qualité & condition, & vn tel autre d'autres de telle, prenant la douzième partie pour le tout: De sorte qu'en qu'elle seule ville que ce soit diuisée en douze parties, ils treuueront la difference qu'ils disent. Vn tel homme disent ils, est né à vn tel climat, ou estant le Soleil à vn tel signe, & a telles qualités, donc ceux qui naistront au mesme signe, auront les qualités de l'autre, & l'esperience le nous faict voir, disent ils: mais ils ne veulent pas voir, que s'il en naist deux sous ce signe, qui ayent ces qualités, ou quelques vnes d'icelles, il en naissent trente qui ne les ont pas, les ayant contraires.

Si on leur demande pourquoy les fils d'Isaac estoient dissemblables; C'est disent ils, parce que les Astres influent en vn instant,

& ils nasquirét en diuers instans : mais voilà vne bien hardie ou-tre-cuidance , & vne bien superbe iactance , de dire qu'ils cognoissent les choses faictes en vn instant , estant les instants innu-merables dans vne seule heure. Quand ils tirent l'Oroscopé , ils demandent non seulement le moment de la natiuité ; mais l'heure, le iour, & le mois , ie ne veux pas leur parler d'instants, pour confondre leur iactance, les instants sont trop subtils. Ie ne veux pas leur parler de moments , qu'est vn temps plus estendu , mais ie leur veux parler de parties de temps , qui ont vne estenduë mesurable ; ils mesurent le temps en heures , minutes, secondes & tierces. La tierce est plus grande que le momēt, & le moment plus grand que l'instant , & par consequant il y a beaucoup plus d'instants que de

tierces. Or à l'heure, il y a seulement de tierces plus de deux cens mille, au iour plus de vingt-cinq millions, & à l'an plus d'un milion de millions, ils demandent en quel iour de l'an est né, & disent que l'instant donne les influences, qu'on voye s'ils ne se iactent pas de cognoistre plus d'un milion d'instans? il est bien vray qu'ils disent qu'ils cognoissent l'instant de la natiuité par les accidens qui viennent en la vie, & que par un accident, ils cognoissent les autres: mais tant plus ils veulent se monstrier doctes, tant plus donnent ils à cognoistre leur malicieuse ignorance, & leur superbe iactance: car si les instans donnent les influences, si à tous instans peuvent naistre des enfans, & à chaque enfant viennent diuers accidens, ne voyent ils pas qu'il y a plus de difficulté à cognoistre les effects,

par lesquels ils veulent cognoistre les causes, qu'à cognoistre les causes mesmes, puis que les causes ne sont en si grand nombre; quoy que en nombre de millions de millions. Ils ne veulent pas croire que la prouidence diuine pouruoye aux necessités humaines en detail, ny que sa sapience sçache nos plus menues actions, ny le nombre des animaux de la terre, ny des animaux de la mer, & veulent qu'on croye qu'ils sçauent des choses, qui sont en nombre de millions & de miliasses, & encor on se laisse abuser à leurs paroles.

Et puis que la multitude des Astres, desquels ils ne sçauent le nom, ny la multitude d'hōmes, desquels ils ne sçauent les conditions, estant tous differents, ny la multitude d'instants, desquels ils ne sçauent le nombre, ne leur peut faire confesser leur

ignorance, n'y accorder leur confusion: ie leur va dire que la natiuité n'est pas instantanée, & voir s'ils diront, que le premier membre qui naist reçoit l'influence, pour les autres, ou que chaque membre à la sienne, ou que toutes les influences du temps de la natiuité, sont suspenduës iusques au dernier instant. Je leur demanderay encor, pourquoy deux hommes qui meurent en duel, en mesme temps, & quelques fois en mesme âge, mesme affection, mesme malice, & sont nés en diuers temps & diuerses constellations, pourquoy sont ils morts de mesme mort? Je leur veux encor demander en la mort d'un grand, qui cause la mort de grand nombre de personnes, si la constellation seule de la natiuité de ce grand, en est cause, où les constellations des natiuités de tous

tes ensemble, s'ils me disent que la seule ie leur demanderay, qu'elle vertu naturelle à la constellation du grand, pour tirer à soy les autres, & si l'homme donne la nature à la constellatiō, ou la constellation à l'homme? Je croy que la honte les rendroit muets, de dire qu'à vne armée deffaiète chacun des morts y devoit mourir, par la vertu de la constellation de sa naissance, ie ne sçay s'ils oseront dire, que les constellations de mille hommes, qui sont nés en diuers tēps, se soyent accordées à produire leurs effects en vn mesme iour. S'ils disent, qu'il y a des constellations, qui regardent les hommes particuliers, & des autres qui regardent les climats; ie leur diray qu'on a veu des batailles, où vne armée a esté deffaiète, & les vaincus estoient de diuers climats, & les victorieux

aussi; voire du mesme climat des vaincus. Je leur veux encor demander, puis que les mesures des cours des Astres n'ont pas de proportion, avec les mesures des diuisions des Royaumes, pourquoy la constellation, qui a induict les François aux duels, n'a donné autres bornes à son influence, que les limites de France, ie leur fais cette demande, par ce qu'ils ne se sont pas contentés d'arrester les bonnes volontés, & rēdre perclus les bons desseins des particuliers : mais veulent rendre les nations entieres, subiectes au pouuoir d'une estoile, de laquelle ils ne sçauēt le nom ny la vertu. L'Enfer qui se preuaut de ces mauuaises doctrines, pour auancer le cours de nostre inclination au mal, & nous empecher de nous opposer à cette inclination, a faict dire à quelques vns, que les Empires

durent tant qu'une certaine Esttoile luit sur eux, que l'Esttoile qui regardoit les Perles, au temps de leur Empire, se changea sur les Medes, puis sur les Grecs, puis sur les Romains, des Romains aux Germains, & des Germains aux Iberes. Cette doctrine diabolique, fait mettre les armes bas, & les mains au sein, à ceux qui se disposeroient avec la vertu aux biens, & vraies benedictiōs du ciel. Cette doctrine artificielemēt semée aux cœurs auxquels elle peult faire plus de mal, a tellement affoiblis les nerfs & esnerués les forces des conduites, non seulement au tēporel : mais quelques fois en le spirituel, qu'on se laisse glisser au penchant de la mauvaise inclination sans aucun Arrest ; on se laisse porter au courant des changemens, sans s'y opposer. Et on decharge les

resnes & les timôs des Gouvernemés sur le rollemét des Astres. Il ne faut qu'un brin de cette peste ou poison de doctrine, pour enuenimer les mains qui nous gouvernent, les bras qui nous deffendent, & rendre perclus tout le corps; poison qui opere plus insensiblement que celuy de la Torpille. On croit que les Astres gouvernent tout sans le penser croire: mais seulement avec vne tacite & muete croyance, donnant du nés à ceux qui disent qu'il faille tenir bride dans les desuoyemens, n'y timon parmy les orages. On croit sans le penser croire, & on pense sans le croire penser, qu'il ne faut que laisser roller le Ciel, & ne s'opposer à ses courses, comme si le Ciel ne nous donnoit plustost les influences, selon la disposition de nos œuures, que suivant la necessité des Astres.

Pour oster encor le trop de credit qu'on donne aux Astres, ie vay cōtinuer mes interrogatiōs aux Astrologues, leur demandāt avec S. Ambroise, si les Apostres furentt sanctifiés par l'heure de leur naissance, où par l'aduenement de Iesus-Christ; ils ne seront pas si blasphemés de nier cette cause icy: mais ie croy biē que pour derniere preuue de l'infalibilité de leurs iugemens; ils dirōt que diuers Astrologues ont predict la mort de diuerses personnes, mais ie leur dis qu'il y a quelques vns qui predisent de malefices, ayant dit quelques paroles ou faits quelques signes, ou noeuds, ces malefices, viēent non par vertu de ces paroles ou noeuds, mais par permission diuine, en punition de la mauuaise croyance de ces instrumens du Diable, & de ceux qui s'en seruent, laquelle croyance estant

adaptée à d'autres signes, ou à d'autres paroles auroit les mesmes vertus, Dieu le permettant pour la mesme punition, & pour la mauuaise disposition de ces maleficiés, ou autres causes à nous incogneuës : & ainsi par la mesme permissiõ diuine, on voit l'accomplissement de quelques vnes de ces predictions d'Astrologues, quoy que non tousiours, & ce parce que le Diable se mesle le plus souuent en ces iugemens, & par la grande experience qu'il a de la iustice diuine, preuoit par coniecture de punitions, & chastimens par morts ou autres accidens.

Je vay encor demander aux Astrologues, pourquoy les astres ne produisent plustost leurs effects au temps de la conception, que la matiere est propre à receuoir impressiõs & formes, ou lors que les corps commen-

cent d'estre animés, qu'en la naissance en laquelle les corps sont desia formés ; & endurcis en la nature des Peres, leur organe est formée, & leurs os qui sont proportionnés aux autres parties du corps, sont incapables de reformation instantanée : ils diront que la conception & organisation se font dās les entrailles de la mere, où les influences celestes ne peuvent arriuer ; mais si ie leur dis, que puis que les Astres forment les mettaux dans vne montaigne dure & espesse, ils peuvent à plus forte raison porter les influences dās le petit corps d'une mere, que la clarté du Soleil penetrer, & que si les Astres peuvent en vn instant reformer les os d'un enfant naissant ; ils peuvent à plus forte raison penetrer la chair de la mere, que diront ils ? Si ie leur dis que le iour du Dimanche, ou tel autre

iour qu'on voudra nommer, est à mesme temps avec vne nuit de nos Antipodes, & ie leur demande quel de ces iours sera le Dimanche des Antipodes, ou celuy qui precede cette nuit, ou celuy qui la suit, que respondroit ils? car il est chose asseurée, que vn homme qui yroit aux Antipodes par Orient, arriuant là, auroit osté au Soleil douze heures de cours, & par consequant trouueroit le dernier iour estre le Dimanche, & celuy qui yroit par Occident, au contraire auroit donné autres douze heures, & trouueront le premier de ces iours estre le Dimanche, & si ie leur demâdois qui auroit plus de raison, ou celuy qui adepteroit le Soleil, planette du Dimâche au premier de ces iours, ou celuy qui au second, que respondroient ils?

Je les prie auant de respondre,

se souuenir que Dieu seul sçait le nom des Astres, qui sont en grand nombre, qu'il y a d'autant de sortes d'influances d'Astres, comme il y a des hommes au monde, puis que tous les hommes sont differens en quelque chose, que diuerses constellations donnent les qualités aux hommes, en la generation, en l'organisation, en la natiuité, & en la premiere capacité de raison, que la nature des Peres a plus de force que les Astres, puis que les fils d'un mesme pere sont semblables, quoy que nés en diuers temps, & plusieurs enfans nés en mesme heure ne se ressemblent en rien, estant fils de diuers Peres, qu'ils se souuiennent encore, que les matieres & les formes trompent la veüe, regardant les Astres, qu'ils sçachét de plus que les Astres, ne nous inclinent à rien de mauuais im-

mediatement : mais nous inclin-
nent à des choses bonnes, des-
quelles nous abusons. Toutes les
œuvres de Dieu, estoient fort
bonnes, & le peché originel nous
inclina à en abuser, & nostre per-
uerse volonté nous y porte; quoy
que libre, sans aucune nécessité
d'Aïtres n'y d'autres choses : tan-
dis qu'ils penseront à leurs res-
ponces, & à treuver des paroles
à leur accoustumée, propres à
amuser les oreilles, & non à
changer les verités, ie satisfairay
à ma promesse de faire voir,

*Que ceux qui pensant donner à l'Art,
ce qui n'appartient qu'à la nature,
veulent faire de l'or contre l'ordre,
avec lequel l'or entretient sa valeur
dans la rareté, s'abusent & abusent
les abusés.*

CHAP. XII.

SI l'art pouuoit imiter la natu-
re, à donner les formes sub-

stanciales aux choses, ce ne seront pas à la production des minéraux, qui se faiēt secrettement dans les entrailles de la terre, n'y à la production des animaux, auxquels l'art ne peut donner l'ame sensitive, ny disposer les matieres à la recevoir : mais ce seroit plustost aux vegetaux, puis qu'avec l'art on donne des accroissements, & non le sentiment, & qu'on sçait en quelle saison les plantes naissent, & dans combien de temps le grain est conuertty en germe, le germe en herbe, l'herbe en bois, le bois en fleur, & la fleur en fruit; ne sçachant en combien de temps, ny en quelle saison les metaux se forment en la terre. Et si la nature se laisse voir, approcher, & manier à l'Art, pour se moquant de luy, luy donner opinion de la tenir, & esperance de l'imiter, c'est à produire les vegetaux.

L'art fait les antes ; & nous auôs toutes les occasions de croire, que le greffe peut produire le fruit de la nature du tige, & cependant l'experience nous montre le contraire. L'art donne au greffed du premier blanc, la substance & seue du premier noir, cette seue sort des Peres du tige, entrant à des Peres tous semblables, puis que le plus subtil menuisier ne cognoit aucune différence au bois de ces deux arbres, & neantmoins la nature est tellement ialouse de ses operations, que par aucune addition de matiere, l'art ne luy faiët iamais produire de nouuelles formes, de nouuelles substances, ny voire de nouuelles qualitez. Chose estrange, que pouuant adjouster arbre à arbre, on ne puisse communiquer leurs qualitez, quoy que peu differentes ; bien que de deux bois separés, on en face

vn arbre de deux plantes diuer-
ses, vne seule , & de deux choses
croissantes, vn mesme vegetal.
Qu'elles choses plus semblables,
que poirier à poirier, pommier à
pommier , & pruniers à pruniers;
& qu'elles choses plus conjoin-
ctes & alliées que le tronc , avec
le greffe antés? Et avec tout celà,
tous les Philosophes du monde,
ne sçauroient faire qu'un poirier
produise de poires, autres que de
celles que la nature luy ordonne;
moins pourroient ils faire qu'un
prunier portast de serises , n'y vn
poirier de pommes, n'y qu'on fist
produire au grain du seigle la
plante du froment , choses qui
semblent si faciles. On peut voir
& manier le grain , duquel la
corruption est la generation de
la plante, & semble qu'on le peut
disposer à vn autre vertu d'en-
gendrer , luy changeant les qua-
lités avec l'art. Et neantmoins

quoy que ce qui semble si facile ne se puisse faire, les Alchimistes se iactent d'imiter la nature, à vn office qu'elle fai&t dans les profonds obscurs, & ferrés cachots des entrailles de la terre ; par des moy&es incognus, dans vn temps que nous ne sçauons, & d'vne matiere dont iamais nous n'auons eu la cognoissance, & non seulement veulent faire, qu'vn metal en produise vn autre : mais veulent qu'vn metal qui est esgal en ses parties, se multiplie comme le vegetal, qui a vny & r'acourcy son tout dans le germe, & comme l'animal qui a la puissance du tout en l'esperme.

Si l'art pouuoit produire quelques animaux, ce ne seroit pas des plus grands, puis que pour les conseruer, il fut commandé à Noé les enfermer dans l'Arche. Si l'art produisoit quelques plantes, ce ne seroient pas les plus

grandes ny les meilleures, puis qu'elles furent encor gardées dans l'Arche, pour estre replantées, estant asseuré que le mesme Noé planta la vigne apres le deluge. Si l'art faisoit des metaux, ce ne seroit pas l'argent ny l'or, qui sôt les principaux, & qui ont plus leur valeur en la rareté qu'en la qualité. Le fer a sa valeur en sa qualité, parce que sa dureté est necessaire à cultiuer la terre; l'argent a sa valeur en sa qualité, estant vtile pour sa legereté & patience au marteau, & encor en sa rareté, n'y en ayant tant comme de fer, ny tant comme de cuiure; mais l'or a plus sa valeur en sa rareté qu'en sa necessité, ny en son vtilité. L'or n'est si bon pour cultiuer la terre, n'y pour faire des armes comme le fer, n'estant si fort. L'or n'est si bon à faire de vaisselle comme l'argent, estant facheux en son

poix, plus graue que le plomb, difficile en sa fusion, & en la forge, & lache en sa force: tellement que s'il y en auoit autant que du fer, le fer seroit en beaucoup plus d'estime. Et puis que l'ora sa valeur en la rareté, la nature seroit ignorante de ne scauoir garder cette rareté, imprudente d'en donner la multiplication à l'Art, & imparfaicte, laissant le metal plus parfaict, sans sa principale perfection, qu'est la rareté; & l'auteur mesme de la nature, auroit laissé broncher sa sapience au pas plus important. Il fait toutes choses, avec tant de poix & de mesure, qu'il y a tant d'abondance de fer, quel est besoin pour cultiuer la terre, & pour se deffendre; tant de cuiure qu'il est besoin pour les vstensilles, qui doiuent resister au feu, tant d'estain qu'il faut pour la vaisselle qui sert hors du

feu , tant d'argent qu'il faut pour honorer les vertus , tant d'or qu'il faut pour exiter & salarier la vertu , & tant de rareté à l'or qu'il est besoin , afin qu'il ne perde son pris , & que ce pris est le ressort , qui fait regner les Roys , & qui fait communiquer les biens d'un pays à un autre. Et si la tres-parfaicte sapience diuine , auoit manqué à la conseruation de cette piece si importante , n'auroit elle pas faicte vne nature manchote du bras dextre , boiteuse du pied droict , auetgle de l'œil , qui doit estre plus clair voyant , & deffaillante au besoin ? Et neantmoins ces faiseurs d'or , seiactent de sçauoir faire de l'or , les vns d'une façon , & les autres d'un autre. Les vns disent que tous les metaux sont or : mais que la nature ne les a pas acheués , & ne voyent pas que chaque metal a sa forme intrin-

seque du ciel, aussi bien comme chaque espee de plante. & d'animal. Les autres disent, que l'or est venu à sa perfection, & que l'argent y a vn acheminement, & ne voyent pas que si cela estoit les metaux, qui s'aprochent plus de la grauité de l'or, seroient les plus près de sa perfection; & cependant nous voyons le plomb metal, plus imparfait & plus grossier, estre plus pesant que l'argent, l'estain, ny le cuiure. Les autres disent, que puis que tous les metaux, ont quelque peu d'or parmy eux, en effect; ils sont tous or en puissance, pour laquelle reduire en acte; ne faut que oster les empeschements, & donner les dispositions, & ne voyent pas que cōme la separation des Elements n'est pas si exacte, qu'il n'y aye du feu dans l'air & dans la terre, ainsi la separation des metaux,

ne se fait pas dans les entrailles de la terre, si exactement qu'il n'en demeure quelque partie d'un dans un autre. Les autres disent, que l'or est vne terre pure, desnée des autres Elements qui sont plus legers, & que pour cela il est si graue & pesant. Et ils ne voyent pas, que les metaux moins terrestres, plus crasseux & volages, comme le plomb qui se fond avec fort peu de feu, & le vis argēt duquel le fusio n'attend pas le feu n'y la chaleur, sont les plus pesans apres l'or. Et chaque Alchimiste a quelque raison nourrie dans le charbon, sechée dans la fumée, & cuitte en son four, a diuers degrés de chaleur; pour se jacter d'auoir treuvé la clef, mal gardée du cabinet de la nature. Si leurs jactances estoient veritables, les Roys ne feroient Roys; que tant qu'il plairroit aux Alchimistes, les

Marchands n'auroient que faire de courir, d'un bout de monde à l'autre, pour gagner & amasser de l'or ; s'ils n'auroient fait pacte avec les Alchimistes, qu'ils cacheroient le leur. Il n'y auroit Prince à marier, qui ne cherchast une fille d'Alchimiste : car si on fait tant d'estime des Indes, pour l'or qu'on y va querir, avec peine & danger à traverser les mers ; ie laisse à penser combien estimeroit-on des Indes, qu'on auroit dans la maison, & combien d'Alchimistes y auroit il, qui auroient des Indes & des Royaumes, s'ils pouuoient dérober à la nature, le secret de la production de l'or, & si Dieu n'auoit prohibé à la nature, de communiquer cette production à l'Art, avec lequel les Iniques veulent des biens sans de travaux, des Royaumes sans merites, n'y autres victoires que con-

tre le charbon , avec le feu , & avec leur cupidité melancholique, contre le saint ordre , que Dieu a estably en toutes choses, particulierement à l'or , qui avec sa iuste quantité , faict iouïr les ressorts du monde , avec vn pas mesuré & mouuement armonieux. Ils veulent auoir des Indes, sans trauerser autre mer, que de la charboniere , iusques au four, veulent auoir des honneurs sans exercer autre vertu, que remuer la melancholie , & veulent estre riches sans aucun trauail, au profit de la republique. Et quand ils voyent que tout leur Art se treuue court , pour arriuer à leurs indiscrettes pretensions, couurent leur ignorance, avec des suppositions trompeuses, avec lesquelles ils deçoient les personnes. Les vns cachent de poudre d'or, dans vne verge de fer creuse & serrée des deux

bouts, avec quelque metal fusible, & mis à la couleur du fer de cette verge, & avec icelle remuant la matiere, qu'ils ont mise dans leur copelle, cette poudre y tombe imperceptiblement; voire, sçauent si bien accommoder leur affaire, que l'ouuerture de leur baguette se treuve fermée, l'or en estant sorty. Des autres y mettent visiblement de poudre d'or, à laquelle ils ont osté la couleur, avec quelques eaux & poudres, voire pour le faire mieux mescognoistre, luy ostent la grauité le rendant feuilieux pour l'enfler, & ainsi est leger, à cause du gros volume qu'on luy donne.

Il y a eu des autres, qui ont fait de barres d'or si destrement couuertes de fer, qu'on les iugeoit estre toutes de fer, & mises au feu, iusques à ce que le fer est consommé & fondu, y met-

tent quelques poudres , qu'ils disent apres auoir conuertý le fer ou autre metal en or. Les autres coufent leurs fineſſes, avec de filet plus ſubtil, & faiſant cette barre, la laiſſent toute de fer en vn bout, & mettent la poudre ſur l'autre, font croire qu'elle c'eſt faiſte or, là où la poudre a touché. Des autres oſtent la fluýdité, & la couleur au Mercure, ou argent viſ, luy donnant apparéce d'or, avec l'artifice que bien ſouuent le Diable leur apprend: car quoy que tout l'Enfer, ne ſçache ny puiſſe enſeigner à faire de l'or, hors la commune regle de la nature; il ſçait neantmoins force ſecrets, pour donner aux metaux apparence d'or, à quoy l'Art peut arriuer, comme l'art des Conſiteurs, à faire des pommes avec de paſte de ſucre, qui ſont plus belles que les pommes naturelles, auſſi

coustent elles d'auantage. L'art de ces faiseurs d'or, ou multipliateurs d'or, est si artificiellemēt fardé, qu'ils osent s'attaquer aux plus grands esprits, & essayer à deceuoir quelques fois des plus grands Princes. On list d'vn certain appellé Bragadin, qu'auec son subtil artifice, tint vn temps les Venitiens, en esperance de pouuoir faire de mōtagnes d'or: mais à la fin son art se treuua au bout de la carriere, & sa meschanceté & malice furent decouuertes, voire nous n'auons pas eu manque en France de tels abuseurs, n'y de personnes qui ont creu trop facilement à leurs tromperies.

Je n'entends pas toutesfois, parlant des Alchimistes, blasmer ceux qui sans vouloir oster le mestier à la nature, tirent les essences des choses, pour aider à la Medecine avec leur art, les

tenant pour autant louables, cō-
me paresseux les Apoticaire
qui le mesprisent, en ayant la
cognoissance, aymant mieux dō-
ner les medicaments, dans vne
grosse & espee masse, qui in-
commode quelquesfois plus que
la vertu du medicament n'alege,
que donner le medicament pur
& net. Nous auons parlé des
mauuais ; disons maintenant
quelque chose de ceux qui pour-
roient estre meilleurs qui
ne sont, disant, puis que
nous sommes en
propos de me-
dicaments.



Que les Medecins pourroient donner des reigles aux vsages du feu, du pain, & du vin, lesquelles ils negligent.

C H A P. XIII.

Ce Chapitre a esté traduit de l'Espagnol, que ie donna aux Medecins de S. Iacques de Galice, dequoy j'ay voulu aduiser le Lecteur ; afin qu'il ne treuve estrange, que ie mette icy des loüanges des François, & du climat de France.

ARistote n'ayant rien, que ce que la nature luy auoit donné, & ayant esté né & nourry en vn climat meridional, abondoit tant en memoire pour se souuenir de ce qu'il auoit aprins de Platon, comme les Septentrionaux abondent en imagination, & les temperés en entendement; & pour auoir la melancolie aduſte, que son climat luy donnoit sylogisoit plus qu'il ne distinguoit, estant plus voyant en

auant, que circonſpect au tour.
Et ainſi dit, que les melancoliques aduſtes ſont fort ingenieux, ſans diſtinguer entre engin, qui vient de cette melancolie, & engin prouenant de temperature, & eſgalité d'humeurs. Car ſ'il euſt diſtingué de ces deux cauſes d'entendement, il euſt dit que celui qui eſt cauſé de melancolie aduſte, eſt en comparaïſon de l'autre, ce qu'eſt la lampe en cōparaïſon du Soleil, & la main en comparaïſon de l'œil, parce que comme la lampe, peut eſclairer quelques lieux, auxquels le Soleil ne peut atteindre, & la main peut toucher ce que l'œil ne peut voir, ainſi c'eſt entendement prouenant de melancolie, peut avec les poinctes aigues de la colere, voir quelques choſes, leſquelles l'entendement prouenant de bonne temperature, ignore pour auoir ſon action,

non oblique comme le Soleil & l'œil. Mais comme le Soleil à sa lumière vniuerselle, & l'œil son action sans limite, si ce n'est que quelque corps oppaque là luy empesche; ainsi l'entendement prouenant de bonne temperatu-
re, a sa veuë tant vniuerselle, cōme celuy de l'autre l'a limitée.

Il disoit encore, ce petit Payen & Philosophe, malade de melan-
colie, que le froid & le sec cau-
soient le bon entendement, &
disoit cela pour auoir veu quel-
ques Scithes (qui sont hommes
fort humides) & quelques Af-
fricains (qui sont fort chauds)
n'auoir tant d'entendement com-
me les Atheniens; & prouuoit
son dire; ou quelques autres
apres luy, disant que les hommes
vieux qui sont froids & secs, ont
plus d'entendement que les ieuf-
nes: toutesfois s'il eust veu les
choses esloignées, aussi bien

comme il inferoit les presentes, auxquelles sa veuë limitée s'arrestoit, il eust dit que l'entendement a besoin d'autant d'humidité, pour mittiguer l'impetuosité de la colere qui l'inquiete, comme de sec pour dissiper la flegme qu'il submerge, & que l'entendement veut le milieu entre les extremités de sec & humide, aussi bien cōme entre chaud & froid, ayant besoin de tant de chaleur, pour esueiller la stupidité de la melancolie : comme de froid, pour moderer l'inconstance du sang, & ainsi l'âge moyen, est aussi bon pour causer le bon entendement, comme la bonne temperature des climats. Et si les hommes vieux sont d'ordinaire prudents, est plus pour la memoire du passé, que pour l'intelligence du present.

Il disoit aussi, que les Meridionaux sont prudents, sans distin-

guer entre prudence & prudence, & sans dire que la prudence Meridionale (qu'on pourroit plustost appeller astuce) est tant desnüée de simplicité, comme la simplicité Septentrionale, que en beaucoup se peut appeller ignorance, est desnüée de prudence, & que les temperés sont esgalement prudents & simples.

Encore disoit-il, que la chaleur causela bonne imagination; & disoit, celle pour auoir veu quelques vns, que par des causes extraordinaires, comme fièvre, amour, ou vin, faisoient des actes d'imagination, cōme chanter, bien parler, & faire des vers; mais s'il eust veu tant de loin, avec l'entendement de bonne temperature, cōme il ne voyoit plus loin, que des termes cherchés, avec la lampe del'huile de la melan'olie, alumé avec le feu de la colere; il eust dict que l'hu-

midité fait la bonne imaginatiõ, c'est pourquoy les Septentrionaux, qui sont plus humides que les Meridionaux, sont propres & habilles à tous arts, & autres choses auxquelles est besoin l'imagination, & que si quelques Meridionaux font quelques vnes de ces choses & arts, par des causes chaudes, ces causes ne sõt immediates ny ordinaires: mais causent par accident vne humidité extraordinaire, dissoluant & liquifiant comme le feu, liquifie la cire, la humidité surphureuse, en laquelle abondent les Meridionaux, & est propre à la memoire: & ainsi liquifiée, fait par accident ce que la humidité acqueuse, en laquelle abondent le Septentrionaux, fait par nature.

Il disoit encore, sans se souuenir de son, *in medio consistit virtus*, que les Meridionaux sont plus vertueux que les Septentrion-

naux, pour auoir plus de lettres, & ne se souuenoit pas, que si les *Ægyptiens* appelloient barbares les *Scithes* n'escriuant rien, les *Scithes* appelloient vains les *Ægyptiens*, comme ayant la vertu en sa plume, ne laissant chose qu'ils n'escriuissent, iusques aux vies des nourrices, qui dōnoient le lait à leurs enfans: Et que les *Temperes* & *Mittoyens*, tels qu'estoient les *Druydes* & *Samothées* Gaulois, & autres de leur climat, comme mesprisant & la rusticité des vns, & la vanité des autres deffendoient les escrits vains, & escriuoient le necessaire à la conseruation de la vie, & de la vertu.

Il passoit encore plus outre, avec la loüange du climat Meridional; disant, que les melancoliques sont bons, pour Princes & pour Iuges, & ne consideroit pas que le trop de melancolie,

au lieu de donner maturité cause pourriture, & que les fruiçts ne sont pas d'ordinaire parfaicts, pour estre pourris ny pour estre verds : mais pour estre mœurs. Le trop de colere, au lieu de faire prudent, faiçt cauilleux, le trop de sang, au lieu de faire diligent faiçt inconstant, & le trop de flegme, au lieu de faire patiët & simple, faiçt ignorant & sot. Et celuy qui est temperé & proportionné aux quatre humeurs; comme sont ordinairement ceux de la moyenne Zonne, sans exclusion toutesfois de ceux qui en sont hors, est meur & sage, sans pourriture ny paresse, prudent sans dol, diligent sans inconstance, & simple sans ignorance, n'y ayant meilleure qualité que la moyenne, ny meilleure complexion que la temperée pour Superieurs : car le Prince regardera de bon œil le subieçt,

qui sera de son humeur, & le Iuge se passionnera , pour celuy qui sera du sien, comme se preuue au mesme Aristote, qui loüe les melancoliques adustes, pour estre luy mesme de la mesme cõplexion, & les Meridionaux l'estant luy mesme. Il faudroit que tous les Superieurs fussent d'humeur & qualité temperée, voire iusques aux Prelats : car quoy que Dieu dispence sur les regles de la nature, à ceux qui veulent seruir sa maison ; il ne seroit pas mauuais de choisir, en tant qu'il se pourroit, ceux de meilleure temperature & composition: car quoy que les temperés soient d'ordinaire au climat moyẽ, n'en manquent pas, quelques vns au midy & au Septentrion, de mesme qu'il y a quelques Intemperes, en la Zone du milieu, ainsi voyons nous qu'en Affricque, & Grenade terres Meridionales fu-

rent Saint Augustin, & le Pere Louis de Grenade, & en Angleterre & Escosse, terres Septentrionales, le venerable Bede & Escot, & en terres plus Meridionales, se treuua le Roy Daud, lequel en corps, couleur, forme & phisionomie, sembloit pluſtot à vn François Galician, Cantabre ou Asturian, nations tres temperées qu'a vn Palestin. Et si on ne ſuiuoit l'opinion de ce Philoſophe melancolique, qui n'eſtime que ceux qui le ſont comme luy, & que les offices importans ſe donnaſſent aux temperes, & les autres offices à ceux qui ont le naturel, pour les exercer conſultant en cette eſlection, les bons naturaliſtes, qui avec les ſignes de voix, de couleur, & de forme, peuuent cognoiſtre la difference de temperatures & complexions, les reſpublicques ſeroient mieux gou-

uernées, y ayant beaucoup de laboureurs, qui seroient meilleurs pour Juger, que beaucoup de ceux qui s'affient, pour iuger, & beaucoup de porte-faix qui seroient meilleurs Aduocats, que beaucoup de ceux qui suivent le Barreau.

Mais Aristote n'a pas esté seul, qui cherchant recoins, & sautant de terme en autre, avec la lampe de courte lumiere, ne voyoit ce qui voyent les tempestes, n'ayant cognu la cause du flux & reflux de l'Ocean, de l'arc en ciel, ny le vuide en nature, tant mal deffendu par soy, comme mal prouué par Anaxagoras; Car Plutarque & Platon ses cōpatriottes, l'un employant tant d'huile à la lampe exterieure, comme de melancolie en l'interieure, enfin ne sçait rien dire de bon ny de vray, de ce qui paroît en la face de la Lune, & l'autre

L'autre avec ses Idées donna à rire aux tempérés.

Toutes ces ignorances se peuvent pardonner à des hommes, auxquels manquoit la lumie-re surnaturelle, laquelle aide beaucoup à l'autre, & qui n'estoient nés à vn climat temperé, n'y auoient humé son air : mais que en vn temps clarifié, & en vn climat temperé, se argumente des choses superfructuellement; Je ne sçay à quoy donner la cause. On donne beaucoup de reme-des de chaud contre froid, de froid contre chaud, de feu contre humidité, & tout cela sans distinguer de froid à froid, de chaud à chaud, de feu à feu, & encore sans distinguer de temps, de lieux, n'y de personnes, sans donner aucune proportion entre actions & passions, & sans donner des exceptions aux regles generales, quand l'occasion le

demande, choses dequoy ie ne
veux parler en particulier, pour
n'estre de ma vocation seulemēt,
veux ie parler d'une chose, que
pour conseruer le salut corporel
de plusieurs, ne se doit taire,
qu'est le moyen de fuyr le dom-
mage de l'air, tres-humide de
cette terre; qui est plus nuisible
à ceux qui ne l'ont accoustumé,
que à ceux qui sont nés, & ont
vescu en iceluy: car quoy que
cette nuissiance ne se manifeste
aux premieres années, ne laisse
pas de se faire voir aux autres.

*Il parle
de S.
Jacques
de Ga-
lice.*

Aux pays humides, comme
sont les Septentrionaux, Dam-
nemarc, Pologne & autres, on
faict certains fourneaux ou estu-
ues avec tel artifice, que sans ap-
peller l'air de dehors, sechent
& chauffent celuy de la salle ou
chambre, & en Espagne pour
estre terre seche (si ce n'est en
quelques parties de Galice) on

n'a pas procuré ces feux ny remèdes contre l'humidité, si ce n'est aux villages de Galice, qui se preualent contre la humidité, ne donnant pas de sortie à la fumée avec des cheminées: mais laissent la fumée dedans, ne sortant que par les mesmes ouuvertures, par lesquelles l'air entre, qu'est la cause pourquoy les hommes viuent, plus aux villages qu'aux villes, ausquelles les maisons ont de cheminées. Car estant Galice en vn climat temperé & moyen, atteignant sa patrie Septentrionale, iusques à fort près de la ligne du milieu de quarante-cinq degrés, qu'est le iuste milieu entre deux extrémités de froid & chaud, duquel se glorifient les sages Chinois en Azie (appellant leur terre le jardin du milieu) & les prudents Gaulois en Europe: celuy qui naist & vid en cette terre a na-

naturellement bon entendement, & bon iugement. Et estant l'art, avec lequel se regissent ceux des villes, non né en la mesme terre, participe du peu de clarté de son origine.

Mais afin qu'on entende la faute qu'il y a en la mode de faire le feu aux maisons, faut noter que l'exalation du feu & la fumée menent avec soy beaucoup d'air, & parce que la nature n'endure pas beaucoup de vuide, ie ne dis pas rien de vuide comme Aristote, entre autant d'air par les portes ou fenestres, chose qu'on peut voir, en ce que l'air qui sort par la cheminée, fait aller les voiles d'un tournebroche, & si on serre les portes & fenestres, quant & quant la salle ou chambre se remplit de fumée, tellement que tât qu'on fait feu, faut que la salle soit plaine, ou de fumée ou d'air froid & humide,

en Hyuer, & infaiët, en temps de maladies.

Aucuns Phisiciens, ont donné quelques remedes à ces inconueniens, conseillant des brasiers avec du charbon: mais fuyât Sylla tombét en Caribde, estant beaucoup plus d'omageable l'humidité qui sort du charbon sans fumée, que celle qui vient avec l'air, quels fers ny verres qu'on sçache mettre au brasier, & quoy que le brasier fut allumé, auant de le mettre en la chambre.

Ce qu'on doit faire est vn souspiral, ouuerture ou pertuis près du foyer, qui vienne ou de la sale d'en bas, ou de celle du costé, ou de dehors, & quoy que les portes soyent ferrées, la fumée ne restera pas de sortir par la cheminée, parce qu'elle tirera de l'air, pour l'accompagner du dit pertuis, & quoy que on ouure les portes ou fenestres, l'air

n'entrera pas, si ce n'est qu'il vint de coup ou de force, ou que ces portes, ou fenestres demeurassent long temps ouuertes, parce que l'attraction que la fumée & exalation du feu a faicte, de ce trou prochain, est cause que ne font pas attraction des portes esloignées. Et en temps de peste, ou autres maladies contagieuses, que l'air est infaiët, n'y ayant chose qui plus attire l'air de dehors, que ce feu de cheminées communes, c'est air entre bien souuant avec l'infection des lieux prochains, & non seulement sert pour accôpagner la fumée, c'est air qui vient par ce pertuis : mais aussi à remplir le vuide qui se fait, avec la rarefaction que la chaleur fait de l'air : ayant le feu, deux actions contraires, l'une d'appeller l'air, & l'autre de le chasser, les ayant quelques fois routes deux, & des autres fois

seulement la attractiue, & cela selon la disposition du subiect qu'il consume, parce que si ce subiect est sans soulfhre, comme le charbon qui la perdu en la premiere vstion, ce subiect est consumé avec action vnique & non diuisée. Et quand ce subiect du feu a du soulfhre, comme ont peu ou prou, non seulement toutes les plantes (ordinaire aliment de cet Element) mais aussi les mineraux & animaux, n'estant passés par le feu, ce soulfhre pour auoir vne subtilité fort propre à se communiquer avec le feu, se ioinct avec luy en vn instant, se separant des autres corps, avec lesquels il est meslé, comme se void en la poudre à canon, en la destruction de laquelle y a deux actions instantanées, ou quasi instantanées du feu, vne par le moyen du sel, de se brusler en vn instant, & vne

autre par le moyen du soulfhre, de se veut ioindre avec le feu.

Et le bois, pour n'auoir tant de sel, comme on met en la poudre, ne donne tant d'actiuité au feu, que en vn instant le puisse dissiper, & prendre son soulfhre pour aliment plus actif: mais donne ce soulfhre avec la mesure de sa consommation, & cette mesure n'est pas si petite ny cet aliment si peu, que le feu ne soit forcé avec vne telle violâce, que l'air prochain est mené, iusques à sortir par la cheminée; quoy que fort haute, c'est la premiere actiō du feu, quand à mouuoir l'air. L'autre est de l'appeller par la chaleur, non pas immediatē, mais moyennant la rarefaction de l'air prochain. Ces deux actiōs du feu à mouuoir l'air se peuuent voir au four, où tandis qu'il y a du bois ardent, l'air entre par la partie basse de la porte, & sort

par la partie haute, chose que se void à l'œil, mettant quelques corps legers, comme paille ou papier en cette porte, ou bouche de four : car les mettant en bas elles entreront dedans, & les mettant haut, sortiront dehors.

L'action du feu, qui est seulement de mouuoir l'air par attraction, est quand le subiect est purgé de souldre comme est le charbon. De cette attraction & rarefactiō d'air (laquelle se prouue par les vétoufes) viēt l'un des dommages, que fait le feu de charbon, qui est de estoffer sans aucun remede, ceux qui demeurent avec luy en chambre serrée, cōme on a veu en diuerses parts, où on a treuue des morts en telles chambres, parce que l'air cōdencé par la chaleur, tirant à soy la superficie des corps de ceux cy, & leur ouurant les pores, tirant d'iceux beaucoup d'humidi-

té propre à espessir l'air condensé, en la mode que l'air de la ventouse attire la chair prochaine, comme plus flexible que le verre, & ceux cy ainsi extirés par dehors, & sechez par dedans, ont plus de besoin de respiration par dedans, laquelle leur manquant en qualité & en quantité meurent; c'est inconueniét vient aussi bien de la braise de bois, bruslé à l'ordinaire, comme du charbon estoffé à la charboniere: mais l'autre dommage, qui est seulement de troubler & charger la teste, & non tant dange-reux comme l'autre, ne vient que seulement de ce charbon estoffé, qui a vne fumée reserrée par le feu, n'ayant peu sortir de la charboniere, par les empeschements & couuertes de terre qu'on y met, & sortant cette fumée quoy que imperceptible, à cause de sa secheresse, avec vn

second feu entre en la teste, laquelle (comme preuue le sens de l'odorat) est capable de respiration , prend du cerueau l'humidité, que le feu luy auoit ostée, en la mode que le sel principe des plantes est gardé de la nature, que le ciel leur a donnée , recouure le soulfhre & mercure , que leur a esté osté, treuuant matiere pour eux ; & ainsi cette fumée seche beaucoup le cerueau, & le trouble avec sa qualité opacque, noire & melancolique: on remédie à tous ces inconueniens de feux, tant de bois cōme de charbon, avec l'ouuerture susdite, laquelle de plus faict, que la chambre se chauffe plus avec vne partie de bois qu'avec quatre , avec les cheminées communes.

Mais parce que ce nouveau moyen de faire de cheminées, semble ridicule, à qui ne l'a experimenté, ie veux dōner les preu-

ues suiuanes, comme plus claires que les susdites, faire vne de ces cheminées de cette nouuelle façon, chose fort facile & de moindre coust, que les fourneaux & estuues d'Alemagne; n'y les canons entre murailles, desquels se seruoient anciennement les Romains, & en temps humide, mettre vn linge tendu en la chambre où est cette cheminée, & en mettre vn autre de mesme poids à vne autre chambre, où il y aye vne des cheminées communes, dans deux iours le linge de cette icy pesera plus d'un once pour liure, plus que celui de l'autre, pour l'humidité qu'il aura, la mesme preuue se peut faire, mettant vne pierre de marbre à chacune de ces chambres, & l'vne se treuuera sèche & l'autre humide.

Et pour preuuer la rarefactiõ que fait la chaleur du feu, de l'air

prochain, on peut mettre vn linge ou autre drap seruant de porte en la chambre, où il y a vn brasier, & on verra que ce drap entrera par dedans, faisant place & ouurant à l'air qui entre. Ce ser- rer de porte avec vn drap, est en- cor vn remede, afin que ceux qui sont dedans ne s'estouffent. Pour le dommage qui vient du feu de charbon estouffé, quoy que la porte soit ouuerte; il y a vn au- tre remede, qu'est de mettre au brasier du fer ou du verre: mais s'il n'y est en grande quantité, il n'y sert de rien.

La nature & mode d'operer du fer, & du verre, à mitiguer, moderer, ou dissiper la fumée du charbon, ie le laisse à ceux qui ont tout leur temps pour esplu- cher la nature, ne la regardant, moy, que quelques heures du mois, pour recreation, & pour m'en seruir en choses plus serieu-

ses, & fuyr les maux que l'oyssivité cause.

Ce que ie veux seulement dire, est que l'air humide fait plus de dommage dans les maisons; particulieremēt, lors qu'on dort, que non pas dehors; & plus dans le corps avec la respiration, que par dehors, avec l'ouverture des pores, parce que d'ordinaire on fait dehors plus d'exercice, avec lequel l'humidité se dissipe, & dans la maison manquant l'exercice du cheminer, l'humidité fait aux corps humains, ce que nous voyons faire aux autres corps. Car nous voyons que les murailles & peintures, semblēt plus vieilles dans vn an en Compostelle, que en vingt en autres lieux; & les animaux plus sains & plus gras ont audit lieu plus mauuaise couleur, au poil & aux yeux, que les plus ma'ades & maigres en autres parts.

Et ces d'hôimages d'humidité aux corps humains , se peuvent fuyr avec cette mode de cheminées , chose fort facile , que outre cela sert d'Antidote aux maladies futures , & remede aux presentes : car les maladies ou playes causées d'humidité , comme sont les playes des iambes , se curent en chambres sechées avec ces faux , beaucoup plustost qu'aux autres : servant aussi ces cheminées , où l'air seché avec icelles à guarir les Epileptiques , quoy que dommageable aux phrenetiques , & ce n'est pas seulement du feu , qu'on neglige de donner de regles : mais on neglige d'enseigner,

*Quelles qualités doit auoir le pain
pour estre propre à la santé, &
comme il le faut apprester..*

CHAP. XIV.

ON tient pour regle genera-
le, que le pain crespé & le-
ger est le meilleur; mais elle n'est
pas tant generale, qu'elle n'aye
beaucoup d'exceptions. L'hon-
neur est le commun signe de la
vertu; & neantmoins bien sou-
uent l'honneur est sans vertu, &
procuré par autres voyes que
par la vertu; ainsi les signes qu'o-
nous donne, pour cognoistre vne
chose, nous trompent bien sou-
uent. Le pain qui est crespé, pour
estre bien paistry & moyenne-
ment leué, & léger pour estre
paistry avec fort peu d'eau, est
tres-propre à bien nourrir & à
conseruer la santé; mais quand
il est crespé, pour estre paistry

avec force eau, & leger à cause de sa grâde crespere & espongiosité, tel qu'on le voit aux villes, où on vent l'eau pour pain, c'est le seminaire de la faim, & l'entretien des maladies. Car quoy que leger, à cause de son espongiosité avant d'estre mangé, il estres-pesant estant à l'estomach, où il a perdu son espongiosité, gardant son humidité: car s'il se rēd espōgieux au four, c'est à cause de la chaleur violente, qui fait boüillir son eau, & se boüillon est arresté par l'endurcissement que le point de coction donne au pain, quasi en vn instant, sans perdre son humidité, & la chaleur de l'estomach n'a pas cette force, ny le pain cette disposition, tellement que le pain que nous estimions le plus leger, est le plus pesant estant mangé, & est plus impropre à chasser la faim, parce que la faim

vient d'humidité, & ce pain humide l'entretient, & ainsi il fait mal en sa qualité estant trop humide, & en sa trop grande quantité, parce qu'on en mange beaucoup plus que de l'autre: car s'il y a des choses humides qui rassassient, comme entre autres le potage, c'est parce que estant prestes à la digestion, la prompte conuersion en Chyle, fait qu'on est bien tost saoul, chose qui n'est pas au pain, n'y mesme au potage, & autres choses humides, sinõ au seul repas qu'õ les mange: car quoy qu'elles empeschent la faim du premier repas, elles disposent à celle des autres.

Le pain pour estre sain, doit estre fort paistry, & avec le moins d'eau qu'il est possible. Bien paistry, afin qu'il soit plus propre à digerer, avec peu d'eau, pour la raison desia dite, & afin que la

durté luy empesche le trop de fermentation : car le pain qui est trop leué, a perdu par vne exaltation qui s'en va, par le moyen de la crespere, vne partie ignée propre à chauffer l'estomach, & à faire digérer, & ainsi on doit prendre garde, que le pain ne soit pas trop leué, afin qu'il ne perde, se faisant aigre, ce que le vin perd se faisant vinaigre, qu'est la partie principale. Toute aigreur se fait par amission de partie, comme le lait qui vient aigre, parce qu'il se separe du beurre, & parce qu'il perd vne partie plus chaude, que le beurre, & le vin vient aigre perdant l'eau de vie.

Il faut toutesfois qu'il y aye au pain assez grande quantité de leuain, quoy qu'il doive estre peu leué : affin que le leuain face en l'estomach la fermentation & digestion commencée, & que ce que le pain perdrait, & enuoye-

roit à l'air par trop de fermentation, serue à la nourriture. Le pain qui est peu leué est encor de meilleur goust & appetit, ayant eette subtile partie que la fermentation luy oste & c'est appetit est cause, que l'estomach se dispose à le bien receuoir. Ce pain est bon à estre mangé frais, & vieux n'estant si visqueus & glutineus, comme celuy qui est paistry avec force eau, lequel estant mangé fort frais, se cōglutine comme cire. Ayant esté vn peu faict, a encor son humidité; & estant sec, est de tres-mauuaise digestion. comme la terre qui a esté mouillée & paistrie, est la plus dure, quād elle est seche. Ce qui m'a meu à rechercher ces differences de pain, est qu'estant vne fois malade à vne maison, où les Medecins sont payés par année, & non selon la quantité des maladies qu'ils curēt, vn Medec-

cin, me deffendit de manger du pain molet, & parce que non seulement au pain, mais en autres choses, il y a des diuerſes alterations, les vnes par amiſſion, & les autres par acquisition, nous pouuons dire vn mot,

*Des alterations du vin, & difference
entre les vins, tant naturels, &
non alterés, que alterés
& gaſtés.*

CHAP. XV.

LE vin ſe faiſt aigre perdant: mais il ſe faiſt tourné ou eſchaudé en acquerant, voire par des acquisitions de choſes auſſi différentes, comme le ſucré eſt différent de la boüe, & neantmoins on ne faiſt pas difference de vin tourné à vin eſchaudé, & on ne faiſt pas plus de difficulté de boire de l'vn que de l'autre. Le vin ſe tourne par acqui-

sition de la lie, ou fecez qu'est la plus mauuaise partie du vin, c'est pourquoy les vins ausquels on a changé de tonneau & osté la lie, ne se tournent pas, & le vin se eschaude par acquisition du tartre ou sel, meilleure partie du vin, c'est pourquoy le vin de diuerses années, n'a pas de goust perdant son sel, qui se conuertit en tartre, de ses vins le tourné est tres-mal sain, pour la partie vitiueuse qu'il a acquise; mais l'eschaudé n'a rien de mauuais, que ce sel, qui est la partie plus essentielle du vin, & quoy que par ce sel extraordinaire, le vin aye vn peu de mauuais goust, ne luy acquiert rien de mauuais, mais vne force, qui faiet qu'on le doit boire avec plus d'eau, tellemēt que beu sans eau, seroit dommageable, & n'y auroit rien de mal de sçauoir ces differences, non seulement des vins alterés; mais aussi

des naturels, selon les climats où ils naissent, afin qu'on ne obseruaſt pas en vn païs, les regles que les Medecins d'un autre, donnent pour l'vſage du vin.

Le vin d'Eſpagne, & de la partie Meridionale de France, pour auoir plus de ſel qu'il n'eſt beſoin, pour moderer & arreſter ſon huile, demeure en bas, ronge l'eſtomach, bruſle la melancolie, & enflâme la colere, qu'eſt la cauſe pourquoy les Eſpagnols ſont noirs & iaunes; le vin d'Allemagne & Picardie Septentrionale de France, pour n'auoir pas aſſez de ſel, pour le tenir fixe en ſa droite nature de vin, & temperer ſon huile, c'eſt huile montant en haut n'eſtant retenu, ains ſuivi du ſel pour eſtre peu, ne reſtant autre choſe, que le flegme, qui ne fait autre office, que d'eau, & tel vin, enyure plus que le vin d'Eſpagne, c'eſt pourquoy

les Alemans sont humides & grands mangeurs, comme ceux qui boient de l'eau, & s'en-yurent plus volontiers que les Espagnols, quoy qu'ils n'ayent pas tant de vin, & sont tellement subiects à celà, que leurs Loix deffendent aux Iuges de iuger apres-disner. Et comme le vin Septentrional, pour auoir peu de sel trouble le cerueau, le Meridional pour en auoir trop eschauffé les rains, & prouoque à luxure : c'est pourquoy les Espagnols n'osent frequenter les femmes, n'y les baïser en les salüant, & faut qu'ils tiennent leurs femmes & filles aussi recluses, comme en France les Religieuses; & avec tout cela on void plus d'enfans exposés en Espagne, en vne petite ville, qu'en France en trois grandes, n'y en Allemagne en six, & avec tout cela, il y a beaucoup moins de gens

gens qu'en France, leur donnant le vin, vne chaleur plus grande, que la nature ne veut pour la generation. Mais le vin de Gasconne, Quercy, Limosin, toute la Guienne, haut Languedoc, Dauphiné, riuere de Loire, & autres lieux de ce climat, est autant temperé & proportionné en ses qualités de froid & chaud, & en ses trois principes de sel, soulfre, & mercure, qu'il eschauffe l'estomach, dispose le manger à bonne nourriture, eschauffe le cerueau, purifie le sang au foye, rend apte à la generation, & non desordonné; c'est pourquoy il y a tant de gens en France, & sans troubler le cerueau, r'alegre le cœur.

I'ay mis icy ces vsages de feu, pain & vin, comme de choses desquelles on a besoin tous les iours; & desquelles la cognoissance en est plus necessaire, que

des medicaments desquels on n'a besoin si souvent, quoy qu'on mette tant de temps & d'estude, à leur variable cōposition, moins vtile que la disposition du feu & aliments ordinaires. l'acheueray ce traité parlant aux Heretiques, comme ie l'ay commencé avec les Athées : mais il faut plustost dire deux mots aux petits esprits, qui s'alambiquent la ceruelle à chercher la quadrature du cercle, & les mouuements perpetuels, leur montrant,

Que la quadrature du cercle, est impossible à treuuer par les mesures, & le mouuement infaisable, en la modo qu'on pense, qui est lateralement.

CHAP. XVI.

LA quadrature du cercle, est impossible par les seules me-

lures, non seulement parce que la ligne droite n'a point de proportion avec la courbe; mais aussi parce que la superficie du carré est esgallement droite aux petits, & aux grands carrés, & la courbitude de la superficie du rond, est differente selon la difference de la grandeur des ronds ou cercles. Vne partie de superficie du petit carré, & vn autre de la superficie du grand, estant esgales en longueur, le sont aussi en rectitude. Et deux lignes d'esgale longueur, l'une de la superficie d'un petit rond, & l'autre d'un grand sont differentes en courbitude, & puis que la superficie du carré est invariable, & celle du cercle est changeante, & qu'il n'y a point d'accord entre la constance & le changement, n'y entre l'estabilité & le mouvement, on ne peut accorder le carré avec le cercle,

& qui plus trauaille à cet accord, plus se confond.

On peut bien conuertir les figures, les vnes en autres, les trigones en tetragones, les pentagones en exagonas, & ainsi des autres consistant leur superficie en parties droictes; mais la figure ronde est tellement parfaite, que c'est la plus capable pour sa grandeur, la plus noble pour sa forme, ayant seule toute sa superficie esgalement distante du centre, elle seule a toute sa superficie, qui regarde le centre d'un regard droict. La seule figure ronde n'a point de semblable, quoy que toutes les figures angulaires soyent semblables en quelque chose. S'il y auoit quelque figure qui peut signifier & représenter la diuinité, le cercle seroit son Ieroglifique; aussi comme Dieu est incomprehen- sible par toutes les creatures,

Le cercle est incomprehensible, par toutes les autres figures, seulement la figure triangulaire, a des rapports & des accords avec la figure ronde, comme en Dieu la Trinité de personnes avec l'unité d'essēce; quoy qu'elles semblent fort contraires, estant la figure rōde la plus inclusive, plus capable, & plus parfaicte entre celles qui ne sont pas angulaires: Et la triangulaire est la plus exclusive & moins capable entre celles qui ne sont pas rondes. Le rond tiré dans le triangle, contient iustement iusques en son centre, vn tiers de ce qu'elle laisse au dehors, iusques au rond tiré au dehors du triangle. Le rōd tiré hors du triangle a iustement la moitié du diamettre de celuy qui est tiré au dehors: iustement vn tiers du contenu entre les deux ronds: & iustement vn quart du contenu dans le grand

ronde ; tellement que la figure triangulaire avec la ronde, nous representent vne essence indiuisible, au milieu de trois personnes non confusibles, & vne troisième personne, procedant de deux, desquelles l'une engendre l'autre. Le cercle tiré dans le triangle, laisse dehors trois petits triangles, vn en chasque tiers de l'entredeux des deux ronds. Ces petits triangles ont deux Angles imperfects, & vn parfait : & deux faces droictes & vne oblique ; & cela nous represente non seulement les attributs qu'on donne à toutes les personnes diuines : comme Eternité, immensité, & toute-puissance ; & les attributs particuliers qu'on dōne à chasque personne, comme la generation active au pere, la passive au fils, & la procession de tous au saint Esprit ; mais aussi ces triangles nous montrent les

attributs , lesquels quoy qu'ils conuiennent à toutes les personnes diuines, conuiennent neantmoins plus particulièrement à vne d'icelles : comme la charité au pere, la grace au fils, & la communication au saint Esprit; ainsi que chante l'Eglise le iour de la Feste de la Sainte Trinité. Le Pere se communique, le Fils se communique ; mais la communication est plus particulièrement propre au saint Esprit; & ainsi l'angle parfait regarde la communication du saint Esprit; & les autres qui ont vn côté de l'angle oblique, regardent les autres personnes. Le triangle est la premiere figure angulaire, n'y pouuant auoir aucune figure parfaite d'un n'y de deux angles , quoy que quelques vns aient inuenté les noms de Bigone & Monagone, & est tellemēt exclusive, que tirée dans le rōd,

elle contient beaucoup moins de la moitié du rond, ne contenant que iustement la moitié de la figure exagone, ou de six angles moins capable que la ronde. Comme le rond est symbole de perfection, le triangle est symbole de force, tant pour l'offensive, que pour la deffensive, ayant la pointe qu'il luy faut pour penetrer, & la force qu'il luy est besoin pour resister, le moyen de carrer le cercle, est tout autre que ne pensent ceux qui y travaillent, & toutesfois fort faisable, par le moyen du poix adiousté aux mesures. Il ne faut que prendre deux tables rondes, d'esgale espaisseur en toutes leurs parties, qui soient de matiere autant pesante en l'une partie qu'en l'autre, comme sont les metaux, particulierement l'or: & ces tables, ainsi esgalement especes entre elles, & chacune esgale-

ment espee en ses parties, chose qu'on peut preuuer, regardant si mettant leur centre sur vne pointe, elle demeure à niueau: ainsi esgales en faut carrer vne, roignant ce qui est besoin pour la rendre carrée, & ainsi carrée roigner l'autre au compas, iusques à ce que mises sur vne balance, elles se treuuent esgales au poix, ainsi esgalemēt especes, & esgalement pesentes, mises l'vne contre l'autre, en telle sorte que le centre de l'vne, soit le centre de l'autre. Il ne faut que mesurer la proportion qu'il y a entre la distance du centre, iusques à la superficie du rond, & la distance de cette superficie du rond, iusques au bout des angles du carré.

Auec cette proportion, on peut carrer les cercles, de quelle grandeur qu'ils soient. Je sçay bien qu'on pourra dire, qu'il se-

roit difficile de mesurer l'espe-
seur de ces tables, qu'il seroit dif-
ficile d'esgaler le poids de la ron-
de au poids de la carrée, sans en
quelque chose alterer la rōdeur,
& qu'il seroit difficile de mesurer
la proportion, qu'il y a entre la
distance de la superficie ronde au
centre, & de la superficie à l'an-
gle; mais ces difficultez ne re-
gardent pas l'art de la quadratu-
re, quand à la theorique, mais
quand à la pratique, laquelle ap-
partient plus à celuy qui la vou-
droit faire, qu'à celuy qui l'en-
seigne; & la quadrature du cer-
cle, est de si peu d'utilité à la
Geometrie, Architecture, n'y
autre chose, que ce que i'en dis,
est plus pour destourner de l'au-
tre quadrature impossible, que
pour induire à cette icy, avec
cette possibilité: venons aux
mouvements perpetuels, mon-
strant à ceux qui les cherchent.

Qu'il n'y a point de mouvemens perpetuels, laterals, n'y par art n'y par nature.

CHAP. XVII.

LA nature a si bien attaché la gravité aux corps pesans, que l'art ne la leur peut faire laisser, & quoy que l'eau ne coure pas tousiours en bas, mais à costé, estant empeschée par la terre, si est-ce qu'elle descend tousiours quelque peu en biaisant, ne pouvant descendre à plomb, tellement qu'elle ne peut jamais retourner à sa source. Et si on la voit monter par vn canal fermé, ce n'est pas qu'elle monte de sa nature, mais pressée dans cete prison, par l'eau qui descendant la pousse; Et neantmoins, quoy que ainsi pressée & poussée, elle monte tousiours vn peu moins, que celle qui la pousse ne descéd

tellement que l'eau courâte dans le canal pressé & clos, regardée en blot descend tousiours, & la fin de son cours est plus basse que son commencement, aussi bien aux canaux pressés, comme aux riuieres libres, & ainsi iamaïs elle ne retourneroit à sa source, pour perpetuer son mouuement, quoy que le canon fut plus gros à la descente de l'eau qu'à la montée. Quelques vns ont pensé, que estant le canal plus gros en la descente, cette grosseur & grande quantité d'eau, deuoit donner plus de force à l'eau de monter, estant son cours moins pesant, pour n'estre si gros: mais outre les grandes raisons, que la fluidité de l'eau, nous donne pour ne croire cela, l'expérience le nous fait voir, notamment aux cruches & fioles, qui ont le tuyau, qui sort du fonds d'icelles, où nous voyons l'eau aussi

haute dans le gros de la fiole, cōme dans le petit tuyau, & par ainsi la proposition de ceux qui disent, que l'eau monte tant comme elle descent est fausse; n'estant le mouuement violent, de la montée si grand comme le naturel de la descente, qui le cause; ainsi qu'on voit au branle de la cloche, laquelle quoy qu'elle monte en haut, pressée par la descente qu'elle a faicte en bas, jamais cette montée n'est si grande que la descente, & ainsi le branle se pert quand l'apetissement de son mouuement la reduite à son plōb. Et tout de mesme l'eau ayant mis à niueu les deux superficies des deux eaux, descendente & montante, ne flue plus.

On a fondé l'opinion de pouuoir faire de mouuements perpetuels, sur vne autre raison, à sçauoir que cōme vn petit poids

en fait monter vn grand , peu d'eau , en peut faire monter vne grande quantité. Comme on voit que en la balance Romaine, vn poids de trois liures , fait haucervn quintal , ils croyent avec l'art , pouuoir faire qu'une petite quantité en face monter vne grande. Et ne voyent pas que si la quantité grande qui monte , est plus grãde en poids que celle qui descend , celle qui descend , descend plus que l'autre, en muance & changement de lieu , selon la distance que les poids ont de l'essieu. Le poids esloigné de l'essieu d'un paume , ne pesant que dix liures , en leuera vn de vingt liures, qui ne sera que demy paume de l'essieu , & si le gros descend demy paume, le petit mōtera vn entier, & ainsi proportionant les distances de l'essieu avec les changements de lieu , des poix en leur cheute , on verra qu'un

poids ne monte pas plus qu'un autre, & que celuy qui descend, descend tousiours quelque peu moins que l'autre ne monte. Car si l'un monte plus, en changement de lieu, l'autre monte plus en quantité de matiere : mais parce que ceux qui veulent treuver le mouuement perpetuel, ne sçauent pas accorder aux mouuements les poids des choses meües, avec les quãtités de mouuement, non plus que les Athées accordent la nature créée, avec l'increée, les Astrologues la necessité avec l'inclination, les faiseurs d'or, les bornes de l'art, avec celles de la nature, les chercheurs de quadratures, la figure parfaite avec les imparfaites, n'y les Heretiques la verité enseignée, parle S. Esprit, avec la verité cherchée, avec la raison humaine, ils demeurent en vn perpetuel embarras, ie les ay voulu ti-

ter de leur vain travail, & afin qu'ils ne portēt pas enuie à ceux auxquels j'ay donné vne quadrature, pour les tirer de la recherche de la quadrature tant recherchée, ie leur veux donner vn mouuement perpetuel, pour les tirer de la recherche de l'autre.

On peut avec vne naturelle source d'eau faire vne Orloge perpetuel, auquel ne faudra monter n'y remonter les poids n'estāt besoin y en auoir aucun, & pour ce faire, il faut au lieu qu'aux Orloges on leur donne le mouuement avec les poids, qui meuuent les plus grosses roües, les faire mouuoir par le volant de la sonerie, & vn autre qu'il en faut faire à la mōstre ou mouuement, sur la roüe du rencontre, au lieu de balancer & accommoder deux petits tuyaux d'eau, qui facent joüier ces volents, accommodent ces volans & ces tu-

yaux, en telle sorte que l'eau ne tombe sur les autres rouës, les escartant vn peu. On peut proportionner la force de l'eau de ces tuyaux au temps du tour de l'esguille, du quadrant, & du sonnement des heures, augmentant ou diminuant l'eau du vase, dont lesdits tuyaux sortent: car tant plus haute est l'eau dâs ces vases, tant plus les tuyaux la donnent avec force: & ainsi ces tuyaux doiuent sortir du fonds du vase, auquel il y doit auoir diuers autres trous outre lesdits tuyaux, les vns plus hauts que les autres, serrant les plus bas iusques à ce qu'il y a assés d'eau, pour la force requise à ce mouuement, accordât cette hauteur d'eau avec le iuste mouuement. Vn Orloge ainsi réglé sonnera & môstrera les heures vn an entier, sans y rien toucher; & vne bien petite source d'eau fera jouër vn bien grand

Orloge, mais il faudroit pour le rendre bien assuré, que ces tuyaux fussent de quelque matiere non suiecte à la pourriture ny à la rouille, & mettre quelque laine au deuât de l'enboucheure de ces tuyaux, afin d'empêcher les festus & buches que l'eau meine d'ordinaire. J'enfeignerois à faire d'autres Ydrologes ou Orloges d'eau de moins de façon, n'y estant besoin les roüages des autres, & que neantmoins y faudroit mettre la main tous les iours, comme aux ordinaires : mais au lieu de desabuser j'amuserois & m'amuserois trop moy-mesme à desabuser ceux, icy ne gardant du loisir pour en desabuser d'autres montrant,

Que le niuzautrompe ceux qui veulent escouler de mareis ou estangs, à faulte de cognoistre la globosité de la superficie de la terre, ou de l'eau: sans laquelle cognoissance les Mathelots ne sçauent de combien loing vn Nauire peut estre veu, ny de cōbien loing on peut voir vn phanale.

C H A P. XVIII.

TOVT le monde sçait, ou au moins peu de personnes ignorent, que la terre & la mer font vn globe ensemble; mais il est impossible de sçauoir parfaitement par regle infallible, combien de globosité il y a entre deux termes, de la superficie de mer ou de la terre: ny de cōbien se cache la ligne de superficie à la ligne de nostre orizon, selon qu'elle s'esloigne de nous. Et l'impossibilité vient de ce que la ligne de la superficie est oblique

& celle de l'Orizon est droicte ;
& il n'y a point d'accord n'y de
cōparaison entre la ligne droicte
& l'oblique, pour les raisons di-
ctes au chapitre de la quadratu-
re du cercle. Toutesfois com-
me la quadrature se cognoist peu
plus ou peu moins , & en telle
sorte que cette cognoissance,
quoy que imparfaicte , est suffi-
sente pour la Geometrie, qui ne
demande vne si exacte pontua-
lité , comme celle que ceux qui
la cherchent ne peuuent treuver.
Ainsi en la curuité ou globosité
de la superficie de la terre ou mer,
on treuve vne cognoissance suf-
fisante, pour ce qui est besoin
pour les nauigations , constru-
ctions de Phares , ou desseche-
mens de lacs ; & ce peut faire en
cette sorte. Diuiser le tour d'un
Globe en trois cens soixante de-
grez , qui est la diuision qu'on
donne à la terre , & tirant vne

ligne droicte & Orizontale sur la superficie de ce globe, on treuve que dans cinq degrez cette ligne se treuve esleuée sur la superficie spherique, d'un cinquième de degré, laquelle esleuation proportionnée au globe de la terre, est 4. lieües de Gascogne, contant vingt lieües pour vn degré, tellement que si nous voulions voir vne ville distante de nous de cinq degres, qui sont cēt lieües, il faudroit que cette ville fust sur vne montaigne, qui eut quatre lieües de haut; ou que nous fussions sur vne tour ou montaigne, de pareille hauteur. Et ainsi si on vouloit faire vn Phare qui fut veu de cent lieuës, il faudroit qu'il eut quatre lieuës de haut (chose impossible) & toutesfois vn Phare d'une lieüe de haut se verroit de cinquante lieuës loing. Car cōme la superficie fuit par vne ligne oblique,

la proportion n'est pas telle, que si le Phare double sa hauteur, il double l'estendue de sa veüe; mais quand la distance du lieu qu'on veut voir diminue par moitié, le Phare doit diminuer de trois quarts; assavoir la moitié & la moitié de l'autre moitié. Tellement que pour voir de nonante six lieües, il faudroit que le Phare eust quatre lieües de haut, & pour voir de quarante huit lieües, suffiroit qu'il eust vne lieüe, qui n'est qu'un quart de la hauteur de celuy qui voit de nonante six. Pour voir de vingt & quatre lieües, suffiroit vn quart de lieüe: pour voir de douze lieües, vn sezième de lieüe, qui sont deux cens quarante cannes, contant pour lieüe trois mil huit cens quarante cannes: pour voir de six lieües, soixante cannes: pour voir de trois lieües, seize cannes, pour voir d'une lieüe

& demy , quatre canes : pour voir de trois quarts de lieuë, vne canne : pour voir d'un quart de lieuë & demy , deux pans : pour voir d'un tiers lieuë , vn grand demy pain ; d'où nous voyons qu'un homme qui seroit au bord de la mer, ayant la teste plus haute, que la superficie de l'eau d'une canne , ne verra que trois quarts de superficie d'eau ; tellement que passé trois quarts de lieuë , vn nauire commence de se cacher à la veüe , & si le nauire a quatre canes sur l'eau, dans vne lieuë & demy , nous le perdons de veüe, si nous ne sommes en vn lieu esleué. Et si on est sur vne Hunne, ou autre lieu esleué d'autres quatre canes , on le verra de trois lieuës. Si le nauire à seize canes de haut on le verra de trois lieuës, & si la Hunne ou autre lieu haut , d'où on le regarde à autres seize canes, on

le verra de six lieuës. Cecy suffira aux Matelots, pour cognoistre que deux nauires, qui ont chacun quatre cannes, peuuent voir l'un de l'autre, ce qui est au dessus de la Hunne de trois lieües; pourueu que celuy qui regarde soit sur la Hunne. Et deux qui ont seize cannes, se peuuent voir l'un l'autre de six lieuës, celuy qui voudroit faire de phanals à vne coste de mer, qui se vissent l'un l'autre, pourra cognoistre qu'ils ne doiuent estre plus loin l'un de l'autre, que de trois lieuës n'ayant plus de quatre cannes de haut, de six lieües s'ils ont seize cannes, & d'environ quatre s'ils ont huiët cannes.

Ceux qui veulent escouler des estangs ou marets, peuuent cognoistre, que la globosité de la terre ou de l'eau, trompe ou deçoit leur niueau, de deux pans dans vn quart de lieuë & demy,
qui

qui disent environ mille cannes, dans cinq cens cannes, & demy pan, dans deux cens cinquante cannes, vne huietieme partie de pan, que sont deux petits doigts : dans cent vingt & cinq cannes, vn petit demy doigt ; dans soixante cannes, vn huietieme de doigt ; qui est la largeur d'environ quatre espingles, qui est chose si petite que l'œil n'y peut rien cognoistre, qu'elles Lunettes qu'on aye ; & ainsi ce seroit chose vaine d'en parler plus par le menu. Ce que ie diray seulement est, que si on cognoissoit cette globosité de superficie, de terre & de mer, on ne trouueroit tant de difficulté à communiquer les riuieres, comme on croit y auoir : & on ne iugera tant de peine à ioindre les mers, comme ont estimé ceux qui ont creu difficile, de ioindre la Mediteranée à l'Ocean,

par le Languedoc & la Guiene, le long d'Aude, Fresquail, Lers & Garonne. Vn canal tiré de Tolose à Narbonne, à droicte ligne & à niueau d'œil, auroit cent cinquante cannes de profond, plus que celuy qui seroit tiré à niueau de superficie; la profondeur duquel est vn quasi rien, au respect de cette autre profondeur, quoy que cette icy bien que circulaire, soit la propre à donner cours à l'eau & non l'autre, quoy que droicte à ligne d'œil, qui est la rectitude parfaite, & toutesfois non propre à donner cours à l'eau, si elle n'estoit dans vn canal enclos, comme ceux des fontaines qu'on conduit soubs terre; mais laissons ces canaux pour parler d'autres, monstrent,

Que c'est vne absurdité, de dire qu'on puisse arrester les voix ou paroles prononcées, pour estre produictes au temps qu'on veut ; & comment il faut faire les Echos artificiels.

C H A P. XIX.

I'Ay honte de dire qu'il yaye des Esprits si simples, qui croient qu'on puisse retenir vn son articulé, & enfermer des paroles, pour estre desemprisonnées au temps qu'on veut ; mais puis qu'il y en a eu, qui n'ont pas eu honte de le dire & de l'escrire, ie n'auray pas crainte de manifester leur erreur. Ils disent que comme le son n'est pas porté en vn instant aux oreilles, comme en vn instant la veüe, en est offerte aux yeux, on peut allonger cette extension de temps, avec la retention de l'air, auquel le son s'est imprimé, & avec le-

quel il est porté aux oreilles; mais ie ne sçay comment ils osent n'y croire n'y dire cela : car si la voix est portée dans l'air, avec extension de temps, cette extension n'a autre terme n'y limite que le temps, dans lequel l'air perd l'impression qu'on luy donne, qui est vn temps fort court. Or tant plus les corps sont liquides, tant moins ils gardent les impressiōs; quoy qu'ils les reçoient plus facilement. Le plomb reçoit plus facilement les impressions que l'estaing, mais il les conserue moins dans le feu. La cire est plus capable d'impressions que le plomb, le beurre plus que la cire, l'eau plus que le beurre, & l'air plus que l'eau; mais tant plus facilement ils reçoient les impressions, tant moins ils les gardent. Et aux choses liquides elles ne durent plus en temps, qu'elles demeurent à occuper le

lieu. On void cela en l'eau, car si on iette vne pierre en vn lac, elle imprime des ondes & enflures d'eau, qui ne durent que le temps de leur course; ne pouuât estre retenues ny entretenues, que par continuation ou reïteration de mouuement. Ainsi le son donne vn mouuement à l'air, comme la violence à l'eau, voire avec plus de vitesse & facilité, comme estant plus fluide que l'eau; mais comme il le reçoit plus facilement, il le perd plus tost; ainsi void on que l'onde demeure plus au lac agité, que le son ne demeure à estre porté par l'air; & si l'eau est incapable d'impression permanente, que serail de l'air? Mais comme j'ay vne anguille, pour donner à ceux qui ne veulent bailler qu'à regret le Serpent dangereux: Je veux donner vn vray & possible emprisonnement de mots & de

voix, à ceux qui en recherchent des impossibles, qui ne furent jamais. Je veux monstrier à faire la multiplication & retention de voix, par des Echos.

Les Echos se font de trois sortes, l'une avec vn canon ou conduit enclos & sousterrain, qui va sortir loing du lieu où on erie, ou produit les voix : l'autre par vn conduit, qui par vn chemin oblique ou circulaire va loing, & neantmoins reuiet pres dudit lieu où on faict le son. Et l'autre sorte d'Echos se faict avec vn conduit qui va loing, & n'a point de sortie autre que son entrée. Or la voix estant portée successiuelement, comme nous auons dit, elle resonne plus tard en sortant de ces canons, qu'en y entrant; & ainsi tant plus long on fera ces conduits, tant plus long temps demeurera à raisonner: tant plus on les multipliera,

tant plus de responce d'Echo
on ouyra ; & tant plus differante
sera leur longueur , tant plus dif-
ferentes seront les voix en temps
& en force ; car en plus la voix
fait de chemin , en plus elle s'af-
foiblit , & demeure plus de tēps
à se produire. La difference qu'il
y a en ces canons , est que celuy
qui est oblique , & a entrée &
sortie , donne la voix avec plus
de force que l'autre , estant la
voix conduite avec force natu-
relle ; & dans celuy qui n'a point
d'autre sortie que l'entrée, la voix
n'estant portée par force natu-
relle , que iusques au fonds, estāt
son retour par force violente &
repercussive ou repulsive : & le
mouuement violent n'a iamais
la force du naturel, comme nous
auons dit au Chapitre du mou-
uement perpetuel ; & tant les
vns que les autres de ces con-
duits, se peuuent faire fort longs,

sans aller fort loing, les faisant en forme de Labyrinthe.

Pour les autres conduits, qui ont leur sortie hors du lieu de l'entrée, la voix resonance plustost sortant au lieu de la sortie qu'à celui de l'entrée; voire avec plus de son. Et si le lieu où on feroit le son estoit fermé, & l'emboucheure estoit vn peu grande, la voix yroit beaucoup plus loing dans ce conduit, qu'elle ne va de sa nature dans l'air libre; ie dis beaucoup, ne disant pas plusieurs lieux, comme quelques vns disent, n'y à l'infiny comme quelques autres ont voulu dire. Il y a eu de personnes qui ont dit, que cōme le canon plain d'eau quoy que long, estant pressé d'vn bout rejaillit par l'autre, l'air qui est dās vn canon estant meu en vn bout par la voix; doit necessairement estre meu iusques à l'autre; mais ils se trompent grandement, par-

ce que l'air peut estre comprimé & rarifié, ce qui n'est pas si propre à l'eau, qui n'est rarifiée qu'en se conuettissant en vapeur.

L'air reçoit accroissement, sans accroissement de lieu, & diminutiō, sans diminutiō de lieu. On peut faire entrer de l'air dans vn vase, avec vne seringue, & puis il sort sans que rien succede à sa place.

On peut encore avec la mesme seringue, tirer du vase partie de l'air, que naturelement il cōtient, & puis c'est air r'entre, sans que rien sorte pour luy faire place. Et ainsi la compression d'air, fait que le son se perd dans vn long canon. Il est bien vray, que qui emboucheroit vne trompette dans vn canon, en telle sorte que la trompette luy dōnast tout son air, sans qu'il en receut d'autre, la voix de la trompette yroit tres-loing, & croy que des lieuës

entieres, si le son estoit fort continué.

On dit qu'un certain Romain, desirant sçauoir ce qui se faisoit au Capitole, faignant faire un aqueduc, qui conduit une fontaine de sa maison, à la sale où le Senat s'assembloit dans le Capitole, chose difficile, estant le Capitole sur le mont Tarpejus, & estant fait allegua quelques disproportions de lieux, & ayant faict fermer l'aqueduc, y fist laisser quelques emboucheures par l'artifice d'un Architecte, & faisant aboutir l'aqueduc à sa chambre avec une emboucheure fort petite, qu'il fermoit subtilement, avec un petit bouchon qu'il ouuroit, lors des assemblées du Capitole; par lequel il entendoit les propositions faictes, & resolutions prises au Senat. On dit de quelques autres, qui ont faits des conduits dans leurs mai-

sons, par lesquels ils entendoient de leur chambre, tout ce qui se disoit en tous les endroits d'iceles, & n'y a pas de doubte, que si les conduits se pouuoient faire si facilement & si cretement, comme ils conduisent les voix; il y a beaucoup de personnes qui en feroient faire en leurs maisons. Il y a beaucoup d'autres impossibilités, après lesquelles les curieux se rompent en vain la teste: entre autres ceux qui disent qu'on peut faire marcher vn bateau contre vent, par le moyen de la force du vent, appliquée à quelques machines; comme si le mouuement naturel pouuoit produire des mouuemens, qui ne soient moindres, ainsi qu'a estimé le Docteur Arias Espagnol tres-docte, que j'ay veu a Madrid, duquel le Roy & conseils d'Espagne faisoient grand estat, pour les riches inuentions

de machines. Ce Docteur confiant trop à sa doctrine pensoit auoir inuenté la nauigation contre vent; mais les actes de pratique luy firent descouurir les fautes maximas de Theorique, contre les regles generales de la nature, qui sans exception veulent que le mouuement naturel, ne soit iamais contraire à soy mesme, produisant de mouuemens plus forts. Pour ceux qui disent les vns, qu'on peut cognoistre les longitudes estant sur mer, par le moyen de la boussole, ou esguille d'Aymant, & les autres par les estoilles qui voysinent les Poles, ils ont entretissu leurs raisons, avec de si delicâtes subtilités, & affirme leurs propositions avec de raisons si apparentes, qu'il vaut mieux les couper toutes d'un coup, comme le nœud gordien d'Alexandre, les enuoyant en mer mettre en pratique

leurs longitudes, que débattre leurs raisons, l'une apres l'autre. Estant sur mer, ils verront que leurs raisons ne sont que de confusions, & auant d'auoir rien accordé de leurs mesures, ils seront constrains de mesurer leurs longitudes par l'estimation; aussi bien cōme la latitude par l'elevation du Pole, qu'elles differences qu'ils fassent de Poles d'aymant à Poles du monde. S'il y auoit quelque art pour cognoistre les longitudes, se seroit par le moyen d'un Orloge mechanique: c'est à dire Orloge de poids ou de sable & non de Soleil; mais il est si difficile d'en faire vne qui soit précisément si juste, que la varieté de temps ou de mouuemēt ne la face varier, que son iniustice dourroit plus d'incertitude aux longitudes, que l'erreur de l'estimation. L'estimation est, afin que ceux qui ne

font pas mathelots m'entendēt,
vn compte de combiē d'heures
on a cheminé à vn tel vent, &
combien à vn tel autre, & tout
compté ou supputé, combien on
cest esloigné d'Orient ou d'Occident,
qu'est-ce qu'on appelle
longitude, comme l'esloignemēt
de l'vn ou de l'autre Pole, s'appelle
latitude. C'est esloignement
d'Orient ou Occident, ne
se peut cognoistre par les Poles
qui sont esgalemēt hauts en toutes
les parties du tour de la terre;
qui sont en mesme Zone ou
mesme sercle, n'y par les Astres
qui n'arrestent plus sur vn lieu
que sur vn autre, de leur cours
circulaire, & voyent en ce cours
la terre, & la mer d'vn mesme
aspect: Et ainsi on peut par la
cognoissance du lieu ou on est,
cognoistre en quel lieu de longitude
les Astres sont; mais non
pas au contraire par les Astres;

cognoistre le lieu où on est; estât du tout indifferentes les parties du cours circulaire des Astres en soy, en telle sorte que rien ne les peut marquer, que la difference de formes de la superficie de la terre, ou vn Orloge bien aiustée, mais qui la fera si iuste qu'elle ne manque plusieurs minutes, chacune desquelles importe plus de cinq ou six lieües. Si on pouuoit faire cette Orloge juste, on seroit assure des longitudes, n'estant besoin que le mettre en jeu sortant du port, & marquer l'heure, & au bout de vingt-quatre heures, regarder de combien le Soleil a decliné du point, auquel il estoit lors du despart; car d'autant qu'on verroit le Soleil auoir passé ce point, d'autant seroit on vers Orient, & d'autant qu'on le verroit retardé, d'autant seroit on vers Occident. Voilà les longitudes biē

asseurées quand à la Theorique, qui dict qu'il faut vn Orloge iuste : mais quand la pratique qui veut la iustice de c'est Orloge, ie ne sçay qui l'ajustera pour le y pouuoir appliquer. Ce n'est pas à moy de sçauoir s'il est possible ou non, mais bié d'asseurer à celuy qui me dourra vne Orloge bien aiustée, que ie luy dourray vne infallible cognoissance des longitudes.

On pourroit donner des autres sciences vrayes, à ceux qui en cherchent d'impossibles : mais estant vaines quoy que veritables, il vaut mieux les taire. Je pourrois mōstrer le moyen d'enuoyer vn esquif sans personne dedans, aller mettre le feu à vn Nauire ou Armée Naualle. Je pourrois enseigner à assembler grand quantité de rayons du Soleil, pour avec vn instrument mathematique mettre le feu bien

loing, iusques à de lieües entières; ou pres, faire l'office du feu à cuire; mais pouuant ces choses estre employées au mal, i'ayme mieux les laisser, pour mettre sur la poupe du Nauire de c'est ouurage, les Heretiques comme i'ay mis les Athées sur la prouë, faisant voir,

Que les Heretiques sont fols, ignorans & malicieux.

CHAP. XX.

DEMOCRITE auoit bonne raison, disant que la verité est cachée dās vn puits inespuisable, puis que cōme dict le Prophete, tout homme est menteur. Il auoit bonne raison dis-je estāt Payen; puis que les menteurs ne sçauroient treuer la verité, aumoins pour la dire purement; mais s'il eut esté Chrestien, il eût parlé fort impertinément, puis

que la verité nous est promise de Dieu, & donnée par son saint Esprit. La verité ne se peut treuver aux hômes, n'y par les hommes, puis que le Sauueur dict, que le monde ne peut receuoir l'Esprit de verité; & neantmoins le monde la cherche avec la force de son esprit, la refusant de l'Esprit qui la doit donner. Dieu promist son Esprit à son Eglise, & l'Heretique veut à belle force treuver vne verité, autre que celle que l'Eglise instruite par c'est Esprit nous enseigne. Les menteurs veulent treuver la verité, comme hommes à belle force d'esprit, & encore ne veulent ils pas qu'on les die, mēteurs, meschants, ny Heretiques; mais si faut il que ie le vous die, & que je sorte de gonds de la modestie, avec laquelle j'ay parlé aux autres fols, n'estant leur folie meslée avec tant de malice,

comme la vostre. Vous auortons de la nature, indignes fils de la chérie du ciel, hôte des cédres de vos peres, des-honneur de vostre patrie, escume du boüillât de la vertu Françoisë, rouille du fer de sa force, lie du vin de sa pureté, crasse de l'huylle de sa douceur, vermissieux des roses de sa beauté & de son odeur; vous treuuerés des tenebres dans le clair midy, des nuicts dans le plain iour, & des obscurités là où toutes choses sont claires. Vous preferés la honte au bien, & à l'honneur de vostre patrie, vous auez plus d'honte de passer du mal au bien, qui vous est manifeste, que vous n'en eustes de passer du bien au mal, que vous ne cognoissiez pas. Et iusques à quand durera cette honte? iusques à quand prefererez vous l'opinaistreté à la raison; fermant les fenestres au iour que vous ne

voulés voir, & les yeux à la clarté qui vous fait honte ? pensés vous que vos raisons changent la verité, nō plus que la giroüette change le vent, voulés vous faire de vostre entendement, la pierre de touche des paroles de Dieu ? ne sçäuez vous pas que tout homme est menteur, & que Dieu est veritable, & iustifie en

Psal. 50. ses paroles, & ceux qui les veulent preuuer demeurent confus & vaincus ? Dieu a promis son esprit à son Eglise, pour interpreter les Escritures, & vous voulés preuuer ces interpretations, avec vostre esprit humain, & par consequant menteur ; vous ne voulés rien croire, que ce que vostre entendement cognoist, & vous ne sçäuez pas encor, que l'esprit humain prend l'Enfer pour le Paradis, le mal pour le bié, & le contraire pour son contraire. Les œuures de Dieu sont

toutes avec poids & mesure: mais si nous voulons chercher ces poids & ces mesures, avec les forces de nostre esprit, nous nous treuuerons si courts, que n'en pouuant voir le bout n'y le centre, avec nostre courte veuë, nous pourrions dire des blasphemies, si l'humilité ne nous faisoit plier le col, à baïser les pieds du Tout-puissant, qui se mocque de nos fols iugements.

Si nous voulons rechercher les perfections de la plenitude de la nature, nous treuuerons du vuide, puis que l'air d'un grand lieu se peut contraindre dans vn petit, estans ces lieux limités par des corps, qui empeschent tout mouuement, ie dis selon la nature. Si nous voulons rechercher les mesures du tēps, avec lequel le Soleil faict son tour, nous treuuerons ce tour se faire non en mois parfaicts, qui sont natu-

rellement les lunaires, non en iours entiers, non en heures parfaites, estant cachées les plus grandes perfections sous des apparences d'imperfection, qui seruent d'occasion de blaspheme aux meschants, & d'humilité aux bons.

Si nous voulons regarder la beauté de la Lune, miroir du Soleil, nous iugerons ce miroir taché, voyant des ombres en sa clarté, & parce que nos yeux debiles, ne peuvent voir la forme du Soleil dans sa propre clarté esclatante, nostre sot entendement niera cette forme estre dans le miroir qui en est plus capable que nostre veüe: si nous voulons contempler la pureté & clarté des cieux, nous y verrons encore des nuées, & au lieu de les appeller perfectiō incognuë, nous l'appellons voye de laiët: si nous voulons regarder la ron-

deur de la terre, nostre compas humain treuuera cette rondeur imparfaicte, à cause des montagnes, tant nostre veuë, & nostre cognoissance est courte. On peut bien cognoistre que l'esleuation d'un costé de la mer, fait courir l'air, pour remplir le vuide que l'autre costé laisse, se baissant à proportion que l'autre se hausse, donnant le mouuement de l'air; quoy qu'Aristote n'y ses maistres n'y ses disciples ne l'ayent entendu: mais de dire par le menu, les causes pourquoy le vent & mouuement d'air, ne suiuent l'ordre de la mer n'y du Soleil, n'y de la Lune, qui causent ce mouuemēt, quoy que d'autre sorte que ces Philosophes nē l'ont entendu; il faut s'arrester là, si on ne veut se perdre dans les confusions.

On peut bien cognoistre, que le hausser ou baïsser du Soleil vers le Pole, est la cause de l'Hy-

uer & de l'Eſté ; mais de cognoiſtre pourquoy le froid & le chaud ne ſuiuent l'ordre du Soleil , & ne cheminent à ſon pas , & pourquoy le mois de Mars eſt des années qu'il y a , plus froid que celuy de Feurier , quoy que Mars ſoit plus prez de l'Eſté ; qui endourra des raiſons qui ne ſoiēt auffi folles comme celles des Astrologues ? Et ſi nous ne pouuons ouurir les ſecrets de nature avec noſtre entendement , qui n'eſt que folie deuant Dieu , oſerés vous bien eſſayer d'ouurir les ſecrets des Eſcritures ſacrées , ſans en auoir les clefs , & ne croire à ceux à qui ces clefs ont eſté données ? oſerés vous chercher la verité dans les Eſcritures ſans autre lumiere que la naturelle ? Si vous ne pouués rechercher les ſecrets & les perfections de la nature , ſans vous perdre ; ſi cherchant le centre des vertus

avec

avec la lampe de l'entendement humain, vous treuuez des vices, oferés vous chercher vne autre verité, ou le centre de la verité dans la verité creüe par toutes les parties du monde, & par tant de fiecles? le milieu entre froid & chaud faiët l'Arcancier, faisant le froid moderé, conuertir & vnir vne partie de la nuée en gouttes, capables d'une clarté, qui contient les couleurs du Soleil; mais vn milieu iuste & en la façon que nous le pourrions imaginer, receuroit vne clarté qui nous rauiroit la veüe.

Le milieu de la iuste esgalité des semences humaines, reçoit du Soleil les quatre parties des couleurs de l'Arcancier, flegme, sang, bile, & melancolie pour faire hōme : mais le milieu iuste en cette esgalité en la sorte que nostre imagination la formeroit, & que quelques fols & ennemis

Joan.
Huart.
in exami
ingenio-
rum.

de nature, ont voulu chercher & enseigner aux hōmes, pour n'engēdrer que des masles: ce milieu mettroit fin au monde sans vn peu d'inefgalité, qui est esgalité selon la sagesse de la nature, & sapience de son aucteur, quoy que nostre entendement ne le cognoisse.

Le milieu de l'hōme est l'humilité, comme la terre est le milieu du monde: mais le milieu de ce milieu cherché à nostre mode, pourroit estre le desespoir. Le milieu des vertus est la prudence, qui les regist & ordonne; & cherchant ce milieu sans simplicité, on pourroit treuver la fraude.

La iustice est vn milieu, mais recherchée avec la chair & le sang, on treuueroit la feuerité sans misericorde, aussi bien comme au lieu de la misericorde, on pourroit treuver l'impunité. L'or-

be du milieu du monde, qui est la terre, est le point où accourent les influances des cieux, qui font sa circonference, mais le milieu de ce milieu, qui est le milieu que l'entendement humain treuuerait, avec ses compas & mesures est l'Enfer ; la science est vn arbre au milieu de l'homme, d'où il voit tout au tour ; mais qui cherche le milieu de ce milieu, desirant sçauoir toutes choses, avec les forces humaines au lieu du sçauoir, treuuerait l'ignorance.

La parallele du milieu des neuf, qu'il y a entre l'extremité du froid, & l'extremité du chaud est la Zone tres-temperée, & en certaine maniere le Paradis de la terre ; mais comme au Paradis des cieux, estoient les plus belles creatures, qui sont les Anges, desquels les vns se rendirent superbes de leur beauté, ainsi au

climat plus temperé, sont les hommes plus parfaits : mais quelques vns cherchant le milieu de cette perfection, sont entrés dans les imperfections de l'outrecuidance, de la presumption, de la des-obeyffance, & en vn mot de l'heresie. Adam auoit toute felicité au Paradis Terrestre ; mais cherchant par curiosité le Paradis de ce Paradis, il y treuua la mort. Lucibel estoit à la sublimité des perfections des oeuvres de Dieu ; mais voulant monter à la perfection des perfections, il trebuscha au fonds de l'abyfme. Aussi vous estant nés au plus beau climat, & plus temperé de la terre, vous estes en beauté d'esprit, de Lucibels au monde : mais la superbe que cette perfection vous a donnée, vous a donné tant d'outrecuidance & de presumption, que non seulement vous aués voulu estre semblables

au plus haut : mais aués voulu faire preuue de ses paroles, & ce peché pere de la melancolie, cōme la melancolie mere de tenebres, vous en a donné de si noire, que vostre clarté s'est changée en de tenebres, avec lesquelles au lieu du sçauoir, vous treuues l'ignorance, au lieu de la prudence, la fraude, au lieu d'humilité, le desespoir, au lieu de la iustice, la cruauté, au lieu de la terre, l'Enfer, au lieu de l'ordre, la confusion, & au lieu du Paradis la mort.

Il vous semble, que pour tourner le vent, ne faut que tourner la giroüitte, que pour tourner la verité, ne faut que tourner des arguments mesurés à l'aune de vostre phantasie ; & que pour auoir des possessions, ne faut que former des procez : mais vous estes bien loing de vostre cōpte. Diuerses personnes peu-

uēt plaider le champ & la vigne,
& tous produire des actes, tous
alleguer, tous argumenter: &
avec des chicanes faire durer le
procez, tant qu'ils veulent; mais
pour cela le droit ne se change
pas, demeurant à celuy qui a
meilleur titre, & plus ancienne
possession.

Vous aués intenté vn procez,
qui seroit aussi long, si on le vou-
loit poursuiure avec de chicanes,
comme la sainte Escriture
est copieuse en diuersité de clau-
sules, mesmes, que vous les
alongés & accourcissés à vostre
point: mais si pour couper court
& sortir de procez, on veut con-
fronter les titres; la possession, &
la bonne foy des parties plaidan-
tes, ou la mauuaise, qui se descou-
ure par la contrediction, vous
treuverés que vous n'aués aucun
titre authentique, n'y aucune
bonne commission en forme,

pour pretendre aucun droit n'y estre receu à playder.

Vostre possession n'est en temps que de cent ans ; qui ne font pas la seziemesme partie de la nostre. En lieu cette possession n'est pas de sept ou huit degrés en latitude , & autant en longitude , qui n'est pas la miliesme partie de la rondeur de la terre à tout le tour, de laquelle la sainte Eglise Catholique Apostolique Romaine a son extension, ayant des colonnies aux lieux plus esloignés de nous & plus proches de nos Antipodes ; & encore de cette miliesme partie de vostre estenduë, nous en possédons , pour le moins de vingt parts les dix-neuf ; voilà vostre belle possession. Vostre bonne foy à playder , se cognoist à vos contredictions, vous contre-disant nō seulement les vns aux autres, ayāt chacū sō opiniō, mesu-

rant la verité à l'aune de son esprit; mais encor vous vous contredisez chacun à foy-mesme, disant en vn lieu que vous croyés Dieu estre Tout-puissant, & en vn autre que Iesus-Christ ne peut pas estre à la dextre du Pere, & au saint Sacrement de l'Autel, niant sa toute puissance, & sa parole claire & sans aucune contradiction en toutes les Escritures. Vous dictes que vous croyés en l'Eglise Vniuerselle, & n'y ayant que la Romaine, qui soit en toutes les parties de l'Vniuers, vous la niés: vous approuvés ce que ceux que vous mesmes appellés Heretiques ont inuenté, & reprouvés ce que ceux que vous appellés saints ont creu & professé. Vous aués laissé l'Eglise, où vous mesmes dites qu'on se sauue viuant bien, & vous estes mis à la barque d'un fol, qui ne vous a donné aucun

tesmoignage de l'esprit qu'il se jactoit auoir.

Moyse preuua sa loy avec des rayons, & Iesus-Christ la sienne avec vne infinité de miracles; quoy qu'on en eust eu tant de Propheties, de figures & promesses, & vous auez creu à Calvin, qui vous preschoit vne doctrine neufue, quoy qu'on n'eust jamais parlé de luy ny de sa venüe, & quoy qu'il ne vous aye donné aucun signe, & encor vous ne voulés pas croire vostre legereté ny vostre imprudence.

On appelle fol celuy qui laisse le certain pour l'incertain, & vous aués laissé le Nauire ancien experimenté, oules Pilotes sont tous d'accord, vous aués laissé l'Eglise Catholique ou Vniuerselle, en laquelle le salut est asseuré selon le dire du mesme Sauueur, & croyance de plusieurs centaines de venerables Prelats

enuieillis à l'estude des saintes lettres, & assemblés au nom du saint Esprit de tous les coings du monde aux Conciles generaux, & vous estes mis dans ce bateau sans experiance, sans Pilotes qui s'accordent qu'à courir aux impietés, aux mensonges, aux blasphemes, & à contredire aux promesses de Iesus-Christ, contredisant à ceux qui s'assemblent à son nom, auxquels il a promis son assistance, encor qu'ils ne fussent que deux ou trois. Et enfor vous n'aués pas demandé les plaiges & asseürâces, ny cautions, que tout prudent passager doit demander à des mariniers incogneus, & avec cela vous ne cognoissés pas vostre folie, vous prenés le procez pour la possession, le tourner de la giroüette pour le vent, la cauillation pour la verité, & le nom pour la chose: Et par ce qu'on appelle cette pe-

pinier de blasphemes, Eglise vniuerselle; vous vous y estes mis sans regarder la verité de cette vniuersalité; & encor vous ne cognoissés pas vostre legere inconstance. Vous avez laissé l'Eglise vniuerselle, pour entrer en l'vniuersité de tous maux; puis qu'on y exerce l'impieté, on y enseigne le mensonge, on y professe toute sorte de blasphemes; Car qu'elles plus grandes impietés que prescher l'Euangile avec l'espée en vne main & le feu en l'autre à ceux qui le sçauent, & ne se soucier de l'aller enseigner à ceux qui l'ignorent?

Quels plus grâds mensonges, que ceux que vous mesmes recognoissés tels, en la doctrine des Ebionistes, Sabelliens, Eunoniens, Manicheans, & tant d'autres que vous mesmes appelez Heretiques? Quels plus grands blasphemes, que faire Dieu au-

theur de mal, necessitant les vns au mal & les autres au bien: impuissant, ne pouuant faire que Iesus-Christ soit à la dextre du pere, & au saint Sacrement: negligant, ayant laissé l'Eglise plus de mil ans en erreur, n'y ayât que la petite Eglise vergoigneuse qui se cachoit dās les antres creux de l'inuisibilité, au lieu de prescher sur les toits, qui ne fust en erreur: imprudent, enuoyāt Calvin sans tesmoignages, commission ny signes: moqueur, nous disant que ayant corrigé nostre frere, & ne nous voulāt oüyr, nous le disions à l'Eglise, estant l'Eglise inuisible. Trôpeur, faisant vn testament avec de parolles, qui signifioient autre chose, que ce quelles sonnent, pour laisser vn procez à ses heritiers: faux en ses parolles, puis que ayant promis à son Eglise d'estre tousiours avec elle, iusques à la consommation

du siecle, il oublia cette promesse Mat. 28,
au bout de trois ou quatre cens
ans: voila les belles doctrines qui
s'enseignent en cette belle vni-
uersité, & encor tousiours vous
y voulés estudier sans y rien co-
gnoistre.

Nos yeux ne peuuent voir le
vent à cause de sa subtilité; mais
nous le cognoissôs par les effets,
voire le sentons: ainsi nostre en-
tendement, estant tout homme
menteur, ne peut voir l'esprit de
verité, n'y le cognoistre que par
l'esprit de la mesme verité, par le
mesme esprit & par ses effects:
Et vous croyés à vn homme qui
diët auoir cet esprit de verité,
ne le prouuant que par soy mes-
me, & par des effects qui portent
tous la marque de l'Enfer, & ne
voulés croire à la sainte Eglise,
à laquelle nostre Redempteur
a promis son assistance, non pas
par interualles, mais tous les

iours, iusques à la consommation du siecle, & son esprit, non pas pour luy enseigner vne chose, mais toutes en general, & qui a pour effects de cest esprit, l'vnique & vniforme croyance & consentement en toutes choses, & encor vous ne pensés pas estre abusés, ny ne voulés permettre qu'o vous désabuse, ny ne voulés vous despoüiller de passion pour cognoistre la verité.

Le cristal estant entier est diaphane, nous laissant voir ce qu'il couure: mais s'il est mis en pieces ou en poudre, il n'a plus de clarté. Vous estes François, & de vostre nature, estes clairvoyants entre les hommes du monde, comme le cristal est clair entre les corps terrestres. Mais la passion qui offusque les mieux nés, cōme l'aigreur gaste la meilleure boisson, l'yurée le meilleur grain, & la rouille le meilleur

metal, vous a tellement aueuglé l'entendement, que vous vous plaifés à l'aueuglement.

Ne voyés vous pas la folie de vostre presumption, de vouloir monter sans eschelle? ne cognoifsez vous pas vostre temerité de vouloir ouurir sans clef. N'estes vous pas imprudents de vous deffier de ceux qui ont ces clefs, comme si celuy qui les a données ne sçauent à qui, & comment, & qu'elle chose estoit necessaire à celuy à qui il les donnoit, voulés vous sous pretexte qu'il faut qu'il y aye des heresies pour preuuer les fidelles, comme des verges pour chastier les enfans, garder l'heresie toute vostre vie? ne sçauéz vous pas que les verges ne sont pas pour tousiours, mais qu'apres qu'elles ont seruy on les met au feu, ne voulés vous pas mettre fin à vos persecutions, puis que ce qui vous don-

noit pretexte celle ?

Vous disiez, quoy que tacitement & avec passion , qu'il y auoit des abus , qu'il falloit chastier. Vous disiez que Dieu vouloit ce chastiment puis qu'il le permetoit, & ne sçauiez distinguer entre volonté antecedente, & volonté consequante; & pour donner excuse à vos malices, pour derriere astuce de l'Enfer, n'ayant plus que tenir contre la verité, vous prenés l'opiniastrété fondée sur ce que vos contradictions, seruent d'occasion aux Catholiques , d'exercer la doctrine, d'exercer la vertu, & de meriter pour les trauaux que vous leur donnez ; mais vous demeurez tousiours deceus & abusez : car selon vostre doctrine mesme, il ne faut pas faire du mal, quoy qu'on en espere de bien, & de deux maux il faut fuir le plus grand, le plus pro-

chain, & le plus certain.

Les violences dont vous avez vſé, avec le fer & le feu ſans eſpargner les temples ſacrez, auxquels vous devez pardonner, quand ce n'eust eſté que pour l'honneur, que leur ſtructure donnoit à voſtre patrie, ces violences, diſ-je, eſtoient de maux reels & veritables, & par conſequant illicites, quels biens que vous en eſperiez, ne pouuant l'action mauuaiſe eſtre deſnuée de malice, par vne eſperance incertaine. Si vous nous auéz ſeruy de fleau, vous ne ſeruez maintenant que de riſee, & d'occasionaux eſtrangers de ſ'eſiouyr, voyant la gloire qui leur donnoit autant de honte comme d'enuie, taſchee par l'heresie.

Et il vous ſemble, que l'heresie peut tenir lieu de bonne doctrine, avec la fauſſe couleur que vous luy donnés : mais mainte-

nāt vos couleurs sont cogneuës.
Le laiton a couleur d'or, le char-
bon couleur de poudre à canon,
& l'estaing couleur d'argent;
mais l'or se preuue avec la pierre
de touche, la poudre avec le feu,
& l'argent avec le marteau. Ces
preuues ont mis toutes vos fau-
cetez au iour, vostre or ne s'est
treuue que cuire, rougy du sang
des Saints & du feu des san-
ctuaires, vostre argent c'est treu-
ué estaing, ne pouuant endurer
le marteau des conferences d'es-
crits mal alegués, passages tron-
quez & escorchez, paroles chan-
gees & obiections mises au lieu
de solutions.

Vostre poudre à canon n'a eu
que la couleur, se monstrāt char-
bon en effect, ne faisant que fu-
mée, & point de feu d'extraor-
dinares œuures de charité n'y
de miracles. Vostre cabale est
descouuerte, vostre montagne

aproduit, non pas le gros Rat d'Eslope : mais vne petite souris, qui fait souffrir tout le monde, & vous dissimulez tout, avec l'opiniastreté, qui n'a autre apuy que vostre honte.

Les Anglois & Ybernois, fondent l'excuse de ne suiure la foy de leurs ayeuls, sur ce qu'on ne la leur presche pas, & qu'ils suivent celle de leur Prince. Les Saxons & Palatins s'excusent sur l'obeissance qu'ils doiuent à leurs Seigneurs. Mais vous que respondrés vous si on vous demande, pourquoy vous aués laissé la foy de vos Peres, vous rendant cōtraires à celles de vostre Roy? que dirés vous si on vous demande, pourquoy vous ne suiuez la foy, de laquelle on ne vous a iamais empesché l'exercice, & qui vous a esté tousiours preschée, non seulement de parole, & miracles communs & manifestes.

à tout le monde : mais par des miracles, desquels nostre seule France est decorée. Aurés vous assés d'impudence, pour nier ce que la venerable antiquité a tousiours creu ? osterés vous à ces Roys, ce que le ciel leur a liberalement donné ; il leur donna son huile, pour estre oingts, il leur donne ses fleurs, pour gage des faueurs, qu'ils donneroit tousiours aux fils aînés de l'Eglise, & les miracles de cette vnction & de ces fleurs, furent confirmés par celuy qui continue tousiours de guarir les playes, auxquelles la nature ne peut remedier, & vous ne voulés voir les miracles pour les croire, vous ne voulés suiure la religion de ces Roys, vous monstrant contraires à vostre Prince, rebelles à l'Eglise, ingrats à Dieu, & ennemis de vostre patrie. Et couvrés vos impietés, avec le nom de refor-

mation , cachant vostre honte avec le pretexte de prescher l'E-
uangile.

Il y eut vn certain babillant, qui ne pouuant iamais demeurer sans parler , & luy ayant esté commandé le silence en vn auditoire , il se mist à courir par toute la salle, criant qu'on fit silence , avec vn tel bruit qu'on n'entendoit que sa voix , & le murmure de ceux qui luy voyoient faire cet office, sans charge & d'une façon extraordinaire.

Ainsi vous , pour vous redimer du silence, avec lequel vous deuiés oïir la parole de Dieu, proposée par l'Eglise , & vous tirer de l'obeissance que vous luy deués; comme singes aués prins vn Euangile à vostre sorte, l'aués presché à vostre mode, aués prins la sainte Esriture de la main de Calvin , alongée , & accourcie à son point & à sa façon, &

l'aués creüe, quoy qu'au cōmencement du Christianisme on ne creust à l'Euangile escrit par sainct Marc, iusques à ce que sainct Pierre chef & fondement de l'Eglise l'eust approuué, vous preschés pour troubler le repos, vous aués prins le nom de reformation pour difformer toutes choses, & vous semble qu'avec l'Ecriture à la main, vous estes libres de tout, poués tout & voyés tout; & vous voyés si peu, que seulement vous ne cognoissés pas vostre aueuglement. Avec la veüe naturelle, nous voyons nos mains, avec vn miroir nous voyons nostre visage; mais pour voir nous espaules & le derriere de nostre teste, il faut vn autre miroir qui en reçoie les especes pour les enuoyer à celuy que nous auons deuant les yeux. Vous voulés voir la verité avec le seul miroir des Escritures,

quoy que pour la voir il soit besoin, & la veüe naturelle & les deux miroirs, aussi bien comme pour nous voir à nous mesmes. Le premier moyen & le plus naturel pour voir la verité, au moins de ce que nous deuons faire, est regarder nos mains sans miroir, regardant nostre coustume d'operer sans lettres : mais avec la tradition avec laquelle on se guida en France iusques au tēps de saint Hylaïre, non seulement aux choses qu'on deuoit faire, mais en celles qu'on deuoit croire. Le second moyen est l'Escrature : mais cōme le miroir trompe ceux qui ne sçauent pas sa nature, qui est de monstrier au costé gauche les taches qui sont au costé droict : elle deçoit ceux qui la lisent avec presumption, sans la prudence & discretion necessaire : & le troisieme & plus efficace moyen, est l'esprit

de Dieu, avec lequel on voit les mysteres, & on deslie les difficultés des Escritures.

Et comme avec le miroir qui est deuant nos yeux nous voyōs, & le miroir qui reçoit les especes des parties que la nature cache à nos yeux, & les mesmes especes que nous voyons sans deception de gauche pour fenestre, comme celles que nous receuons par vn seul miroir : Aussi dans les Escritures nous voyons cest esprit estre donné à la sainte Eglise, & les choses qu'il enseigne en icelle estre plus asseurées que celles que la raison nous apprend.

Mais comme au visage, le nez seul se peut voir sans miroir, & est vnique, n'estant deux comme les yeux & les oreilles, quoy que double en son organe, aux Escritures il y a des passages qui ne reçoient point de glose ny d'interpretation, comme celuy de
l'insti-

l'institution du saint Sacremēt qui n'en reçoit poinct, n'y ayāt en toutes les Escritures aucune parole, qui contredise à la simplicité & clarté de ces paroles, lesquelles doiuent demeurer entieres, cōme les os de l'aigneau qui en estoit la figure, & doiuent estre sans amphibologie, cōme dictes en vn testament en cas de mort, qui sont tousiours claires & nettes, ne pouuant estre interpretées par le testateur, mesmes quand le testateur est amy des heritiers, ne voulant leur laisser vn procez pour heritage, & que les Notaires entendent leur office; & vous vous mesfiés du testateur, quoy que tres-bon pere, vous vous mesfiés des Notaires, quoy que tres-fidelles, & voulés descroire, ce que tout le monde a tousiours creu, sans intermission, & croyés à vn qui a voulu reformer la foy sans aucū signe. quoy

qu'il soit besoin de miracles pour la reformation des mœurs, qui est chose moindre que la foy. Saint François venant pour corriger des desordres qu'il y auoit au monde, porta les marques aux pieds & aux mains, de celuy qui l'enuoyoit, cōme Moïse en auoit porté au frond, & outre cela, il resuscita des morts, & vous vous estes laissez abuser, à ceux qui vous ont presché vne foy toute nouvelle, sans aucun tesmoignage, & la preschés encore, pour couvrir la honte de vous estre laissez deceuoir, & pour ne perdre les salaires d'iniquité, auxquels vous regardez plus qu'à vostre conscience.

Et vous pauures abusez, qui vous laissés abuser à ceux qui sont abusez & vous abusent, ne sçaurez vous pas cognoistre, que c'est pour l'interest qu'on vous presche, & que ces predicants

ne laiffēt ply, coing ny reply aux Enfers, qu'ils ne meuent pour conseruer le salaire qui foment leur malice. Le pauvre laboureur se laisse tromper quelque temps, à vn mauuais Aduocat ou mauuais Procureur, qui pour luy vuider la bource, l'entretien à vn procez injuste, sous de belles paroles d'esperance; mais enfin il cognoit que ce procureur & c'est Aduocat, sont plus amis du procez que de la Iustice, & plus amis de leur propre interest, que du droit de leur partie, & ainsi sage à ces despens, preferant la redemption de sa perte future, à la honte de la passée, s'accorde avec sa partie.

Et vous autres aués esté si long temps abusez, que beaucoup d'entre vous auez blanchy vos barbes, en cest abus; & cest abus est si clair & si manifeste, qu'il ne peut estre ignoré de per-

sonne, n'y incognu qu'à ceux qui ferment les yeux; & se que la malice ne vous peut faire ignorer, la honte le vous fait couvrir, quoy qu'elle ne soit pas à vous, si ce n'est que vous soyés opiniastrés. On ne doit pas avoir honte d'estre malade: mais de ne vouloir pas guarir, & croupiren la maladie. On ne doit pas avoir honte d'avoir playdé vne mauuaise cause, si ç'a esté de l'aduis d'un Aduocat, n'y d'avoir gardé vne playe long temps, si vn mauuais Chirurgien la entretenuë: maison doit avoir honte de garder vne playe iusques à la mort, & vn procez iusques à la perte des biens. Vous suiuez de Medecins iniques qui entretiennent, non pas seulement les maladies du corps, mais de l'ame: vous vous fiés à des Chirurgiens qui vous entretiennent, & gardent immortelles, non pas les playes

du corps , mais de l'esprit. Vous vous gouvernez par des Aduocats, qui comme sangsues vous hument la substance temporelle, & vous font perdre les biens éternels : vous croyés à des Ministres de l'Enfer , la plus part moines defroqués , qui apres auoir promis à Dieu la pauvreté, la chasteté & l'obedience à leurs Prelats , font banqueroutte à ce qu'ils doiuent à Dieu par promesse, & suiuent la superbe, l'auarice, & la volupté , armes ordinaires du Diable, duquel ils sont instruments & ministres. Iettent le joug de toute obediēce vertu plus recommandable, & recommandée en l'Euangile, quoy qu'ils se disent Euangelistes, prennent les rêtes asscurées, pour s'entretenir, eux, leurs femmes, & leurs enfās, quoy que Iesus-Christ aye tāt recōmandé la pauvreté, & qu'ils se iactent de

suiure sa doctrine. Et aussi tost qu'on les a receus à prescher, se marient contre l'exemple des Apostres, & de tous ceux qui ont dilaté l'Euangile par tout le monde, & par ce qu'ils se disent Apostres, vous les croyés tels, quoy que leur vie soit toute contraire à la vie Apostolique. Les Apostres alloient sans femmes & sans bourse, prescher l'Euangile, la où on l'ignoroit & tousiours on la faict en la sainte Eglise Apostolique; de laquelle diuers bons Religieux le vont prescher au Peru, au Bresil, en Canada, en la Chine & au Iapon, dilatant l'Eglise de Dieu avec leur sang, & vous ne voulés pas voir cecy, mais croyés à des Boucs puans, desquels les plus long voyages sont du list sacrilege, à la chaire de pestilence, qu'ils appellent Chaire de verité. Toutes leurs estudes sont

de vous tirer de l'obeissance que vous deués à vostre Prince , & tous leurs artifices sont de vous faire machiner des coniurations contre son estat.

Regardés ces abus, voyés ces maux , defillés hardiment vos yeux , ne marchâdés plus sur vostre changement du mal au bien, qui est autant honorable comme le changement du bien au mal est honteux. Courés hardiment à la voye de laquelle on vous a tirés ; recourés dans le bercail des oüailles de Iesus-Christ, & vous donnerés gloire à Dieu qui vous tient ouuertes les portes de sa misericorde. Vous donnerés salut à vos ames plaines de soif de la bonne eau, de laquelle elles ont esté si long temps priuées, vous resioüirez les Anges qui sont prêts à chanter les Cantiques de joye de vos conuersions. Vous donnerez des iubila-

tions à l'Eglise qui vous tend les bras comme mere pie, qui desire de vous donner le pain salutaire qu'on vous auoit changé, & glorifierés vostre patrie, luy rendant son premier lustre, & la faisant jouïr de ce que la nature luy a donné, qui est d'estre l'œil du monde, le cœur de la terre, & le blanc qui sert d'exemple à la pureté.

Ostés luy les taches qui la deslustrant, & les playes qui la debilitent; car si ces taches & ses playes sont plus petites que celles de beaucoup d'autres nations, elles ne laissent pas d'estre plus dōmageables, puis que nous sçauōs que peu de chose offence l'œil, peu de maladie afflige le cœur, & peu de noir se cognoist sur le blanc. N'attendés pas l'esguille qui osterà de l'œil la cataracte qui est desia meure, n'attendés pas les epitimes qui ga-

riront la maladie du cœur, qui se faisant trop vieille se pourroit rendre dommageable , & n'attendés pas la main qui laucra les taches que vous pourriés oster.]

F I N.